



49939/B









MAXIMILIANI STOLL,

*M. D. ET PROFESSOR. PRAXEOS  
MEDICAE PUBLICI,*

P A R S P R I M A

R A T I O N I S  
M E D E N D I,

IN NOSOCOMIO PRACTICO  
VINDOBONENSI.



LUGDUNI BATAVORUM,  
APUD H. ET A. KOSTER,

M D C C L X X.

Prostant venales etiam in Gallia, Hispania, &c.

*M. Trigi Langrandi*

MAKIMILIANI STOLL

PARIS

REVISED

ALL COM  
LUGDUNI BATAVORUM,  
A. D. H. ET A. D. S. T. E. R.

M D C C LXXXI  
 HISTORICAL  
 X X

Proffitt Venetia edna 11-08-17



# P R Æ F A T I O.

✱ ✱ ✱ um præsens libellus medendi rationem  
✱ ✱ ✱ Collegio pratico Vindobonensi usita-  
✱ ✱ ✱ C ✱ ✱ tam exponat, e re visum fuit, brevem  
✱ ✱ ✱ Nosocomii hujus practici descriptionem  
✱ ✱ ✱ legentibus dare.

AUGUSTÆ MARIÆ THERESIÆ munifi-  
centia jam ante multos annos Nosocomium practi-  
cum institutum fuisse, in quo Medicinæ Studiosi,  
postquam theoretica artis Hippocraticæ disciplina  
sufficienter imbuti fuerint, ad ipsum ejus exercitium  
duce professore practico se accingant, abunde con-  
stat.

Hanc spartam qua laude Vir eximius Antonius de  
Haen, & quanto cum emolumento rei medicæ ges-  
serit, multa ab eo præclare scripta testantur. Eo de-  
functo gravissimam hanc provinciam ILLUSTRIS-  
SIMUS L. B. DE STÖRK, cujus tantæ in me  
voluntatis, dum spiritus hos reget artus, mecum vi-  
vet memoria sempiterna, mihi demandavit.

VIR HIC in commoda Studiorum, Patriæ, Cæ-  
sarumque natus, multa denuo promovendo studio  
clinico adjumenta procuravit: Nosocomium practi-  
cum aptiorem in locum transtulit, ut iisdem modo  
Ædibus cum altero, quod S. S. Trinitatis vocant,  
contineatur, & cum eodem in unum coaluerit. Hic



ingens quotidie ægrotantium confluxus morbos, quoscunque volueris, seligendos, demonstrandosque suppeditat. Præterea illud etiam commodi Medicinæ Studiosi nunc habent, quod, ubi quamdam in Nosocomio practico penes ægros pauciores cognoscendorum, curandorumque morborum facultatem sibi compararint, amplior ipsis perficiendæ artis campus aperiatur, atque ad reliqua spatiosa variorum ægrotantium quotidie huc affluentium cubilia perducantur, ut, quemadmodum novitii milites levioribus velitationibus exercitati ad graviores conflictus præparantur, ita & hi, morborum ingenium in ægris paucioribus edocti, numerosiore diversimode ægrotantium copiam contemplando sese ulterius instruant, sibi que, dum praxin alienis quasi sumptibus exercent, judicium quoddam practicum, atque insignem in apte judicando promptitudinem concilient, quibus dotibus comparandis, cuilibet fortunatam facere medicinam adlaboranti pernecessariis, sola librorum lectitatio neutiquam par est.

Ad hanc in arte difficillima facilitatem acquirendam alia quoque momenti gravissimi auxilia solers EJUSDEM ILLUSTRISSIMI PRÆSIDIS cura suppeditavit.

Cum enim multi ejusmodi morbis conflictentur, qui eos lecto non affigunt, hinc in eadem hac nostra domo statis quotidie horis, locove adventantium querelæ excipi, remediaque, quibus suæ dein quivis domi uratur, distribui gratis solent.

Cum aliquot centeni quotannis miseriarum suarum solamen hic quærant, nonne maxime opportuna perdiscendæ praxeos medicæ in quocunque morborum genere occasione fruuntur, qui quotidie huic pauperum conventui interesse voluerint?

Ut nihil superesset, quod animus vel avidissimus studiorum amplius desideraret, alia insuper quædam  
stu-

studia, præterquam quod ea in publico Athanæo coram copioso quotidie auditore pertractentur, jussu ILLUSTRISSIMI NOSTRI PRÆSIDIS tanquam universæ quoddam, qua late pater, praxeos medicæ complementum nostris etiam in Aedibus exercitantur.

Ars enim obstetricia etiam apud nos ab exercitatis-  
simo hac in arte viro Raphaële Steidele Chirurgiæ Professore penes machinas ingeniose ab ipso hunc in usum excogitatas, & tandem ad ipsos parturientium lectos medicinæ studiosis traditur. Qui vero non sola theoria contenti ipsa artis exercitatione imbui volunt, eam hic occasionem nanciscuntur, quæ ipsorum desiderio abunde satisfaciet.

Praxin chirurgicam, anatomen, operationes chirurgicas idem Cl. Chirurgiæ Professor copiosam juventutem dexteritate insigni, industriaque quotidie docet.

Copia quoque secandi cadavera omnibus iis fit, qui exquisitori studio anatomen colunt, seque ipsos in arte dissectandi exercere desiderant.

Eadem quoque ILLUSTRISSIMI STUDIO-  
RUM PROMOTORIS vigilantia cavit, ne alia nobis adjumenta desint, quæ ad artem facilius addiscendam conferre boni quid quacunque ratione possunt. Hinc locupletissimus tam medicus, quam chirurgicus apparatus quotidiana incrementa sumit: hinc selecta librorum supellex comparata novis identidem accessionibus ditatur.

Sed etiam id singulare, æternaque memoria dignum eminenti, quo in scientias impense fertur, AUGUSTÆ NOSTRÆ studio, munificentiaque debemus, quod exteris æque, ac indigenis isto multiplicis comparandæ scientiæ beneficio uti gratis detur.

Nunc pauca de meo scribendi consilio dicam.



Ut primum gravissimum hoc munus mihi decretum erat, in id potissimum animum intendi, ut morborum popularium, eorum videlicet, qui *passim* affligunt, sive omnium horarum non observato temporum ordine ii sint, sive certas tantum anni partes ament, naturam, geniumque pervestigarem.

Etenim usu cum meo, tum & aliorum experiebar, notionem non eorum solummodo morborum, qui frequenter perniciem inferunt, sed illorum etiam, qui inter vulgatissimos, curatuque leviores a plerisque habentur, quive affligunt potius, quam enecant, nondum ita ex omni parte completam, adæquatamque esse, quemadmodum vulgo existimant, & non pauci vel ipsos inter medicos arbitrantur.

Operæ igitur non exiguum pretium me facturum existimabam, si, quæ sedula horumce morborum contemplatione, & luculenta quotidie experientia doctus in adversaria conjeci, publici nunc juris faciam, fidaque narratione, ac simplici stylo, quæ in tanto ægrotantium numero prodesse, aut etiam nocere expertus fuerim, cordate exponam.

Votorum idcirco me compotem, fortunatumque reputabo, si opella hac mea, utut tenui, ac levidensi, ad profliganda perniciosarum opinionum commenta conferre boni quid, distinctioresque morborum quorundam vulgatiorem notiones communicare, atque ab omni vana hypothesi alienus observata aliorum nondum fortasse sufficienter comprobata fidarum observationum suffragio valeam confirmare.





# E L E N C H U S.

## Brevis Descriptio

CONSTITUTIONIS ANNI 1775.

pag. 1-4.  
CONSTITUTIO ANNI 1776. . . . . 5.

JANUARIUS. . . . . ibid.

— *hujus constitutio & enumeratio morborum.* . . . . . ibid.

FEBRUARIUS. . . . . ibid.

MARTIUS. . . . . ibid.

— *Pleuritidis & Peripneumonice biliosae descriptio.* . . . . 6-22.

— *Variae Morborum successiones.* . . . . 13.

— *Rheumatismus biliosus.* . . . . 16.

— *Catarrhus biliosus.* . . . . 17.

APRILIS. . . . . 22.

— *Morborum biliosorum prosecutio, & quæ ad eorum æthiologiam & medendi methodum spectant.* . . . . 22-52.

MAJUS. . . . . 52.

— *Observationes de Morbis rheumaticis & eorum differentiis.* . . . . 55.

— *Pleuritidis rheumaticæ descriptio.* . . . . 59.

— *Canones circa usum vesicantium in Pleuritide observandi.* . . . . 65.

JUNIUS. . . . . 68.

— *Exemplum Peripneumonice veræ vitto bilioso systematis gastrici stipatæ.* . . . . ibid. seqq.

JULIUS. . . . . 73.

— *Pleuritidis occultæ descriptio.* . . . . 73.

AUGUSTUS. . . . . 76.

— *Lithotomiæ Exemplum.* . . . . 83.

SEP.

# VIII E L E N C H U S.

	pag.
SEPTEMBER.	85.
— <i>Dysenteriae curandi ratio.</i>	86.
OCTOBER.	<i>ibid.</i>
— <i>Tussis stomachicae quaedam species.</i>	87.
NOVEMBER.	90.
DECEMBER.	<i>ibid.</i>
ANACEPHALÆOSIS.	91.
SECTIONES CADAVERUM.	93.
SECTIO PRIMA.	<i>ibid.</i>
SECTIO II.	98.
SECTIO III.	99.
SECTIO IV.	101.
SECTIO V.	111.
SECTIO VI.	114.
SECTIO VII.	118.
SECTIO VIII.	123.
SECTIO IX.	126.
SECTIO X.	132.
SECTIO XI.	135.
SECTIO XII.	139.
SECTIO XIII.	146.
SECTIO XIV.	150.
SECTIO XV.	154.
SECTIO XVI.	157.
SECTIO XVII.	159.
SECTIO XVIII.	161.
SECTIO XIX.	164.
SECTIO XX.	170.

Nosocomii ad S. S. Trinitatem

NECROLOGIA ab Anno 1761. usque ad  
Annum 1776. 173. *seqq.*

B R E-



# BREVIS DESCRIPTIO CONSTITUTIONIS

A N N I 1 7 7 5.



**M**orbos populares descripturum non solum eam tempestatum rationem, quæ morbis ipsis comes est, sed etiam illam, quæ paulo ante prægressa, & integrum modo effectum sortita, certam in corpus diathesin induxit, exponere oportet. En cur ea, quæ de constitutione temporis anni proxime elapsi, varioque tempestatis ad valetudinem habitum, sparsim in adversaria conjeceram, nunc collecta, contractaque recenseam.

Mensis Januarius anni 1775 a gelu magno ordiebatur: secutæ mox nives copiosissimæ, nebulæ multæ, foetentes, noctu, mane, itemque vesperi. Venti per intervalla fortes. His haud diu stantibus repente tepor. Diffluxere nives: pluviae admodum copiosæ. Post medium mensem subitum

*Pars I.*

A

gelu,



## BREVIS DESCRIPTIO

gelu, rigidumque. Altæ nives, venti rari, exigui. Circa finem denuo tepor, nives colliquatæ, cœlum nubibus, nebulisque triste, venti tenues.

Januario ad exitum vergente convulsiva infantum tussis caput efferre cepit.

Ineunte Februario temporis proxime elapsi tepida constitutio incrementa sumpsit: nebulæ densæ, pluviae raræ, interpellante subinde validissimo vento. Post initium tepor, gelu, paucæ nives, rarus sol, pluviae, venti, nebulæ foetentes, depluentes, varia ratione per totum mensis decursum sese excipiebant, ita tamen, ut atmosphærae tepor primas teneret. Finis mensis calore verno incaluit: venti tenues.

Convulsiva infantum tussis maxime viguit, & circa mensis medium ferinas adultorum tusses in societatem adscivit.

Martius totus mutabilis, jam veri similis, jam borealis, cœlo ad initium sereno, circa finem vero nebuloso, imbrosoque. Tusses ferinae longe lateque dominabantur.

Aprilis mutabili suo genio hoc anno præter morem indulgit. Frequens subitaque caloris in frigus commutatio, cœli sereni in procellosum, imbrosum, nebulosum: venti varii, crebri. Ad medium usque Aprilem idem tussis ferinae imperium, convulsiva infantum tussi adhucdum vigente. Circa finem uterque morbus multum remisit.

Mense Majo crebra denuo mutatio ex calore in frigus: dies austrini, noctes aquilonares. Siccitas summa. Cœlum serenum, crebro, forti, varioque perflatum vento. Circa finem copiosissimæ pluviae, ventus perfrigidus, quo etiam tempore, silentibus & convulsiva, & ferina tussi, alia tussis species exorta vix ulli pepercit, quam ob signa redun-

dant.

dantis in ventriculo bilis, tum etiam ex eo, quod vomitu, aut alvi ductione cito sanaretur, *stomachicam* appellarunt, etsi fuerint, qui *pectoralem* arbitrati, neglecto ventriculo, in ægrorum perniciem pulmonibus medebantur.

Initio Junii frequens caloris frigorisque mutatio, noctibus plerumque solito frigidioribus. Post initium calores magni, constantes, cœlum serenum, siccum, rarissimæ pluvix. Exeunte mense constitutio nebulosa, humidaque successit: toto hoc mense tussis stomachica grassabatur.

Mense Julio æstus fere constans, raræque pluvix: tussis stomachica circa finem vix non penitus comprimebatur.

Mense Augusto æstus magni, squalor, rarissimæ pluvix, crebra tonitrua. Morbi pauci, sporades. Sudores nocturni copiosissimi.

Ad medium ferme Septembris calores magni. Successit dein frigus, cœlo ut plurimum sereno. Febres plures, ac præteritis mensibus, æque huic anni tempori maxime solennes, intermittentes, remittentes, item cholerae, diarrhoeæ &c. &c. non tamen præter aliorum annorum morem viscebantur.

Mensis Octoher frigidus, humidusque ut plurimum fuit, attamen pauciorum paulo morborum, quam mensis prægressus, ferax.

November continuis fere pluviis maduit. Nives exiguae, citoque diffuentes. Minus, quam pro temporis hujus ratione, frigus, præcipue circa finem.

Rheumatismi universales: destillationes topicæ variæ: aphthæ etiam inter adultos. Fœminæ debiliores præcipue, crudo primarum viarum apparatu, mucos, sero putri, laborabant.

Mense Decembri pluvix crebra, tempusque humidum, non frigidum, præcipue circa initium & finem;

#### 4 BREVIS DESCRIPTIO CONSTIT. 1775.

finem ; circa medium vero siccum , & frigidum.  
Defluxiones multæ ad oculos , nares , fauces , pul-  
mones ; artus.


Hæc fere prioris anni constitutio fuit , qua bre-  
viter delineata sequentis anni 1776 rationem de-  
scribemus.





# M. S T O L L R A T I O M E D E N D I.

P A R S P R I M A.



J A N U A R I U S,

A N N I 1776.

Sub anni 1776. exordium nives multæ fuere; inde ad medium usque Januarii constitutio aëris humida, atque minori cum frigore, quam pro temporis hujusce ratione. A 15ta mensis ad finem usque frigus sicciſſimum obtinuit, quod magis identidem intendebatur, ut ultima mensis tempora ab hominum memoria frigidissima dicerentur.

Initio mensis variolæ malignæ non paucæ, morbilli benignæ indolis non infrequentes visebantur. Febres, quæ ad medium usque mensem ferossæ fuere, circa ultimos Januarii dies, rigidissima hyeme per omnem Europam sæviente, in inflammationes pulmonum, pleuritides, ac peripneumonias abiere.

F E B R U A R I U S.

Initio Februarii idem hyemis sævissimæ rigor; at tribus, quatuorve exactis diebus successit aura mollis, humida, dominante austro, quæ per totius mensis decursum non interrupta perſistit.

Morbi pulmonum inflammatorii non pauci, plures vero ex illo genere, qui sub anni principium grassabantur.

M A R T I U S.

Mensis hic ut plurimum siccus erat, frigore, caloreque alternatim sese excipientibus, calore tamen, si omnia spectes, prævalente. Febres catarrhales innumeræ, peripneumoniarum, ac pleuritidum quæ-

dam species, quam curatius explicandam e re esse arbitror, tum, quod ea hoc anni tempore, quo Nosocomio ad sanctissimam Trinitatem præficerer, mihi frequentissime contemplanda, sanandaque, in tanto adfluentium quotidie ægrorum ex plebe numero, obvenerit, cum etiam (quæ ratio longe superior est) quod illam necdum ita adcurate descriptam, aut si descripta sit, ejus tamen curandæ methodum necdum satis in usum tractam, vulgatamque existimem, ut idcirco actum agere videar, si quædam ex mea penu depromam.

Morbus, quem paulo fufius persecuturus sum, eo etiam ex capite peculiarem attentionem meretur, quod ad illos pertineat, qui, pauco interposito tempore, frequentius recurrunt, & inter populum epidemice grassantur. Accedit præterea, quod is sub alterius morbi specie medentibus imponat, & methodo non sua persæpe tractetur.

*Ægri hac pleuritidis, aut peripneumoniæ specie* laborantes varia symptomata exhibuere: præcesserat per aliquot dies, quin & septimanas catarrhosa dispositio, dejectus appetitus, os insipidum, amarum, glutinosum, sudores nocturni: tandem accessit horripilatio, quin & intensius frigus, minus tamen grave, quam in vera alias pulmonum inflammatione solet; successit æstus, oppressio pectoris, dolor vel in sterno, vel in alterutro latere thoracis ardens. Ardor hic subinde totum thoracem occupavit, & inter respirandum, tussendumque raro augebatur. Decubitus facilis in utrumque latus: hypochondria frequenter tensa, dolentia, præcipue dum manu contractarentur. Dolor ad scrobiculum, & infra illud gravans, qui attractum ægre ferebat. Ructus amari, alvus aut obstructa, aut liquidior, ac biliosa. Facies cum virore pallida. Oculi tristes. Dolor capitis gravativus. Sitis sæpe nulla, & si tamen aliqua,

qua, minor tamen, quam pro morbi acuti ratione. Sapor oris amarus ut plurimum, in aliquibus nauseose dulcis, vel & acidus, austerus. Lingua alba subinde, mucosaeque, plerumque tamen flavo virescente humore obducta, & prominentibus quasi villis flava viridique materia tinctis hirsuta. Dentes sordidi. Tumor ventriculi, & sensus plenitudinis in eodem. Anxietas circa praecordia. Tormina subinde. Lumborum dolor. Sputa glutinosa, crassa, tenacia, alba, in paucis vere virescentia, eaque statim initio apparuere, quin & praecessere. Urinae croceae, brevi jumentosae cum sedimento imperfecte deposito, furfuraceo, albo, lateritio, mixtoque: tales fuere statim ab initio morbi. Vomitus quibusdam spontanei, levantes, biliosi. Vomituritiones. Copiosus insipidae salivae in fauces affluxus, nausea, qua factum, ut ne aspectum quidem alimentorum ferrent. Pulsus ut plurimum non durus, & varia in variis celeritate.

Febris vel uno tenore continuabatur, vel vaga periodo exacerbabatur, absque certa lege, modoque.

Inter omnia haec symptomata nullum erat, de quo magis querebantur, quam ardor in thorace, oppressio ejusdem, & spiritus difficultas. Fuerunt, qui solummodo de angusta respiratione, & valida pectoris oppressione questi sunt.

Haec symptomata erant pleuritidis istius, aut peripneumoniae (quam *biliosam* appellamus) ubi morbus cum nullo alio malo complicabatur. Paucissimi tamen inventi sunt, in quibus omnes omnino superius recensitas morbi notas deprehenderes. Plerique paucis tantummodo characteribus mali, quo laborabant, indolem demonstrarunt. Constans in omnibus nota fuit, praeter memoratos pectoris, respirationisque affectus, lingua, & oris sapor varia ratione depravatus, prout supra descripsi. Nauseae, &

appetitus deperditus omnibus fuere, non omnes tamen biliosa, aut aliena ructabant. Cardialgiam omnes querebantur, gravantem plerique, pauci oris ventriculi morsum: quidam autem, nonnisi manu contractarentur, molestiæ quid circa ventriculum sensere.

Exeunte Martio, & per totum ferme Aprilem plures erant, quibus alia præter paulo ante enarrata accidentia accessere, dolores videlicet artuum inferiorum, superiorumque, item loci inter scapulas medii. Quibusdam carnes doluere inter articulos locatæ, his non affectis. Aliis articulorum rigiditas dolorifica fuit, non paucis mollitudo hypochondrii alterutrius doluit, dolore non gravante, non tensivo, sed acutissimo, ad inspirationes magnopere aucto, & tactum minime ferente. In his pleuritidi aut peripneumoniæ *biliosæ* rheumatismus jungebatur.

Hoc tempore, mense videlicet ad exitum vergente, quibusdam, iisque non paucis, præter superius dicta symptomata, dolor vere *pungens*, acutissimusque, & sitis morbo respondens fuit, pulsus durus, & plenus, sputa aut nulla, aut sanguine striata. Hos, præter morbum biliosum, vera quoque pulmonum inflammatio tenuit.

Paucissimi in morbi principio ad nos devenere, plerique exactis aliquot primis diebus, ubi aut nihil omnino, quod sæpius contigerat, aut quod fors, vel consilium obtulit, remedium adhibuere. Multi unam duasve etiam sanguinis missiones instituerunt eo eventu, ut *post momentaneum, brevique evanidum levamen* omnia symptomata exasperarentur, & pectoris incommoda longe graviora redderentur cum pulsu celeriori, humili, repente, anxietatibus magnis, & calore intensiore. A purgantibus, si fors usi erant, aut nihil, quod frequenter accidit, aut parum tantum emolumenti retulerunt, plerique pejus habuerunt, & magis febricitarunt.

Hæc



Hæc fere fuit morbi facies, quem tuto, ac brevi ut plurimum methodo mox describenda curavimus. Ubi facto examine constitit, morbum nulla vera inflammatione complicari, qualis plerumque fuit, curam ab emetico inchoavimus, quo copiosissima materies flava, plerumque viridissima ore rejecta est: alvus simul fere omnibus movebatur aliquoties. Apparatus hic biliosus vomitu excussus, amarissimus plerumque, subinde vero acido-austerus fuit. Ferme omnibus paulo post vomitum oppressio pectoris insigniter imminuebatur: quibusdam etiam prorsus evanuit, respiratio liberior, & ablata, vel plurimum emendata ventriculi incommoda sunt. Nulli certe emeticum propinavimus (& propinabamus longe plurimis) qui non cum insigni levamine vomuisset. Non pauci, qui dolores acutos in hypochondrio alterutro ad attactum auctos querebantur, dato emetico liberabantur, ut adeo non omnis dolor acutus ad attactum auctus pro inflammatorio haberi debeat. A vomitu, atque etiam ante eundem decocto hordei cum oxymelle utebamur ad abluendas ventriculi, & intestinorum sordes, atque operam dabamus, ut alvus post vomitum aperta diutius servaretur. Hunc in finem data est mixtura ex aqua hordei, aceto, melle, & sale quodam medio, ut biliosæ reliquiæ, quæ intestinis fors profundius infederant, quam ut vomitu rejici quiverint, medicamento salino solutæ per alvum everrerentur. Si hæc cautela neglecta fuerat, contigit, ut biduo exacto, aut eadem redirent symptomata, aut morbus intermittente exciperetur, eaque potissimum tertiana, quam salibus mediis præmissis, cortice peruviano profligavimus. Fuere quidem, sed in tanto reliquorum numero perpauci, qui etsi cum effectu vomuerant, & magnam sordium biliosarum vim ore & ano ejecerant, id tamen levaminis non experiebant.

riebantur, ut expectationi nostræ plane satisfaceret. Signum id erat, materiam crudam, necdum sat mobilem redditam, parietibus ventriculi valentius adhærere. His mulsa cum aceto, ac sale quodam, per unum alterumve diem exhibito, denuo potionem emeticam propinavimus, quæ ferme semper suffecit; vix una alterave vice terno vomitorio, interpositis aliquot diebus, exhibito opus fuit.

Aliis hac methodo sanatis, cum & appeterent, & febre carerent, quædam spirandi difficultas remanebat, quam mixtura ex aqua fœniculi, oxymelle squillitico, & stibio diaphoretico non abluto sustulimus, motis hac ratione sputis copiosis, aquosis; paucis kermetem præscripsimus, pluribus ejusdem loco refractam admodum tartari emetici dosin in aqua quadam conveniente solutam, qua de re alibi erit commodior differendi occasio.

Cum observatio nos doceret, ægros ex hoc morbo reconvalescentes facillime relapsum pati, præcipue, si paulo plenius, quam debilis ventriculus ferret, nutrirentur, cavimus, ne in regulas diæteticas peccaretur, atque stomachicorum remediorum ope vires coctrices, quas morbus, atque ipsa morbi medicatio fregerant, firmavimus. Uti sumus maximam partem elixirio stomachico temperato, & tinctura rhei aquosa, æquis partibus, ni fors febris intermittebat, quam morbo coronidem non raro imposuisse superius diximus, corticem peruvianum una exposceret.

Semper cavebamus, ne, non hos solum, sed neque cæteros quoscunque ex Nosocomio dimitteremus, priusquam ex integro pristinum robur recuperassent. Hinc eos paulo diutius, quam adversa ipsorum valetudo exigere videbatur, retinuimus, imperfectum tantummodo, aut fere nullum beneficium rati, si, quos morbus acutus non sustulit, longa in-

firmitas consumeret. Hac methodo usi sumus, quoticunque morbus simplex, ac nullo alio permixtus fuerat. Perpendere nunc juvat ea, quæ nocuisse deprehensa sunt, cum non a juvantibus solum, sed quam maxime etiam a nocentibus instruamur.

Sanguinis missio præ cæteris nocuit, nisi fors inflammatio comes esset, quo de casu infra erit dicendi locus; hac enim instituta pectus opprimi validius, spiritus difficilius trahi, pulsus fieri humilis, ceterque cœpit, caloribus supra modum adauctis. Puella 14. annorum hujus rei documento nobis fuit: laboraverat hæc, paucis septimanis antea, vera pleuritide; sanata e Nosocomio discessit, at post carnes intemperantius comestæ riguit, æstuavit, vomuitque aliquoties biliosa. Altero mox die ad nos delata iussim, pectoris gravitatem, & spiritum summo opere difficilem conquesta est. Præter peripneumonias hæcæ affectiones aderant oris amaror, ructus, nausææ, cardialgia, febris multa. Præscriptum vomitorium est, cui, ut tutius operaretur, modicam venæ sectionem præmittere placuit. Verum, misso vix sanguine, delirium ferox, & febris valida sequebantur. Dato emetico, multisque biliosis vomitu rejectis, mens rediit mox, & affecti pectoris symptomata una cum febre multum mitiora, continuato salium mediorum usu, & reliquiis morbi ad alvum determinatis, paulo post penitus abstergebantur. En *Delirium biliosum*, ubi fomes in hypochondriis latet, ore & ano exturbandus.

Non pauci ad nos venerant, qui, aut proprio Marte, aut amicorum, ut fit, consilio, morbum medicamento purgante sollicitarunt: nocuit ferme omnibus; exacerbationes enim graviores inde redditæ, aucta thoracis incommoda, febrisque sunt: profuere paucissimis, atque iis fortasse, qui crudo apparatu non ventriculi, sed intestinorum laborabant,



bant, ubi materies mobilis facta, facilius pharmaco purganti, quam vomitorio auscultabat.

Qui morbum motis sudoribus aggressus fuisset, neminem scio, etsi facile quis perspiciat, quantum noxæ prava hæc methodus intulisset. Opinio, quæ febres acutas sudoriferis pernicioso plerumque cum eventu tractat, magnam partem inter nostros, etiam eos, qui ex plebe sunt, eviluit.

Contigit non raro, ut motu febrili a collecta re-  
forptaque primarum viarum saburra producto, sanguis inflammaretur. Sic vera insuper inflammatio jungebatur, vel pulmonum, vel carniū musculosarum, vel membranarum, tendinumque in articulis præcipue. Ortum hinc est malum complicatum vera scilicet vel pleuritis, vel peripneumonia, vel rheumatismus, vel arthritis morbo bilioso sociata, quam ob causam sæpius unam, rarius duas sanguinis missiones instituere oportebat, donec discussa phlogosi emeticum daretur; quibusdam, & forte pluribus, licet sanguis extractus ferme semper crustam pleuriticam exhiberet, veraque simul inflammatio adesset, cum exiguo tamen, eoque brevi evanido levamine secta vena est, fors, quod inflammatio secundario primum nata tolli non posset, nisi prius cruda materies sub præcordiis collecta, a qua motus humorum citatior, eorumque phlogosis oriretur, brevissima, qua id fieri potest, via ejiceretur. At repurgato systemate gastrico, sive phlogosis perseveraret, sive etiam augeretur, sanguinis detractio insignem effectum, & levamen constans attulit. Subinde venæ sectiones, & emeses alternabant, prout vel inflammatio, vel affectio biliosa prævalebant. Non observavimus, statâ periodo, & certo dierum numero hos ægros judicari, nec peculiari crisi obnoxii erant; id solum observatum, sputa, quæ initio statim apparuere, fuisse primum glutinosa, tenacia, dein

dein aquosa, copiosaque ad finem morbi usque, quo sensim cum levamine minuebantur. Nunquam vidimus sputa illa *puriformia*, *costaque*, qualia maturum catarrhum, aut inflammatos pulmones solvere solent. Quidam intra octo dies sanabantur, quidam vero intra septemdecim, vel & viginti.

Vidimus & varias morborum successiones, mutationesque: quidam enim ex pleuritide simplici biliosa jam sanati, aut tales propemodum futuri in *veram ac inflammatoriam pleuritidem* inciderant, ubi venæ sectiones, & decoctum hordei cum melle, atque aceto fere semper suffecere. Cataplasmata emollientia ad locum doloris applicuimus bono cum successu. Lateri dolenti nunquam apposuimus vesicans, cumque eo in morbis vere inflammatoriis aliquoties uteremur, semper febris incitabatur magis, inflammatio augebatur, atque in universum eum canonem secuti sumus, ut, ubi diluendum esset, ubi laxandæ partes solidæ, earumque stricturæ solvendæ, ubi frenandus humorum exorbitantium motus, a vesicantium stimulo caveremus; hinc factum est, ut sanguinis missio, remediorum refrigerantium facile princeps, inflammanti cantharidum vi rarissime jungeretur. In rheumate vero, ut in inflammatorio, & febrili, præsentem cantharidum opem sæpissime mirabamur. Sed ea de re paulo post. Eximium e contrario auxilium vesicantia præstitere, quotiescunque *vera debilitas*, solidorum inertia, indeque natæ stases aderant, quo in casu præter remedia cardiaca, roborantia, stimulantia, antiseptica, excitantem vesicantium stimulum in subsidium vocavimus. In vera pulmonum inflammatione abstinuimus pariter ab intempestivo, præmaturoque remediorum sputa moventium usu, qualia in stibio diaphoretico non abluto, aliisque Antimonii præparatis habemus. Sedulo distinguebamus duplicem pulmonicorum statum, eum

vide.

videlicet, ubi cruda inflammatio remedium quodcunque movens vetaret, atque cum, ubi fracta phlogosi, vires ægrorum tum ex morbi diuturnitate, cum & remediorum debilitantium applicatione languerant, & materies sputorum in pectore coacervata a dejectis vitæ viribus protrudi non poterat: hic moventia, incitantiaque profuere, præcipue stibium diaphoreticum non ablutum, & solutio tartari emetici ea dosi exhibita, ut nec vomitum, nec alvum moveret. Plerique pleuritici judicabantur sputis mucosis, aquosis, & intermixtis coctis. Vidimus paucas quasdam pulmonum inflammationes, easque pergraves post novem aut undecim dies, absque manifesta evacuatione, cum constantia ac securitate solutas.

Aliquoties vero pleuritis in principio diarrhœam sibi junctam habuit: hæc, ut ut symptomatica fuerit, nihilominus morbum reddidit magis tolerabilem, ut adeo non omnis diarrhœa symptomatica pleuriticeis periculosa habeatur. Credo apparatus crudum in intestinis stabulantem vehementiori illo paraxysmo, quo pleuritis plerumque orditur, emotum ad alvum ruisse, molimine naturæ perquam salutari. Fuerunt etiam, qui in gravi illo assultu pleuritidem inchoante, biliosa cum emolumento vomuerunt.

Una, alterave vice, in gravissima pulmonum inflammatione pulsum mollem, debilem, celeremque apprehendi, ubi nihilominus venæ sectio insigni levamen attulit, sanguine crassam tenacemque crustam exhibente, & pulsu paulo post assurgente, plenioreque.

Puellæ secundo pleuritidis die orta parotis morbum sustulit, quam dein, cum alvum quotidie fluentem redderemus, & herbæ aromaticæ cum camphora tumenti loco apponerentur, insigniter minuebamus. Pertinacis tumoris reliquias emplastrum de cicuta penitus dispulit.



Qui initio vera pulmonum inflammatione eaque, quam Sydenhamus *essentialem* appellavit, ac simplici laborarunt, rarissime in eundem morbum relapsi sunt, aliquoties autem in pleuritidem illam spuriam, biliosam, quam dato statim emetico in herba suffocavimus.

Aliam morborum successionem observavimus, ubi *biliosa* pleuritis in *malignam* vertebatur. Malignam nos vocabamus illam ægrorum conditionem, ubi vis vitæ admodum dejecta, pulsu arteriarum & cordis vere debili proderetur. Si evacuatio sanguinis aut ab ægroto ipsomet, priusquam ad nos veniret, aut & nobis imperantibus instituta male cesserat, sique materies ex primis viis intra humores circulantes reciperetur, si, licet multa affecti systematis gastrici signa adessent, emeticum nihilominus non conduxerat, si pulsus accesserant celeres, debiles, quosve vel levissime premens digitus facillime elideret, si mens vacillaret, & vires secrete trices languerent, *malignitatem* adesse, & letalem partium solidarum, fluidarumque dissolutionem instare judicabamus.

Malo præcipiti inventum præsidium est in decocto corticis cum camphora, in infuso radicis serpentariæ virginianæ, contrajervæ, angelicæ: hic quoque in subsidium vocata vesicantia sunt, quæ torpidam languentis vitæ vim concitarent, atque id facerent artubus adplicata, quod cardiaca ore assumpta. Miros certe effectus ex hac medendi methodo vidimus. At in perpaucis hic *pleuritidis biliosæ* in *malignam* transitus observabatur, atque in iis potissimum, qui ex longa infirmitate, aut hæreditario vitio debilitatem adferebant utrique huic morbo idoneam.

Id adhuc notasse expedit, nos sanguini emisso, atque in vasculis ad id aptis servato, sive is dissolutior appareret, sive compactior, sive crusta tegetetur, aut etiam ea careret, rei utpote supra modum fallaci,

ci, parum tribuisse, etsi non inficias eamus, sanguinem, prout is sub sensus cadit, confirmare nostrum iudicium subinde posse, quod ex notis multo certioribus de morbi conditione ferebamus.

Hac tempestate Rheumatismi febriles grassabantur, qui vel inflammatorii, vel biliosi fuere, vel ex utrisque componebantur. Habuimus quosdam, qui acute laborabant absque signis sordium primas vias inquinantium. His sitis multa, febris valida cum pulsu duro, qualis pleuriticorum esse solet, manuum, genuumque tumores dolentissimi fuere: dolor vago more artus extremos, malleolos, genua, femur externum a lumbis, vel ab acetabulo ad caput fibulæ usque oberrabat, modo etiam musculos thoracis affecit, ut ideo pleuritidem mentiretur. Quibusdam dolor anginosus accessit. Venæ sectiones, emulsa cum nitro profuere, decoctum radicum altheæ cum Roob sambuci, itemque vesicantia, atque omnia ea, quæ aut alvum, aut sudores blande sollicitabant. At pertinax admodum nonnunquam morbus difficillime vel indicatissimis remediis cessit, & tunc in longum protrahebatur: sanguis secta vena eductus crusta pleuritica maxime crassa, tenaci-que obtegebatur.

Feliciores fuere illi, quibus acris & biliosa materies maximam partem ex ventriculo resorpta, & ad corporis superficiem delata in vasculorum exhalantium orificiis hæsit, ibique vellicando dolores rheumaticos concitavit. His emeticum profuit, cui medicamentum salinum, ad alvum laxiorem servandam, subjungebatur. Quod si quid altius impactum hæreret, quam ut recensita hac methodo revocari ad alvum denuo posset, frictione aromatica instituta, aut vesicante facile discussum est. Profuere etiam repurgatis ventriculo & intestinis medicamenta sudorem absque tumultu moventia.

Qui

Qui *rheumatismo hoc bilioso* laborabant, mitius ut plurimum habuerunt, minus febricitarunt, nec semper emetico indigebant. Decoctum tamarindorum, aliaque hujus notæ medicamina, juncto quodam sale medio, expectationi medentis per sæpe satisfecerunt. Hanc rheumatismi speciem aliis annis, atque alio anni tempore, præcipue cum in Hungaria medicinam facerem, frequentissime observavi. Adulta enim æstate, atque initio autumnii, quo morbi gastrici biliosi dominium obtinent, *rheumatismus biliosus* frequentissimus est, in iis præcipue, qui ex morbo bilioso convalescere, si forte durante morbo aut nulla, aut non sufficiens per vomitum, atque alvum biliosæ saburræ evacuatio fuerat instituta. Post dysenteriam biliosam adstringentibus opiatisque præmature sublata, post febres autumnales præcoci corticis usu sufflaminate, præcipue vero, si intempestivis sudoribus materies versus corporis superficiem fuerat determinata, frequentissimos vidi rheumaticos dolores diuturnos & plerumque absque febre. Solventia, alvum leniter ducentia, frictiones, omniaque ea, quæ materiam hærentem in motum agunt, balnea mineralia, succi herbarum antiscorbuticarum, gummi ferulacea omnem paginam absolvebant.

Sed, missis his, biliosas nostras pectoris affectiones ulterius prosequamur. Plurimi fuere, quibus res intra catarrhum constitit, qui a *peripneumonia*, aut *pleuritide biliosa* sola mali vehementia differebat, & hanc plerumque præcedebat. Eadem medendi methodus utrobique profuit. Hæc catarrhi species sæpius *ἐπίπνοιας* aggreditur, hocque anno, uti & vere anni proxime elapsi totam ferme Europam pervasit. Hoc morbi genus anno 1580. universam Europam infestabat, atque pro novo morbo habebatur, quod remediis catarrho alias dicatis aut omnino non cederet,



aut etiam exasperaretur, atque non paucis funestus evaderet.

Descriptionem ejusdem habemus a Boekelio factam, qui cum *novum morbum*, seu *catarrhum febrilem* salutavit. Eundem fuisse, qui & prioris anni ver, partemque æstatis, & hujus anni Martium & Aprilem præprimis occuparat, descripta a Boekelio symptomata luculenter ostendunt, quamvis a vera medendi ratione, quam sibi hæc catarrhi species peculiariter deposcit, illius temporis medici aberrarint. Id solummodo discriminis intercessit, quod ille a Boekelio descriptus multos enecaret, noster vero ut plurimum vitæ parceret. Rationem credo eam fuisse, quod catarrhus Boekelii febrilis ab ipso, quo grassabatur, anni tempore vitium traxerit, adulta videlicet ætate, & autumno, quo cælum gravius esse solet, & morbis quibuscunque in eandem tempestatem incidentibus septici quid, malignique affricat. Præterea novus hic Boekelii morbus cum pluribus aliis complicabatur, qui illam anni partem communiter comitantur. At venæ sectio raro profuit, quemadmodum etiam apud nos plerumque morbus majora inde incrementa sumpsit, & in malignum mutabatur: eo quoque tempore omnes reliqui morbi plus malignitatis habuerunt, & pluribus, quam alias solent, funesti evaserunt.

Quoniam hoc loco de catarrhi quodam genere, quod a sordibus systematis gastrici originem ducit, sermo incidit, juvabit quædam addere de illa catarrhi specie, quæ prioris anni ver & initium æstatis maculavit. Mense Junio anni 1775. catarrhus populariter per omnem ferme Europam grassabatur. Aderat inappetentia, lassitudo, os amarum, aut insipidum, lingua alba, mucosa, flava, dolor ad scrobiculum, si manu contrectares. Tumor ventriculi, hypochondriorum tensio, alvus aut tarda, aut frequentioribus,

bus, iisque exiguis ac biliosis dejectionibus molesta. Urina crocea, subinde cum ardore missa, parca, cum sedimento ex albo-rubente, fursuraceo, mucoso, lateritio. Nauseæ fere omnibus, vomitiones, tussis multa, ardor sterni, oppressio. Variam medendi rationem experti sumus, prout diversam sibi quisque ideam de ejus mali indole finxerat. At profuere lenia solventia, salina, alvum moventia. Quidam kermes minerale dedit, qui præter voluntatem vomitum movit, & ejectionis ventriculi for-  
dibus catarrhum absterfit. Verum cum hoc medelæ genus in hac mali specie inusitatum non ægrotis solum, sed ipsis quoque medentibus videatur, atque ab ratione, aut potius ab eorum systemate absolum, fit, ut una omnibus catarrhis plerumque methodus accommodetur, sed eventu utique longe dispari. Nihilominus sat frequens hic morbus est, atque inter eos stipendia meretur, qui sæpius ingruunt.

Clarissimus Huxham describit morbum maxime epidemicum mense Januario anni 1733. cum tussi valida, qui per omnia ferme accessit ad indolem catarrhi anno priori dominantis; profuere enim apud eundem cl. auctorem nonnunquam emetica, aut lenia cathartica, atque frequenter observavit, tussim, oborta diarrhæa, profligari. Hinc rheo, manna, & tartaro solubili usus est. Idem febrem catarrhalem epidemicam observavit mense Novembri 1737. aitque, hanc febrem per plures jam hyemes magis, minusque grassatam esse, provenireque a crasso, udo, gelidoque aëre spiracula cutis occludente, & eandem videri indolem habere cum febre *hyemali* Sydenhami. Arbitror, epidemias has ab Huxhamo descriptas easdem quidem reapse eum hac nostra fuisse, propius tamen ad humorum phlogosin accessisse.

Petrus Forestus L. VI. obs. I. describit febrem autumnno anni 1557. publice grassantem, gutturi

dolore, & thoracis affectu stipatam : catarrhi instar morbus invaserat, cum febre admodum lenta, sed maligna, multisque necem inferente, quæ postmodum aucta subitaneam quasi suffocationem, & respirandi difficultatem intulit, ut ægri statim suffocari viderentur. Inde etiam ventriculus, & præcordia laborabant, tussis fuit valida, febris quibusdam continua, plerisque tertianæ duplices, quotidianæ, erraticæ fuere. Quibusdam & oris, ac linguæ ulcuscula morbo profecto oriebantur. Hujus morbi fomitem intra præcordia, atque intestina conclusum fuisse testantur multa, præprimis vero, quod pectoris oppressionem, & gravia ventriculi incommoda, & sæpe intermittens febris comitarentur, quodve & eccoprotica sanarent, & contumax, longave ventriculi imbecillitas, curata febre, reconvalescentes affligeret, *cum hujusmodi accidentibus*, ait Forestus, *quæ in melancholia hypochondriaca adesse solent*. Idem cl. auctor L. cit. in scholio ad observ.

II. describit anginæ malignæ, pestiferæque speciem symptomatibus peripneumoniacis junctam, quæ tempore Joannis Tyengii, Amstelodamensis Medici circa principium anni 1517. quam, plurimis mortalibus adeo perniciofa fuit, ut, quibus intra sex, septemve horas apta remedia non adhibebantur, ante 16tam, vel 20tam horam subito morerentur. *Erat materia in illo morbo populari*, ita Forestus loco citato asserit, *ita furiosa, ut uno momento tantam anhelitus difficultatem, cordisque angustiam & dolorem in collo pareret, ut ægrotus strangulari mox videretur*. Quibus symptomatibus rursus cessantibus, moxque redeuntibus, cum materia adeo maligna, venenosa, & fluxa per musculos colli, tum pectoris uno ictu trajiceretur, omnes facillime curabantur, secta quam primum vena, ante sex horas a morbi invasione, & si eodem die medicamentum purgans propinaretur, licet id alienum foret a sententia

omnium



*omnium medicorum illustrium. Quibus hæc primo die non adhibebantur, subito suffocabantur.*

Morbum adeo gravem, citoque perimentem materies generasse videtur copiosa, mobilisque, quæ ventriculum, intestina, partesque ventriculo vicinas, aut cum eodem, ac intestinis communicantes imprimis occuparat, quo tamen denuo, præmissa sanguinis missione, dato purgante pharmaco, cito ac facile revocari, atque alvo eliminari poterat.

Libro eodem observatione 3tia catarrhi describuntur anno 1580. mensibus Junio & Julio epidemice ac catervatim grassantes, una cum febre admodum copiosa in fauces, guttur, ac pulmonem irruente cum vocis raucedine, & tussi valida, qui præmissa ad paucas uncias sanguinis detractioe medicamentis leniter alvum moventibus curabantur.

Sed ad nostra redeamus. Etsi plerumque pectus afficiebatur, ea ratione, quam hucusque narravimus; erant tamen aliqui, qui febre continua remittente laborabant. Ea triplicis generis fuerat, vel inflammatoria, quin aliquid biliosi mixtum fuerit, vel biliosa absque comitante phlogosi, vel denique composita ex utroque affectu. Rarissime vitium erat in solo sanguinis inflammatorio statu, quin non etiam aliquid vitiosæ materiæ in systemate gastrico hæreret. Raro quoque in hisce febribus continuis remittentibus accusandæ erant solæ primarum viarum ac ventriculi præcipue sordes: morbus ex utroque vitio coaluit, bile videlicet præcordia gravante, & sanguinis phlogosi, sed sic, ut pro varia corporum ratione modo illa dominium obtineret, modo hæc.

Hinc varia quoque methodo pugnatum fuit, quæ tamen omnis intra emeticum, & sanguinis missionem constitit, potuque diluente, mulso, ita, ut modo emeticum venæ sectioni, modo hæc illi præmitteretur pro ratione prævalentis vitii.

Cortice peruviano rarius usi sumus, nisi continua remittens in perfectam intermittentem fatisceret, quæ corpore licet repurgato, nihilominus persisteret, & virium debilitate aleretur. Securius tunc cortex dabatur, nec tam facilis erat in febrem relapsus, rejecto dudum mali fomite.

### A P R I L I S.

Mensis Aprilis ad medium usque frigidus, humidusque fuit, cui tempus successit serenum, ventosumque ad finem usque, manente frigore.

Pleuritides, & peripneumoniæ biliosæ fuere paucissimæ, paulo plures bilioso-inflammatoriæ; frequentissimæ vero illæ, quæ dolores rheumaticos artuum sibi junctos habuerunt.

Multa restant, ad biliosos illos, spuriosque pectoris morbos pertinentia, quæ hic commodissimum sibi locum inveniunt.

Nomine pleuritidis, ac peripneumoniæ biliosæ aliud recentiores intelligunt, quam veteres, qui crustam sanguinis phlogisticam ex albo flavescentem *bilem*, morbosque inde oriundos *biliosos* appellarunt.

Nos crudum, plerumque amarescentem apparatus in ventriculo, & ejus vicinia collectum, *bilem* vocamus, cujus sapor plerumque amarus est, subinde acidus, & austero-acidus, quin & dulcis, sed dulcedine perquam nauseosa. Rarius fors a vera sic dicta bile copiosius collecta, originem trahit, & potius cruda undecunque nata colluvies est, quæ in convenientem sibi corruptionem, ob languentem ventriculi facultatem, vel nimia ipsius humoris in corruptionem proclivitate, transmigrat, ut hinc modo acidæ, modo austere appareat, prout eadem materies sibi relicta modo hanc, modo illam mutationem, etiam extra ventriculum, subiisset. Colorem, & saporem amarum per sepe a bile mutuatur.

Crudum ventriculi apparatus, cumque acidissimum, austero-acidum, fauces exurentem, & quasi acidum vitriolicum spirantem, ac dentes stupefacientem sæpissime in febribus quibuscunque æstate adulta, & autumnno inter Hungaros observavi, quin & non raro in memet ipso expertus sum. Hinc credo natam esse illam opinionem, quæ bilem *acidam* esse statuit, & morbis biliosis antacida opposuit; bilem enim appellitabant sordes illas acidissimas, bilis colorem, quo tingebantur, solummodo referentes.

Tempore verno colluviem hanc bili magis analogam, & ut plurimum amaram observavimus: ea hoc anni tempore raro crassa, tenaxque fuit, sed diluta, mobilis, & ut vomitu, absque præmisso solvente potu, & levi negotio ejici quiverit, quam maxime idonea: id quod tempore æstivo & autumnali rarius accidit, ubi bilis tenax crassaque ventriculo firmissime adhæret, ut, nisi solvens medicamentum, per unum alterumve diem propinatum, materiam in primis viis collectam diluat, mobilioremque reddat, emeticum subsequens vix ullum effectum, aut saltem vix ullum levamen producat.

Origo fordium harum, systema gastricum gravantium, varia esse potest: imo, alimenta difficilius subigenda, præcipue autem pingua, quæ in loco calido, humidoque, qualis ventriculus est, cito rancescunt, &, si acidis jungantur, in pessimam acrimoniæ corrosivæ, urentisque speciem abeunt. Hinc enim est, quod lardum, cui quis vinum superbiberit, longe citius & gravius vitium in ventriculo contrahat, quam si eundem cibum aquæ potor comederit.

Defectus fructuum horæorum, & universim vegetabilium recentium, ad hujus crudi in ventriculo apparatus genesis, suam quoque symbolam confert, quin & materies perspirabilis ad partes internas re-

jecta eandem saburram vel auget, vel commovet.

Biliosa hæc colluvies genuina æstatis jam adultæ, & autumnii soboles est, experientia, & Hippocrate teste, qui L. de natura hominis ait: *bilis autem per æstatem, & autumnum corpus possidet, id quod inde cognoscere potes, quod homines sua sponte hoc tempore bilem vomunt, & in medicamentorum potionibus biliofiora purgantur. Manifestum fit, & febribus & hominum caloribus.*

Quamvis morbi biliosi hoc, quo paulo ante diximus, tempore quotannis nascantur, dantur nihilominus constitutiones quædam, in aliud anni tempus incidentes, quæ eorundem morborum genesi favent, id quod hujus anni tempore verno *ἐκίνατος* experiebamur.

Id discriminis inter morbos biliosos veris, & adultæ æstatis observatur, quod illi sæpe phlogisticum quid sibi junctum habeant, aut, excussis licet sordibus, in inflammatorios migrent, rarius in malignos; hi vero, quos æstas, & autumnus gignit, septica quid malignique ferant, aut in malignos facillime mutantur. Major præterea est materiæ, ventriculorum, & intestina obsidentis mobilitas, fluiditasque vere, quam autumno.

Diversissimi specie morbi, morborumque symptomata, a materia aliena in hypochondriis stabulante producuntur, quorum nonnulla percurrere juvat, ut, quibus notis hi morbi detecti, atque ab aliis, quamdam cum iis analogiam referentibus distincti fuerint, quæ etiam methodo usi fuerimus, palam fiat.

Dolor capitis *biliosus* omnes fere morbos biliosos comitatur, gravissimus sæpe est, quasi caput dissiliret, quod æger manibus vel suis, vel adstantium valide compressum minus dolere putat, idque leni-

minis



minis efflagitat. Dolor hic modo occipit, subinde frontem, non raro totum etiam caput atrociter affligit, statasque periodos, quibus acrius instat, observat. Subinde adest faciei rubor, oculorum quasi scintillatio, sed plerumque faciei color  $\chi\lambda\omega\rho\sigma$ , id est, cum virore pallidus, qui & album oculorum inficit. Lingua, fauces, ructus, pondus ventriculi, dolorque ejus, si contrectetur; hypochondria tensa, elevata, dolentia, dolore acuto, gravante; borborygmi, flatus; levis, & sponte orta diarrhæa, materiam alienam circa præcordia hospitantem, & omnium malorum originem aperte loquuntur. His si alvum purgavimus, raro quid boni obtinebamus.

Morbus increvit pedetentim, & sero tandem aut mortui sunt, aut non nisi difficillimi convaluerunt. At si vena secta fuerat, omnia mox ab educto sanguine in pejus ruebant: solum emetico-catharticum profuit, & constans plerumque, ac insigne levamen attulit. Vidimus quosdam a missione sanguinis mox delirare, quibus emeticum sanam denuo mentem restituit. Vidimus affectus soporosos, incipientem opisthotonum, resolutionem muscutorum faciei ex uno latere, balburiam emeto-catharsi sublatam, & cito secutos effectus mirabamur.

In mentem tunc venerat illud Hippocratis in coacis prænotationibus, scilicet, *in febre continua* (a posteriori constat, de *biliosa* mentionem fieri) *quicunque voce destituti jacentes, oculis conniventes, nutant, bi, si postquam sanguis ipsis ex naribus fluxit, & ubi vomuerint, loquantur, & ad se ipsos redeant, servantur,*

Sanguinis fluxum per nares Hippocrates requirit, ut facilius moveantur humores, & ipse vomendi conatus innoxius esset, non ab illo sanguinis per nares fluxu, sed a vomitu morbi solutionem exspectans. Hoc naturæ conamen & nos subinde imitabamur, &

pauillum sanguinis detraximus, ut æger minori cum periculo vomeret: attamen maximam partem hac cautela opus non erat.

Recordabamur etiam illius, quod Galenus L. 5. comment. aph. 1. de juvene narrat, qui æruginem vomuerat: inter vomendum totum corpus convellebatur, & æruginē evacuata, febris statim, ac convulsio cessavit.

En historiam hucusque dicta confirmantem: vir 39 annorum, cellæ vinariæ curator, die pascha præcedente frigit, caluitque alternatim per octo continuos dies, quin tamen decumberet: tandem per gradus scalæ decidit, ut dorsum, & occiput graviter allideret: accessit dolor capitis, dorsi, lumborum, vomitus biliosus cum pauillo sanguinis: secta dein vena melius habuit. Verum paulo post rediit dolor capitis adeo gravis, ut ad Nosocomium F. F. misericordiæ transferretur. Dato ibi emetico bene habuit. Digressus inde per aliquot dies commode valuit, verum, exactis octo diebus, rediit idem capitis dolor cum tinnitu, susurro, & quadam sensuum confusione. Accessit respiratio læsa, sputa mucosa, viridia, lingua biliosa, oris sapor non raro amarus, nulli ructus. Molesta cardialgia, hypochondriorum, & abdominis totius tensio, alvus difficilis, pulsus celer, plenus, non durus. Vesicans ad nucham ponebatur, aliaque simul adhibebantur, quæ ex usu esse videbantur. Animus erat locum vesicante erosum diu apertum servare. Secta denuo vena est: sanguis cum crusta phlogistica. Omnis nostra cogitatio potius in lapsum, quem passus erat, etsi nihil a chirurgo detegi poterat, quam in saburram primarum viarum conversa erat. Elapso biduo quasi incipiens opisthotonus observabatur, oris ad alterutrum latus retractio, balbuties, confusio sensuum, & magna in somnum proclivitas, pulsus ce-

ler,

ler, non durus. Datum emulsum purgans ex manna, & sale amaro, fœces multas, sed absque levamine eduxit. At continuo morosus, confusus, comatosus, die, ex quo susceptus erat, quinto, emeticum hausit, quo plurima profunde flava, viridiaque rejiciebantur. A vomitu minus soporosus erat, & alacrior. Sapor oris bonus, lingua adhuc biliosa. Minor cardialgia, minorque hypochondriorum, & abdominis tensio. Respiratio facilis, indolens, sed accessit tussis. Elapsis duobus diebus denuo emeticum exhibitum: copiosa denuo, flava, viridia, & pultacea rejecit cum insigni levamine omnium symptomatum. Post emeticum datum est medicamentum salinum, quo alvus laxior ad abigendas reliquias biliosas efficeretur.

Verum paulo post, die circiter 14to, ex quo ad nos venit, cum per omnia commode valeret, intermittente quotidiana corripitur, eaque mitiori, quæ cortici peruviano auscultabat: is postea brevi ex integro sanus discessit.

Causa affectuum quorundam capitis, ac imprimis delirii cujusdam libro de affect. in hypochondriis statuitur, sic enim legitur: *phrenitis ubi apprehenderit, febris primum debilis detinet, & dolor circa præcordia, magis autem dextra ad hepar; quum autem quarta, aut quinta advenerit, & febris fortior fit, & dolores augeſcunt & color subbiliosus efficitur, & mens percellitur.* Alvum curandam esse, ait auctor libri; acetum, mel, & aquam propinanda. Subjungitur postea: *fit hic morbus a bile, cum mota visceribus, ac septo transverso infederit.* Nos viæ compendio usi, bilem ore potius quam alvo ejecimus.

Huc aliqua ratione pertinent, quæ in viro quodam contigisse scio, qui caput graviter ad durum obstaculum cadendo alliserat, unde vertiginosus, & capitis dolore vexatus tam diu mansit, donec æ-

ruginosa vomeret: peracto vomitu bene habuit.

Duæ fœminæ ex fumo carbonum male mulctatæ, vertiginosæ, nauseabundæ, capite dolentes mansere, donec dato emetico, bileque multum rejecta, mox a vomitu convalescerent.

Persæpe hypochondria affecta, multaque bile turgida caput afficiunt: nonnunquam vero caput ipsum aut lapsu, aut alia ratione affectum efficit, ut bilis copiosior in ventriculum effundatur, quæ dein ob sympathiam encephali cum systemate gastrico morbum capitis alit.

Perscrutanti singulorum hucusque narratorum rationes, & eorum, quæ paulo post recensebimus, id fortasse satisfaciet, quod prava materies præcordiorum, non eas solum partes, quibus circumscribitur, sed etiam remotius positas, & consensu quodam per observationes certo, etsi fors nondum satis explicato, inter se communicantes afficiat, aut si hoc displicet, id forte verosimile erit, particulas saburræ resorptas, partem, ad quam delatæ hæserint, vellicare, & quacunque ratione male afficere. Verum finita vomitorii actione effectus salutaris non raro citius sequitur, quam ut alibi præterquam in ventriculo mali fomitem quæras.

Morbos pectoris a bile ortos superius descripsimus. Superest, ut quæ de eorum frequentia, methodo curandi varia, ac periculo mihi constant, exponam.

Persæpe occurrunt gravissimæ peripneumoniæ, ac pleuritides, quæ & symptomatum anomalia, & temporis diuturnitate, quo durant, & efflorescentiis, præcipue miliaribus, supervenientibus, clare ostendunt, quod non ex illa pleuritidum, aut peripneumoniarum familia sint, quam Sydenhamus satis certo curari posse asserit, dum vim curationis fere totam in repetita venæ sectione ponit. Eximius hic ob-



observator pleuritides suas raro in adultis, citra jacturam 40 unciarum sanguinis, curavit; at occurrunt haud infrequentes pleuritides, quæ, facta licet duplo majori sanguinis impensa, nihilominus adeo non mitigantur, ut hominem & gravius affligant, & demum jugulent.

Est, cur credam, pertinaces hæc pleuritides eas esse, quas nos *biliosas* appellamus, aut ex utraque, *biliosa* videlicet & *inflammatoria*, *compositas*.

Quod si simplex pleuritis biliosa, aut etiam composita, ita tamen, ut levior tantum, eaque secundo nata phlogosis sit, multum interim prædominante vitio, morboque bilioso, sanguinis missionibus sollicitetur, fieri necessario debet, ut, sanguifero systemate depleto, plus materiæ biliosæ in ventriculo, & intestinis hospitantis transferatur, visque vitæ debilitetur, quo minus inimicas materiæ alienæ particulas excutere valeat, & ipsius ventriculi robur, plus æquo imminutum, adhuc magis deiciatur.

Certe longe plures hac medendi ratione interirent, etsi non pauci intereant, ni errores per toties repetitas sanguinis missiones commissi aliqua saltem ex parte corrigerentur. Qui enim ita medicantur, languidam, dejectamque vitæ vim vesicantium, & epilepticorum stimulo suscitant, copioso potu melito, nitrosoque saburram diluunt: inde aptior resorptioni redditur, totaque successive in sanguinis massam transit, ac demum per varia corporis colatoria lente difficulterque eliminatur, dum interim æger inter mille mortis propinquæ imagines miseram vitam trahit, & si etiam vim ac diuturnitatem morbi superet, non nisi tarde eluctatur.

Qui vera, essentiali, ac inflammatoria pleuritide laborat, cito sanatur, nique alia prava prædispositio adsit, cito pristinas vires recuperat, ac recidivis

minus subjacet. Huic enim nimium solummodo fibrarum robur solvere, sanguinis copiam demere, ejus consistentiam æquo majorem diluere, & illum sanitatis nimix excessum ad justam mediocritatem reducere oportet. At vero is, qui, ob languentem systematis gastrici œconomiam, sordes diutius collectas circumfert, qui, profuso per repetitas venæ sectiones vitali latice, ad incitas redactus, per miserrimum a vesicantibus petatum auxilium id obtinet, ut illud pauxillum relictæ sanguinis dissoluti, impurique, citatori suo circuitu amissi quantitatem suppleat, vitæque tenuissimæ scintillam alat, næ is inquam aut nunquam omnino, aut non nisi longissimo post tempore, & exquisitori artis auxilio, naturæque benignitate singulari, ad pristinam sanitatem redibit. Labefactata corporis compages eum relapsui, aut aliis morbis diuturnis, magis reddet obnoxium. Quot homines quotidie videmus, qui morbi acuti sequelas tota sua vita lugent!

Hæc methodus, quæ sanguinis missione repetita, copiosaque, potu multo diluente, ac vesicantibus morbos biliosos tentat, sæpius spectata, medicos non paucos deterruit, ut eandem deferuerint penitus, atque arripuerint aliam.

Hinc sunt, qui cum, una alterave præmissa venæ sectione morbum increescere vident, *malignitatem* clamant, atque ad antiseptica confugiunt.

Tantam sanguinis jacturam æger hac medendi ratione non patitur, sed medicamentis stimulantibus, aromaticisque urgetur: qua re fit, ut, quidquid pravæ in primis viis materiæ hæret, id totum intra sanguinis alveum adigatur, cum eoque circumductum per corpus, gravia symptomata progignat, donec tandem, attenuata, subactaque stimulantium vi, ad corporis superficiem deferatur, ibique, dissoluta tenuiori parte, relictæ in extremis vasculis crassiori sub-

substantia, exanthemata, ac ecchymata producat, utique critica, sed crisi perquam difficili.

Genesin efflorescentiarum in sordibus systematis gastrici quæri fere semper debere, multorum, atque etiam nostris observationibus, convictum videtur. En ideam miliarium pleuritidi, peripneumoniæve supervenientium.

Et si hanc utramque morbis biliosis medendi methodum merito reproben, quicunque morbi notionem paulo distinctiorem habent, nihilominus non infrequentes nobis casus oblatis sunt, ubi alterutra opus fuit. Contigit enim subinde, ut morbo bilioso detenti, factis extra Nosocomium jam aliquot venæ sectionibus, ad nos deferrentur. Quod in primis viis alicui tunc restitaret, dato quidem emetico ejectum fuit. At multum interea ejusdem prævæ materiæ, in communem humorum oceanum delatum, nec emetico, nec purgante revocari denuo poterat. Potione multa diluenda erat absorpta suburra, omniaque corporis colatoria aperta servanda, ita tamen, ut alvus præprimis pronior redderetur ad excipiendum, quidquid recrementitii illuc deponeretur.

Quod si vires vitæ succumbere viderentur, vesicantium, & radicis serpentariæ virginianæ, contrajervæ, camphoræ &c. stimulos subdidimus.

Ita & hac methodo usi sumus, ubi phlogosis juncta primariam attentionem & medelam postulabat; cum enim inflammationi obviam iretur, increvere symptomata biliosa, bile dominium in toto jam corpore obtinente. Quo factum, ut emeticum quod ad initium inflammatio prohibuerat, serius datum nil amplius in bilem absorptam potuerit: hic spem in repudiata aliâs methodo posuimus.

Symptomata quædam difficiles nobis explicatus admittere sæpius videbantur. Sic nulla sæpe primarum viarum affectarum signa apparuere, quibus confusus

fusus emeticum tuto exhibere potuisses : sola aderat paulo frequentior alvi dejectio , pulsus naturali citatior , parum tamen , & mollitie consueta : cæterum & lingua , ut in sanis solet , & bonus assumptorum sapor. Nullum circa ventriculum incommodum. Subinde facies solummodo prærubra , & oculi scintillantes erant. Hos si missione sanguinis aggressi sumus , gravissime id tulere : at dato emetico ingens materiæ viridis , flavæ , nigricantis , pultaceæ , moles rejecta admirationem nobis fecit , qui fieri possit , ut tanta ejus vis tamdiu collecta circa præcordia morari queat , quin luculentius præsentia suæ signum det.

Habuimus hominem , qui , excepto capitis dolore , tremore labii inferioris continuo , modica hypochondriorum tensione , ac punctorio , sed levissimo tantum dolore sub infimis costis spuris lateris sinistri , nil querebatur. Ternis per intervalla exhibitis emeticis , pultem biliosam , eamque magna quantitate cum levamine vomuit.

Aliqui ructus acidissimos questi , materiam acido-austera , ac dentes stupefacientem , vomitu rejiciebant. Saburram & odore , & sapore acidissimam , austera , fauces exurentem , colore viridissimam , in Hungaria , cum adulta æstate febres biliosæ grassarentur , sæpissime vidi.

Apparatus crudus , rancidus , amarus , biliosusque , ab assumptis acidis vel acescentibus , in acerrimam acido-austera acrimoniæ speciem degenerat : idque æstate & autumno , uti supra notabamus , quo tempore vis coëctrix magis languet , frequentius accidit , quam vere. At male inde *acidam* bilis naturam quis statueret absorbentibus solis corrigendam.

Constat per experimenta Pringliana , partes animales putridas , si vegetabilibus misceantur , fermenti instar agere , & vegetabiles substantias in acido-



do - austeram acrimoniam convertere , unde saburræ acidæ in his origo explicatur.

Inde fors apta explicatio peti potest illius inter Damnonios epidemice grassantis colicæ , quam cl. Huxhamus peculiari opusculo descripsit. Alio quoque signo utebamur , quo morbos gastricos a colluvie materiæ alienæ ortos a febribus inflammatoriis distinximus , si etiam reliqua fere omnia nos deficerent , urinis scilicet parcis , frequenter missis , profunde flavis , principio morbi statim deponentibus. Galenus ait , Comment. 4. de victus rat. part. 43. *quibus principio urinae & nebulae & crassae existunt , hos annuentibus cæteris purgare convenit : quod si urinae inter initia tenues fuerint , tales non purgabis ; at , si videatur , clysterem exhibebis.*

Multum interest , ut omnia morbi cujuscunque signa colligantur , quæ medentium memoriæ firmiter inhæreant ; nam dum morbus primum nasci incipit , dumque nondum formatus , nondum luculentis characteribus insignitus , sub ambigua adhuc , pluribusque aliis communi , forma delitescit , per difficile sæpe accidit , morbi *solummodo inchoantis* speciem determinare , eumque mature , atque adhuc in herba suffocare.

Hinc nullum nec levissimum signum , quod ad diagnosin horum morborum *fieri primum incipientium* aliquid conferre potest , unquam negligi debet.

Idem persæpe languor corporis , eadem inappetentia , calorisque sensus præternaturalis observatur , five aliquid pravæ materiæ systema gastricum afficiat , etsi ea vix ullum præsentiaæ suæ paulo certius signum det ; five vero in systemate venoso , & arterioso sanguis vel phlogosi , vel plethora peccare inceperit. At vero etsi morbus utrinque sub eadem propemodum larva ingrediatur , non erit idcirco indifferens , an ventrem purges , vel vero sanguinem

mittas. Magnum certe in utramque partem momentum afferes, quidquid feceris, & morbum vel adhuc in cunis jugulabis, vel ut præceps feratur, certo efficies.

Hanc morborum *fientium* diagnofin Baglivius inter *defiderata medica* reposuit, medicosque exhortatur, ut suam quisque symbolam pro locupletanda hac scientiæ nostræ parte conferat.

Hæc ratio est, quare minutiora quædam paulo scrupulofius subinde perfequar, omniaque colligenda esse opiner, unde morbi aut complicati, aut latentis, aut inchoantis, incertique ideam, ut phrafi Balloniana utar, *venari* possimus.

Ardorem thoracis, oppreffionem pectoris, tuffimque, quam in pleuritide ac peripneumonia biliofa observavimus, duplici origine nafci poffe fupra innuimus. Scilicet vel ex reforpta, & ad pulmones delata materie aliena, vel ex folo pulmonum cum ventriculo confenfu.

Id forte *de biliofis his thoracis morbis* aliqua ratione dici potest, quod Galenus de febre ardenti fcribit Comment. 4. Aphor. 55. *febrim ardentem fieri novimus, quando venæ exficcatæ acres ac biliofos humores ad fe traxerint.* Nihilominus cum fputum fanguinis, quod etiam in hac biliofa pleuritidum fpecie fubinde occurrit, ftatim absoluta emetici actione frequenter cefset, multum quoque confenfus poterit.

Id in pueris tuffi ftomachica laborantibus frequens eft, ut gravatus ventriculus pulmones crebra tuffi follicitet, qua ruptis exiguis in pulmone vafculis fanguis prodit. Correcto ventriculo pulmo quiefcit, & fputum fanguinis ceflat.

Hanc fputi fanguinei fpeciem probe pariter diftinguere ab illa oportet, quæ aut fanguinis miffione, & emollientibus, uti in inflammationibus pulmonum nonnunquam accidit, aut etiam roborantibus, uti  
in

In iis fit, qui ob laxos pulmones cruenta sputant, indiget; cum utraque hac methodo, ea sputi sanguinei species, de qua agimus, incrementa capiat. Fit tamen, ut vera interdum pulmonum inflammatio cum spuria hac specie complicetur, & sputi sanguinei ratio in natura veræ phlogoseos quæri debeat.

Linguam, uti illam in omnibus morbis febrilibus magni fecimus, sic in biliosis maximi, illius Hippocratici memores L. 6. de morbis popularibus sect. 5. *lingua urinam significat. Linguae virides cum pallore biliosæ. Biliosum autem a pingui: albæ a pituita. Lingua concolor attingentibus ipsam humoribus, quapropter per hanc humores cognoscimus.*

Observavimus in morbis biliosis a venæ sectione levamen, sed momentaneum haberi, morbumque paulo post validius urgere. Sanguinis missio fibras acris bilioso vellicatas crispatasque ad exiguum tempus relaxat: at si venæ, ut Galenus ait, *copiosorem bilem attraxerint*, morbum augeri necesse est.

Mala ab attracta biliosa materie oriri solita, quæve nec venæ sectionibus, nec quocunque alio modo, nisi tempestiva emetici exhibitione tolluntur, Libro de veteri medicina Hippocratico penicillo depicta videmus: *cum amaritudo quædam diffusa fuerit, quam bilem flavam appellare solemus, quales statim anxietates, & æstus, & impotentia occupant! verum ubi liberati fuerimus ab illa aut sponte, aut per medicamentum, si modo tempestive quid ipsorum fiat, manifeste & a doloribus, & a calore liberamur. Quanto autem tempore eadem elevata fuerit, & cruda, & meraca, & intemperata, nulla arte neque dolores, neque febres sedare possumus. Et quos quidem acuta, acrisque ac æruginosa bilis affligit, quales mox rabies & morsus viscerum, ac pectoris, & desperatio! non*

*sedantur autem hæc, priusquam eadem expurgetur, & prosternatur, & aliis permisceatur.*

Momentaneum hoc a sanguinis missione levamen in juvene, biliosa saburra laborante, nos seduxit, ut morbum alia, quam oportebat, ratione, curaremus. En ejus perbreve historiam: juvenis 18. annorum, faber ferrarius, 20. Maji ad nos venit. Ante 5. dies vesperi lassitudine, dolore lumborum, pectoris oppressione, dolore punctorio ad sternum afficiebatur. Sitis multa, tussis nulla, frigus internum continuum, & extremorum calores querebatur. Caluit multum, si contrectaretur. Dolor capitis aderat, lingua multum biliosa. Dolor in molli parte hypochondrii sinistri. Pulsus celer, fortis, plenus. Nulla alia consuetata biliosi apparatus signa. Animus erat, præmissa venæ sectione die sequenti potionem emeticam propinare. Secta vena est. Sanguis bonus extractus cum insigni levamine diutius, ac alias solet, persistente. Emeticum omisi, meque in diagnosi deceptum, morbumque, quem pridie *biliosum* declaraveram, nunc *inflammatorium*, ob insigne, & fatis diuturnum a sanguinis missione levamen, argumento a posteriori, ut ajunt, desumpto, arbitrabar. Sumpsit potum hordeatum cum oxymelle. Verum cum exacto uno die symptomata pectoris multo gravius redirent, eadem usus medela sum, sanguinis scilicet missione, ut ut longe parciore, ac prima vice. Denuo insigne levamen, sed minus diu durans. Accedit sensuum hebetudo, stupor, abdomen dolens, præcipue hypochondrium sinistrum, gravissima pectoris oppressio, pulsus celerior multo, quam in principio. Mens sæpe vacillat. Datum emetico-catharticum est, quo multa flava, viridia ore, & alvo ejecta sunt. Post emesin mens nondum ex integro rediit, sed adhuc subdelirat, attamen rarius mitiusque, quam antea. Dedi tincturam rhei aquosam cum sale medio ea dosi, quæ



quæ alvum servaret apertam, etsi cavebam, ne fusior fieret, & vires ægri convelleret. Aliunde noveram, quantum boni afferre paulo laxior alvus soleat eo in casu, ubi morbus biliosus prava ad initium methodo curabatur, & cruda systematis gastrici materies sanguinem inquinaret, cum sordium biliosarum, si massam humorum intrarint, aptissimum colatorium alvus sit, quo sensim reductæ commodissime eliminantur. Mens interea rarius vacillabat; verum ingentem capitis dolorem querebatur. Oculorum pars alba rubebat ex integro: minor abdominis dolor, minorque oppressio pectoris. Sed cum pulsus mollis, debilisque admodum evaderet, celeritate ferme naturali, lingua, antea biliosa, aresceret, camphoræ, radicis serpentariæ virginianæ, contrayervæ & sinapismorum stimulos subdidimus, ut, quidquid extra terminos systematis gastrici situm est, & aut visceribus infixum, aut circumductis humoribus permixtum, extricetur. His effectum est, ut mens sæpius rediret, ac antea, pulsusque vegetiores redderentur, lingua humectaretur &c. Verum cum hypochondriorum meteorismus, dolorque intenderetur, datum denuo emeticum est, quod copiosam bilem multo cum levamine excussit. Ab emesi secunda vice celebrata, subjunctisque denuo cardiacis mens ex integro, & plena, tardo licet passu, convalescentia rediit.

Emetici vices purgans pharmacum subire non posse, & observatio frequens, & ratio docet. Qui materiem alienam in ventriculo, & partibus, illi communicantibus, stabulantem, purgante aggreditur, aut nihil agit, aut morbum graviores reddit: hæc enim, cum ex ventriculo ad inferiora deturbatur, per longissimum intestinorum canalem circumducta, & vasis resorbentibus quamplurimis ad-

plicata, ab iisdem excipitur, & sanguinem, vitli hucusque expertem, inficit.

Damnanda ergo praxis est, quæ adeo mollem medicinam facit, ut nunquam emeticum, ut ut indicatissimum, propinare audeat, sed eccoproticis, veterumque minorativis, sæpius, & per epicrasin datis, morbum, unico emetico jugulandum perisæpe, cum periculo ægri non exiguo in longum trahit.

His antiquissima observatio suffragatur: bilem enim frequentius, tutiusque vomitu vacuari, Hippocrates L. 4. de morbis testatur: *quantum quidem in ventriculo, & vesicula inest bilis, quod quidem in ventriculo est, aliquando deorsum exturbatur, plerumque vero in primis diebus vomitur, aut in quatuor, aut in quinque.*

Nos, a natura ipsa edocti, in principio bilem emetico potius, quam purgante vacuavimus.

Huc faciunt, quæ L. 7. de morbis popularibus habentur: *subpurgandi sunt ventres in morbis, ubi purganda matura fuerint: inferni quidem, ubi considisse videris. Signum habes, si non anxii fuerint, neque capite gravati, & cum calores mitissimi, & cum post exacerbationes cessarint. Superni vero in ipsis exacerbationibus: tunc enim & hi elevantur, cum anxii & gravati supernis partibus fuerint. Propterea vero in principiis purgandum non est, quoniam sua sponte in his temporibus (vomitu scilicet) expurgantur.*

Tutius ergo dari emeticum potest, quam purgans, cum illud in ipsis adeo exacerbationibus exhibere oporteat, hoc non nisi post illas. Propterea vero usum evacuantium in principio morbi superfluum putat, quod biliosa collectio sua sponte evacuetur. Verum ubi natura, muneris sui velut oblita, salutare hasce evacuationes non ciet, quidni, ars naturæ imitatrix, id suppleat, ut idcirco in exordio mor-

morbi emesis tuto moveatur, quæ multoties alias cum emolumento ægri sponte fit.

Præstantiam emeticorum præ solis purgantibus cl. de Præval in præclara, etsi perbrevis, dissertatione de vomitoriorum usu in peripneumonia putrida (vid. T. II. Disputationum ab Ill. Hallero collectarum) ita demonstravit, meamque mentem, cum serius in hanc dissertationem inciderem, ea ratione expressit, ut integrum textum non possim non transcribere: *antequam faceessant ægri vires*, ait cl. Auctor, *nequidem expectato morbi decremento, cathartica, cathartico-emetica, & ipsamet emetica cito & tuto exhibeamus*. *Prævis enim nondum evacuatis luxuriantibus feræntis, frustraneum expectaremus decrementum, in pejus rueret cunctando malum, & certo certius morti occumberet, antequam veræ & genuinæ methodo committi potuisset æger*. Rite ergo præparatus lene catharticum hauriet? *Est, sed uberius, viscosaque nimis turgēt saburra, quam ut cathartici foras amandari queat, tempus urget, in promptu adest auxilium, cathartica emeticis stimulata (granis aliquot tartari stibiat) vel multa quidem aqua dilutas antimonii ipsissimas exhibeamus præparaciones, quæ blande, & efficaciter purgant; in eo quippe casu excandesceret pectus, plus æquo intensa & agitata sanguinis mole, si simplici leniori cathartico saburræ foras educerentur, hoc præsertim cælo eliminatu difficillimæ*.

Pro vomitu concitando usi sumus solutione tartari emetici, juxta normam in dispensatorio Viennensi præscriptam, parati: grana quatuor in libra aquæ solvimus, cujus quartam partem singulo horæ quadrante vomituri potabant. Post singulas vomitiones aquam tepidam bibebant, quo facilius atque majori cum emolumento vomant.

Multipli prærogativa hoc medicamentum præ quovis alio gaudet: numerus vomitionum propemo-

dum in medici potestate est, cum potio hæc per epierasin propinetur. Præterea vim emeticam incertius, quam a quocunque alio vomitorio, ac citius experimur. Radix ipecacuanhæ subinde effata, aut si etiam recens sit, non raro mucosis ventriculi for-  
dibus involuta, aut nullam, aut non pro dignitate, aut alium, qui non quærebatur, effectum producit.

Etenim radix hæc non raro, nulla excitata emefi, purgantis instar versus alvum ruit. In delicatioribus contigit, ut nauseosam radicem vix devoraram fastidiosi rejicerent, & sperato effectum frustrarentur. Tartarus vero emeticus aqua solutus, & hac methodo exhibitus, etiam delicatissimis tuto datur: vis ejus solvens, attenuans pulchre quoque eo in casu convenit, ubi mucosa colluvies lateribus ventriculi firmius adhæret.

Cum rarissime accidat, ut solummodo ventriculus gravetur, quin non & intestina aliquid vitiosæ materiæ attraxerint, alia quoque is virtute præstat, cathartica scilicet, ut adeo hæc potio cathartico-emetica *cholera* quasi *artificialem* cum bonis ægrorum rebus excitet. Lipyriam febrem, quæ ex biliosarum familia est, non solvi, nisi superveniente cholera, notavit Hippocrates. Id quod natura sui conservatrix salutari molimine nonnunquam sola facit, medicamento nos præstitimus cathartico-emetico. Eadem solutione tartari emetici, refracta admodum dosi, usi sumus sæpissime kermetis loco. Kermes aqua non solubilis, in mixturis pectoralibus nosocomii nostri minus commode exhibebatur; etiamsi enim vasculum, quo medicamentum continebatur, probe concuteretur, tamen inæqualis portio, & sæpe nihil omnino kermetis æger acceperat, donec cum ultima dosi mixturæ totam kermetis, in fundo hærentis, portionem hauriret.

Solenne remedium expectorans erat ex aquæ sambuci



buci unc. v. oxym. simpl. & squill. ā unc. i. tart. emet. gr. ij. Si commode æger ferebat, etiam granatrua addidimus, ut intra 24 horas totum absumatur, divisum in doses sex.

De præparanda ante vomitum materia id dico, nos plerumque, ubi emeticum requirebatur, absque prægressis solventibus id dedisse. Tumultuarium hoc videri posset, atque incontulto factitatum, ni observatio frequens nos docuisset, id utiliter fieri. Materies plerumque ex integro mobilis fuit, & ad evacuationem parata, aut, si quædam solummodo materiæ portio soluta, reliqua vero tenax, & glutinosa fuerat, id saltem obtinebamus, ut, quod mobile fuctat, ejiceretur, reliquæ vero ipsa vomendi actione, vi medicamenti attenuante, solventeque aptæ redderentur, quo repetita denuo vomitione vacuari quiverint. Id enim intendebamus, ut mali fomes quantocius, & cum temporis & laborum compendio excutiat.

Nunquam, aut perraro, sanguinis missionem emetico præmisimus, ac non nisi præsens aliqua inflammatio eam posceret. Præsentis solummodo mali medebamur: nolebamus hominem, ut ut sanguinis copiam, & robur fibrarum insigne ex pulsu, aspectuque metiremur, morbo bilioso laborantem vel paucosanguine privare, ne magis eidem morbo, quem emetico curabamus, obnoxius reddatur. Non suffecerat, quod æger sanguinis detractiōnem *ferre possit*, requirebamus etiam illud, ut *necessaria* sit.

Universim in profundendo vitali latice paulo parciores eramus. Non omnem caloris prænaturalis sensum, non omnem motum febrilem a sanguine phlogistico, copioso, orgasmico nasci arbitrabamur, observationibus ita docti. Ventriculus, abdomen injuriis magis patent, quam systema sanguineum, & si quid in hoc vitii sit, plerumque id secundoario ortum

est, labe a ventriculo, & intestinis tracta. Sæpius in mentem venit illud Celsi L. 2. C. 10. sanguinem incisa vena mitti novum non est, sed nullum pene morbum esse, in quo non mittatur, novum est.

In pleuritide, & peripneumonia biliosa sæpius, morbo jam in melius vergente, diarrhœa supervenerat, ægro perutilis, nisi fors nimium fusa alvus vires convelleret, & sputa supprimeret: moderatior summopere profuit; hac enim materies in ventriculo, & intestinis restitans, quæ nec vomitu ad initium rejecta, nec resorpta ex integro ad vias secundas transiit, multo potu diluente assumpto mobilis facta, alvum petiit, fortunato utique naturæ conamine.

Non est hæc illa pleuriticis superveniens, & ab Hippocrate damnata diarrhœa, quæ a pure in pulmonibus jam nato, & ad intestina labente provenit, mortis prænuntia, aut quæ, dum inflammatio, latius serpens, vicinas pulmonibus partes corripit, vellicatque, liquidiores sanguinis partes alvo eliminat, restitante interim cruore, & per vasa difficiliter moto. Hæc ægris perniciofa a viis secundis oritur, sese in primas exonerantibus: illa salutaris reliquias biliosas everrit.

Alterum est, quod cum alvo hac laxiori plerumque observatur, sputum videlicet crassum, tenax, glutinosum, cujus excretio æque utilis, ac necessaria est. Hinc alvum sæpe reprimere oportebat, ubi uno alterove die copiosior fuerat, ne expectoratio supprimatur, pulmones a resorpta materie liberans.

Dedi tunc optimo cum effectu singulis horis pulverem compositum ex grano dimidio kermetis mineralis, & quarta parte grani laudani puri triti cum pauxillo sachari, vel etiam omni bihorio pulverem

ex.

ex eadem laudani quantitate, & grano uno kermetis mineralis præparatum.

Hoc quoque tempore vesicantia egregios effectus præstitere; vis enim cantharidum movens, glutinosa incidens, attenuans, solvens, sputa pulchre promovebat, quin alvum sollicitavit. Nam cætera expectorantia, alvo per se jam nimium lubrica, antequam in sanguinem recepta destinato fini satisfaciant, vim potius catharticam exerunt; verum cantharidum particulæ massam humorum, insalutatis primis viis, subeunt, & sputa promovent.

Hoc scopo si vesicantia adponerentur, locum vesicante tentatum nunquam permisi epidermide spoliari, sed ea relicta, & adposito siccante remedio deligatio fiebat, dein altera, quin & tertia vice, ac sæpius, ubicunque commodum videbatur, aliud vesicans applicari curavi.

Vim illam cantharidum, qua in totum corpus, atque etiam in pulmones agunt, unice spectans, diuturna loci suppuratione aut peculiari attentione ad locum, quo applicentur, non egebam.

Quod usum expectorantium concernit, non est eadem apud omnes lex. Nos equidem damnabamus praxin illam, quæ, sive in vera essentiali ac inflammatoria pulmonum inflammatione, sive in hac spuria biliosa, aut inflammatorio-biliosa, mox in principio morbi medicamenta moventia ex stibio non abuto, ex kermete minerali, aliaque hujus generis exhibet. Quamdiu enim, e. g., in vera pleuritide phlogosis manet, tamdiu sola viget solvendi, emolliendi, & massam sanguineam minuendi indicatio: verum ubi primum morbi inflammatorii stadium præterit, discussaque phlogosi materies mobilis effecta, ob lentorem, aut vim vitæ nimis dejectam, Sputando educi nequit, pulmonesque suo pondere gravat, convenit, medicamento movente, attenuante, stimulante

viribus vitæ debilitatis suppetias ferre, ut omnes secretiones, & excretiones, quæ ob morbi vehementiam, diuturnitatem, prægressasque copiosas evacuationes languent, admoto expectorantium stimulo resuscitentur.

Cochionem, crisinque die quodam decretorio peragendam, & quæcunque huc pertinent, si restricta magis significatione acceptentur, ut non quævis morbi solutio, quocunque tempore modove facta, crisis dicatur, ad morbos biliosos attinere non putabamus.

Controversiam de dierum criticorum veritate innatam existimo, quod alii in omnibus febribus acutis dies criticos quæsierint, atque etiam in omnibus observasse putarint, etsi eosdem solum in aliquibus vere observarent: alii vero, cum in plurimis non observarent, dies criticos ad superstitiosa antiquitatis figmenta, conclusione latius, ac par erat, deducta, retulerint.

Morbi febriles, quorum materia, fomesque intra humorum circulantium limites positus est, & circulationis legi subjacet, *magna ex parte* cochionem, crisinque die critico peragendam admittunt, cum motus cordis & arteriarum materiam hanc alienam intra vasa sanguifera contentam subigat, attenuet, & excretioni, quæ coctæ materiæ magis convenit, aptam reddat.

Attamen non omnis omnino aliena materies intra humorum circulum recepta, ut ut & subigi, attenuari, expellique, id est, *coqui*, & *critice evacuari* debeat, modum diesque ab Hippocrate descriptos observare videtur.

Verior, & observationibus recentiorum stabilita dierum criticorum doctrina erit, si ea unice materiæ phlogisticæ in ipso circulante sanguine natæ, nec aliunde receptæ adaptetur, ut ideo soli morbi inflamm-



inflammatorii certo dierum numero, certove modo judicentur.

In morbis gastricis materies motui cordis, & articularum exposita non est, sed iners in ventriculo ac intestinis hæret, & vim vitæ subigentem, attenuantem, expellentemque non experitur: hinc in sensu saltem strictiori coctio, critica perturbatio, & crisis in morbis hisce locum non habet.

Medicus ipsemet dato solvente, attenuante medicamento, quodve morbi materiem mobilem efficit, naturæ coquentis vices, subit, ac, dum formes mali ad excretionem aptus evasit, exhibito aut emetico, aut emetico-cathartico *perturbationem criticam, crisinque artificialem* facit.

Quemadmodum igitur coctionis, criseosque negotium in morbis inflammatoriis a sola propemodum medicatrice natura provenit, ita in febribus gastricis id solius propemodum medici opus est. Is in febribus inflammatoriis naturæ solummodo hinc inde succurrit, sæpissime otiosus tantummodo moliminum ejus spectator est. In gastricis, a crudo humorum apparatu oriundis, parum natura facit, medicus plurimum.

Restant aliqua, quæ medentem subinde diu multumque suspensum tenent, in partesque trahunt varias, *biliosane* pleuritis sit, an *inflammatoria*, vel vero, an ex utraque *composita*, sollicitate secum disputantem; non enim ea semper horum morborum ratio est, ut non multa inter se communia habeant, nec alterius persæpe speciem præ se ferat.

At gravem ex commisso in diagnosi errore noxam sequi necessum est. Ut ergo segura pleuritidis veræ a spuria diagnosi instituatur, sequentia erunt perpendenda.

imo. quænam eo tempore epidemia regnet: equidem difficile id persæpe accidit, nisi cui quam plurimi

rimi ægri curandi obveniunt. Hinc epidemias, earum augmentum, statum, decrementum copiosior plebis ægrotantis concursus ad nosocomia quam optime docet.

Toto hoc verno tempore sordes primarum viarum, febresque inde multiplices oriundæ prædominium obtinebant, etsi hæc ipsa anni pars inflammationibus alias infamis, biliosis non raro phlogosin adsperserit. Hinc regnante hac epidemia edocti statum primarum viarum attentius observabamus, quas fere semper, quisunque alius simul morbus fuerit, epidemico hoc vitio laborantes deprehendimus.

Hac occasione non possum non deprædicare illorum industriam, qui non solum quovis fere mense in adversaria referre consueverunt, qua sanitate usi homines eo tempore fuerint, quinam dominium habuerint morbi, quinam orti de novo, quinam vero mitiores facti, quinam cessarint penitus, sed & simul athmosphæræ, in qua vivimus, statum adnotant. Quod si plures, paulo attentius, singulas hæc res conscriberent, atque quasdam quasi ephemerides componerent, brevi in immensum excreveret observationum numerus, ex qua tam vasta collectione quidam quasi canones, de diverso athmosphæræ habitu ad hominum diversam valetudinem, deduci possent.

2do. ut in diagnosi pleuritidis vel peripneumoniarum biliosarum non erres, symptomata supra recensita in morbis hisce thoracis probe oportet memoriæ infixæ habere.

3tio. multa docet præcedens valetudinis status. Pleuritis enim vera inflammatoria plerumque validissimos, & inopinantes aggreditur. Pleuritis vero spuria biliosa lente progreditur, & a dejecto appetitu, signisque primas vias affectas denotantibus longo antea tempore sese monstrat.

4to. frequentior in iis hic morbus deprehenditur, qui

qui victu crudo, uti plebs infima solet, utuntur, quive ventriculo alias debili & imbecilli sunt, aut a natura temperamentum biliosum nanciscebantur.

5to. ad diagnosin securius instituendam facit quoque hæc observatio, quod dolor in pleuritide, & peripneumonia hac spuria, inter tussendum, respirandumque raro augeatur, cum e contrario, qui vera pulmonum inflammatione laborant, non tussiant, neque respirent absque insigni pectoris incommodo. Præterea tussis rato cruenta est in biliosa pleuritide, nisi illa validior sit, ut ipso tussendi conatu aliquid sanguinis exprimatur.

6to. in spuria pleuritide scrobiculum, hypochondria, abdomen, & lumbi maxime afficiuntur, non autem æque in vera.

7mo. alvus diarrhœica biliosa longo ante morbum tempore non raro observatur; secus in vera pleuritide, nisi per accidens id fiat.

8vo. urina non ruffa, sed flava, vitellinum colorem referens, biliosa, sæpe cum sedimento aut mucoso, aut lateritio, vel ante morbum, vel & in ipso pleuritidis biliosæ exordio observatur. In vera autem pulmonum inflammatione urina ruffa est, & absque sedimento.

9no. Febris pleuritidi veræ juncta *continua* est, cum levi ut plurimum ad vesperam intensione absque intermixtis horripilationibus; at vero febris, pleuritidis biliosæ comes, ex familia *continuarum remittentium* esse solet, ubi aut statim tempore, aut & per incerta intervalla, exacerbationes redeunt, sive id quotidie, sive omni tertio, quartove, sive etiam eodem die sæpius contingat.

10mo. Pulsus in vera pleuritide fortis, durusque est, & ut Petrus Forestus ait, *tactum ferrat*; at in exquisita, non complicata, biliosa, mollis est, & varia in variis celeritate.

Per-

Perpenſis hiſce, conſideranda quædam ſymptomata ſunt, quæ utrique pleuritidi tum veræ, cum & ſpuria, bilioſæque ex æquo conveniunt, ob eam rationem penitus pernoſcenda, quod letali cum eventu medentem ſæpe numero in errorem inducant. Ea fere ſequentia ſunt:

1mo. Oris amaror. Oris amarorem in bilioſis fere ſemper obſervamus, non tamen ita, ut abeſſe non poſſit, magna licet colluvie cruda bilioſa primas vias gravante. Verum ſubinde in iis, qui bilioſo vitio non laborant, atque in *vera pulmonum inflammatione* hic oris amaror deprehenditur. Hinc ſerio monendum eſt, ne quis nimium præcipitata concluſione, ex ſolo ferme amarore oris, prædominantem bilioſam colluviem adeſſe ſtatuat, & funeſtam ægro medicinam faciat.

2dum. Symptoma ſæpe anceps, & utrique morbo commune eſt vomituritio, vomitusque. Etenim non infrequenter accidit, ut pulmo vera inflammatione tentatus proximum diaphragma, ventriculum, & œſophagum in conſenſum trahat, ac vomendi deſiderium, & ipſum adeo vomitum moveat. Hinc quemadmodum a cauſa idiopathica, in ipſo ventriculo exiſtente, vomituritio & vomitus fieri queunt, ita & ventriculus ſympathice nonnunquam a pulmonibus inflammatis afficitur.

3tio. ipſa bilis, hoc vomitu ſponte excitato reſecta, necdum ſufficit, ut de pleuritide bilioſa concludam, ſi cætera reclament; in omni enim prope modum vomitu, præcipue paulo vehementiori, bilis in inteſtina & ventriculum exprimitur, vomituque reſicitur, idque etiam in homine cæteroquin ſaniſſimo accidit.

4tum ſymptoma, fallax ſæpe, eſt rubor faciei, genarumque, qui tam in vera pleuritide, quam in ſpuria, bilioſaque obſervatur. Eum obſervari in



inflammatione pulmonum vera, facile captu est, nec ulteriori explicatione indiget. Verum certa est observatio Ballonii, sæpius apud ægros nostros confirmata, eos videlicet, quorum ventriculum, & intestina crudus apparatus obsidet, subinde pallere quidem, virescereque, persæpe tamen summopere rubore suffusos esse, ita, ut & album oculorum rubeat. Est quoque Hippocratis ipsius observatio, eos, qui facie rubent, aut sanguineos, plethoricosque esse, aut, quod huc pertinet, abdomen habere itercoribus, ut ait, vetustis obsessum. Sed neque genarum pallor, & virescens faciei color uni solummodo biliosæ pleuritidi convenit.

Etenim permulti sunt, quorum pulmones vera, diraue inflammatio tenet, etsi vultu sint pallidissimo, oculis semiictericiis, corporisque totius eo colore, quem græci non exprimendo alias vocabulo *χλωρον* appellavere, ac si diceres, ex pallido virescente. Serum enim phlogisticum, quod crustam in patella flavescentem exhibet, ægros hosce hoc flavo viridi colore pingit. Hinc cavendum, ne in diagnosi nos color faciei seducat.

sputum symptoma, in utraque pleuritide, tam vera, quam spuria, observari non raro solitum, sputum cruentum est; etsi id frequentius pleuritidem, & peripneumoniam veram comitetur. Verum si in spuria pleuritide tussis assidua, validaque thoracem quatiat, si præterea vasa pulmonum ex prædispositione quadam sint paulo debiliora, laxioraque, ipso validiori tussiendo conatu sanguinis quid ex ruptis vasculis excutitur, ea prorsus ratione, qua in tussi pulmonum stomachica vehemens motus, sanguinem per os & nares subinde copiose exprimit.

Vidimus hucusque, quibus notis in casu dubio medicus uti debeat, ut morbum pectoris spurium, biliosumque ab inflammatorio, *pleuritidem biliosam a*

*vera* & *phlogistica* securius distinguat: dictum præterea est, quantum interfit, ut omnis in hac diagnosi error vitetur.

Verum nonnunquam adeo abstrusa mali causa, atque adeo complicata Symptomata sunt, ut tot argumenta pro *spuria* pleuritide, quot pro *vera* pugnent. Hoc rerum statu dum medicus, quam partem, quodve consilium arripere debeat, dubius fluctuat, gravis quæstio nascitur, quid eundem moliri, aut potius non moliri, oporteat.

In his angustiis medici officio, quod parens medicinæ binis vocabulis: *ωφελεειν*, *η μη βλαπτειν* (prodesse, aut si id nequeat, non nocere) totum circumscripsit, is probe defungetur, qui alteram solum ejus partem, *μη βλαπτειν*, expleverit. Pauca certe utrique morbo ex æquo conveniunt, eaque sunt:

1mo. potus copiosi cum melle, aceto, & paucosale medio.

2do. frequens clysterum usus, ut intestina a præsentē fors cacochylia liberentur.

3tio. mora ipsa morbum detegit, evolvitque.

4to. exigua venæ sectio ad Uncias iv — v — vi. utrique non raro convenit, nam & biliosis subinde sanguinis missio catenus prodest, quatenus spatium majus in systemate venoso, & arterioso efficitur, præcipue ubi febris biliosa valida est, ita ut mali quid ab ipso hoc motu auctiore timeas. Conditio sanguinis detracti, levamen aut nullum, aut momentaneum, morbo posthac aut mitius, aut gravius afficiente, aliquid fortasse suggeret, unde novam possis indicationem venari.

Juvat potius hac indirecta quidem, & incompleta, quam nulla, aut ancipiti methodo uti.

Hæc, quæ de pleuritide & peripneumonia spuria biliosa dicta sunt, iis apprimè respondent, quæ magni in arte viri, annosa praxi edocti, posteros docue-

re. Ballonius potiore[m] pleuritidum partem non venæ sectione, sed iis curandam asserit, quæ gastricum systema purgant. Ita enim ait: *major est pars pleuritidum & dolorum lateris tum a congestione cujusdam excrementi in pulmonem, & thoracem, tum ob recursum tenuioris humoris per orgasmum a ventre inferiore, quam a capite & partibus superioribus, quod diligenter videndum, quoniam plerique non audent purgare & solvere ventrem, & sæpe hoc plus confert, ac phlebotomia; imo tunc sectioni venæ locus non est, nisi forte semel id sit, præsertim si dolores lateris fiant hyeme a crudo & frigido humore, in quibus nequaquam sectio venæ convenit. Et paulo post: cum dolores vagabunde tenent nothas costas, & continuatione membranarum attingunt aliquando mammas, & partes sterni anteriores, caute videre oportet, an propter ventris inferioris cacochyliam, a qua propter vapores elevatos dolores surgunt, sensio adsit doloris, an causa ipsa & partibus superioribus pendeat, an vero in thorace ipso sit: vulgo secatur vena, undelibet sit dolor, idque male. Quis enim nescit, si dolor iste agnoscat causam in ventre inferiore, non modo non prodesse phlebotomiam, sed etiam sæpe nocere, quod attractio fiat a partibus inferis, & si nondum adsit pleuritis, ea per venæ sectionem acceleretur?*

Pulchre quoque notat hanc, de qua agimus, pleuritidis & peripneumonix speciem inferius, dum ait: *plerique queruntur de dolore pectoris, unaque ventriculi, & sese animam ducere non posse ajunt. Statim medicorum quorundam vulgarium opinionis ad phlebotomiam concurritur, at nil, aut parum profici, declarat rerum exitus. Etenim si vel cholera, vel diarrhæa succedat, vel purgante sollicitetur alvus, dolores cito levantur. Sic cacochylia, hypochondriorum obstructio dolores facit, qui maxime adparent, & proferuntur in pectore ob consensum diaphragmatis, & quia in thorace communis est membrana & lateribus. & diaphragmati*

*parte convexa.* Choleram Ballonio laudatam, tanquam veram pleuritidis biliosæ crisin, antimoniali emetico ars naturæ imitatrix movet.

## M A J U S.

Mensis hic frigidus, siccus, multoque perflatus vento, febrium intermittentium præ reliquis ferax fuit: fuere & rheumatismi permulti, anginae, pleuritides copiosæ.

Febres hujus mensis ut plurimum tertianæ fuere, solventibus & vomitu curatæ, ita, ut rarius cortice peruviano opus fuerit, nisi ubi repetitis evacuationibus febris nihilominus perseveraret. Continuae remittentes morem tertianæ servantes non paucæ viscebantur, quæ sumpto solvente medicamento, & dein emetico, primo intermiserunt, tandem vero penitus cessarunt. Plures habuimus continuas remittentes, quarum exacerbatio nulla certa periodo rediit, omni die, omni 3tio die, atque etiam eodem die sæpius.

Quidam per tres, pluresque septimanas de continuo tere, & nunquam intermisso totius corporis horrore, frigoreve querebantur, hos solvens quoque medicamentum, subjuncto emetico juvit. Inter continuas remittentes fuerunt quædam, quæ, licet copiosæ sordes biliosæ vomitu rejicerentur, idque etiam iterato, nihilominus nil remiserunt. Id iis potissimum accidit, qui præviam debilitatem, aut imbecillem ventriculum ad hunc morbum afferebant, aut a multis jam septimanis continuato horrore, anorexia, aliisque, a ventriculo gravato oriri solitis, symptomatibus conflictabantur, aut qui morbum, visceribus jam diutius insidentem, stulta, quæ inter plebem vigeat, opinione seducti, vino, & continuato quin & aucto corporis exercitio, superare contendebant, vel sanguinis missione intempestiva vires potius, quam morbum, fregere. His supervenit linguæ siccitas,



ariditasque, atque eæ affectiones, quæ malignitatem imminere demonstrabant: nihilominus cortex cum camphora eos denuo in vado collocavit.

Observatæ quoque sunt febres larvatæ, quarum binas ex adversariis meis huc transferam: Chirurgus 22. annorum, coryzam cum narium siccitate, obstructione, ac dolore ad radicem nasi, a quatrduo passus, ad nos venit, bono habitu plenoque præditus. Pridie horruisse, dein caluisse præter ordinem, sectam sibi venam fuisse, narrabat. Mane, quo ad nos venit, commodè habuit, pulsus erat celer, sitis pauca, caput grave, odor, saporque deperditus, lingua alba. Rubor ingens faciei totius. Datum est decoctum hordei cum oxymelle, jussusque est decocto emolliente tepido naribus attracto membranam schneiderianam fomentare. Primo die a meridie apud nos peculiarem capitis gravitatem usque ad mediam fere noctem experiebatur, largus sudore terminatam. Die sequente cum & pulsus, & habitus corporis sanguinis detractionem exigere viderentur, facta est venæ sectio; at a meridie circa horam primam frigus, inde dolor ingens, ac fere intolerabilis ad sinum frontalem sinistrum, qui sudore circa horam noctis undecimam finiebatur. Nares siccæ, nullumque aliud in corpore molestum symptoma. Die tertio statò tempore prægresso frigore dolor sævus in sinu frontali dextro rediit, statà itidem hora sponte desinens. Verum hoc die lingua modicissime biliosa fuit, os subinde leviter amarescens, ructus rari, sed nonnunquam amari. Finito paroxysmo datum emeticum est, unde multa, flava, viridiaque vomuit. Paroxysmus posthac nullus rediit. Longo postea tempore hominem sanum atque ab omni febre immunem vidi.

Juvenula 24. annorum per tres septimanas appetitum dejectum, frigora cum caloribus alternan-

tia quaesta, suo consilio venam tundi curavit: at inde pejus habuit. Accessit & dolor capitis, qui a meridie in seram usque noctem multum exacerbabatur cum horrore, ætisque horis pomeridianis graviter affligente. Vomitiones, oris amaror, ructus amari. Sumpto emetico vomuit plurima biliosa, alvusque mota aliquoties est. Die sequenti a meridie rediit dolor capitis ad tempora, item ad verticem capitis cum frigore, sudore frigido per totum corpus, mitior tamen multo, quam præcedentibus diebus. Cum ea sumeret, quæ alvum redderent modice fluentem, cephalalgia, quæ prioribus diebus ægram crudeliter affligebat, postea minus diu, ac mitius urgebat, tandem cortice peruviano compressa est.

Utraque historia, primariam sedem febrium larvatarum in gastrico systemate locatam esse, demonstrat. Quamvis hæc juvenula solo emetico curata non fuerit, paroxysmum tamen concitata emesi mitiorem experta est. Quin ipse cortex, juxta mentem cl. Casimiri Medicus, non nisi ea ratione febribus medetur, quod vi sua roborante, nimiamque ventriculi & intestinorum irritabilitatem emendante agat.

Id inde etiam consequitur, in febribus larvatis non semper in solo cortice quaerendum auxilium esse; quemadmodum enim pleræque febres intermittentes tuto, & sat cito alia methodo, quam quæ corticem peruvianum exhibet, percurantur, sic & larvatae pleræque hoc antifebrili specifico non indigent, sed aliis medendi modis sat belle auscultant. Nihilominus ubi febris, sub gravis periculosique symptomatis larva delitescens, ipsi adeo vitæ insidias struit, hostem a mœnibus propellere, repudiatove omni alio incerto auxilio ad corticem peruvianum confugere oportet.

Varios rheumatismos observabamus hoc mense : dolebant atrociter articuli majores , carnesque inter eosdem mediæ.

Non opinantes plerumque hic morbus corripuit, quin ulla, ut in podagricis solet, apestia præcederet, aut statâ periodo, legeve certa exacerbationes redirent.

Vidimus rheumatismos, quibus nulla comes febris ibat, paucos licet. Plerisque febris jungebatur.

Dolor vertebrae lumborum persæpe occupavit, effecitque *lumbaginem rheumaticam*. Pluribus acetabulum doluit dolore per femoris externam faciem atque crus ad malleolos, usque descendente. *Ischias erat rheumatica*.

Eadem materies rheumatica palpebras, partesque oculo proximas, ipsumque oculum obsidens *ophthalmiam serosam* aliquoties fecit.

Ex eadem origine fuere *coryzæ*, *hemicranie rheumaticæ*, *otalgiæ*, *odontalgie*, *genarum tumores*, *anginæ*, *bronchi*, sive *raucedines*, & defluxiones ad pectus, quas κατ' ἐξοχὴν, catarrhos appellant.

Sanavimus dolorem ventriculi rheumaticum, sive *gastritidem rheumaticam*, itemque in alio ægro *rheumaticam enteritidem*.

Huc quoque pleuritides rheumaticæ spectant, quæ hoc tempore frequentissime visebantur, reliquis anni temporibus sporades fuerunt.

In rheumatismo febrili crustam summe phlogisticam in sanguine detracto semper vidimus, eamque tam crassam, ut vix aliquid cruoris, aut rubræ partis appareret. In quocunque alio morbo inflammatorio, ut ut gravissimo, minor, tenuiorque crusta phlogistica apparebat.

Plures deprehendimus differentias inter eam inflammationem, quæ rheumatismum febrilem, atque eam, quæ morbos alios inflammatorios committit, ut alia idcirco nobis visa sit *inflammatio rheu-*

*matica*, atque itidem alia, quam *genuinam*, *veramque* appellare phlogosin possumus.

Discrimen utriusque inflammationis *genuinæ* videlicet, & *spurix* multiplici observatione, atque, ut ajunt; a *posteriori* demonstrabatur, & novis identidem observationibus quotidie demonstratur; nam imo. *Rheumatica inflammatio* minus longe periculosa, ut plurimum, est, &, nisi nobilissima viscera occupet, raro necat: gravior letaliorque inflammatio *genuina* est.

2do. Inflammatio rheumatica plerumque benignâ resolutione terminatur, etsi multum fortasse temporis a morbi exordio lapsum sit, neque leges coctionis, criseosque observat. Id in rheumatica pleuritide, materie non solos musculos intercostales, pleuramque, sed & ipsos pulmones occupante, constanter observavimus.

3tio. Etsi encephalo, utpote visceri, cujus integritas ad vitam summopere necessaria est, rheumatica inflammatio, quam maxime inimica fit, atque illuc delata plerumque cito occidat, alias tamen non ignobiles partes longe minori cum periculo obsidet, quibus *genuina inflammatio* non nisi maximo cum vitæ discrimine inhæret. Sic genuina enteritis merito inter acutissimos morbos recensetur, quæ intra paucas non raro horas enecat. Nos interim rheumaticam ventriculi inflammationem, item aliam intestinorum vidimus, longo utramque durantem tempore, nec gravibus adeo symptomatibus stipatam, ac tandem benigne resolutam, etsi sanguinem emissum crusta adeo crassa obtegeret, ut vix aliquid rubræ partis conspiceretur.

4to. *Genuina inflammatio* intra paucos plerumque dies concluditur, quocunque demum exitu finiatur. Raræ sunt *veræ illæ simulque chronicæ* inflammationes, de quibus inferius erit dicendi locus. Verum rheu-



*matica* ad multas sæpe septimanas producitur, & oppido raro sibi relicta intra exiguum tempus terminatur.

5to. *Rheumatica*, etsi subinde partem quandam peculiariter infestet, latius tamen ut plurimum diffunditur.

Febrilis rheumarismi diuturnitas, dolorisque vehementia, & motuum omnium impotentia ægros multum excruciarunt. Curato etiam morbo subinde stupor artuum, minorque ad motum aptitudo remanebant. Unus, alterve, licet apyretos dudum esset, atque artus moveret, quemdam tamen ad omnia rebellem doloris sensum experiebatur.

Varia est variorum in morbo summe dolorifico, rædiosoque medendi methodus, quarum plerasque in usum aliquamdiu traximus, donec, quæ optima videretur, semper posthac, cæteris repudiatis, retineretur.

Methodum antiphlogisticam Sydenhami, qui eandem fere ac in vera pulmonum inflammatione, sanguinis quantitatem detraxit, aliaque addidit vi refrigerante, donata, etiam nos aliquoties sequebamur. Verum vim medicationis hujus mali diuturnitas non raro elusit, viresque ægrorum citius, ac morbum fugimus. Ægri per multas septimanas immobiles decubuerunt.

Methodi hujus inefficaciam ipsemet Sydenhamus aliquoties expertus a repetitis sanguinis detractationibus abstinuit, aliamque inire viam statuit, ut & sanguini parceretur, atque, quod magis intendebat, ut certiolem, breviorēque huic morbo medendi rationem inveniret. Hinc copiosum lactis serum exhibuit, ut eo solo, & similagineo pane æger per multos dies victitaret.

Hac ratione dolentissimi rheumatismi cum exigua sanguinis jactura, & temporis non mediocri compen-

dio, tam ab ipsomet Sydenhamo, quam ab aliis quoque multoties percurabantur.

*Gastritidem rheumaticam*, itemque *rheumaticam enteritidem*, præmissa venæ sectione & sanguine summe phlogistico educto, solo lactis sero, & tenui diætâ fat cito curavimus.

Eos subinde imitabamur, qui variis diaphoreticis multo liquido dilutis corpus replent, & regimine calidiori instituto morbi materiem per vasculorum exitus, in superficie corporis positos, eliminare annuntur. Verum morbi pertinaciam sæpenumero non vicimus.

Varia adhuc alia ratione rebelli malo mederi fatigimus, verum morbus se ipsum potius tandem confecisse, quam remediis devictus videbatur.

Ubi topica materiæ rheumaticæ depositio erat, eaque parti cuidam firmitus inhæserat, optimo cum successu vesicans quam proxime ad locum dolentem applicabatur. Sic in *ophthalmia serosa*, quam ad rheumatismos locales, sive topicos, pertinere superius dixi, vesicans ad tempora positum votis respondit. Hemicraniam, ortam ex retropressa ophthalmiæ serosæ materia, vesicante penes locum dolentem applicato curavimus, quem unguento digestivo, addito pauxillo saponis diu fluentem, erosumque servavimus.

Odontalgiam serosam, sive rheumaticam, sanabat satis cito vesicans ad angulum maxillæ positum; hoc enim loco nervus maxillam subintrans, qui suos ramos ad radices dentium dimittit, sero rheumatico vellicatus, laceffitisque, cantharidibus applicatis, liberabatur.

Anginas, utut graves, ortas a rheumate aut sinapismus, aut vesicans, toti collo anteriori applicatum, insigniter mitigavit, & abolitam deglutiendi facultatem intra horas non multas restituit.

Dignus notatu morbus erat *pleuritis rheumatica*, sive symptomata, sive methodum medendi spectes. Signa diagnostica collegimus sequentia.

1mo. plerumque præcedebant artuum, sive superiorum, sive inferiorum dolores lacerantes, rheumatici.

2do. hi ipsi dolores artuum pleuritidem sæpenu-mero comitabantur.

3tio. pleuritis hæc incepit subinde absque horrore, aut cum frigore non diu durante, & levi, ubi vera pleuritis valido ut plurimum aliquot horarum rigore tragœdiam ordiebatur.

4to. statim dolor lateris cum levi illo horrore se monstrabat; cum e contrario dolor punctorius in genuina pleuritide primum post aliquot horas a valido illo rigore supervenerit.

5to. dolor in pleuritide rheumatica ad præcordia, ad abdomen, ad totum sæpe thoracem, ad locum interscapularem se extendebat, in genuina vero pleuritide dolor intra arctius spatium concludebatur.

6to. dolor pleuritidis rheumaticæ sæpe ab uno loco in alium migrabat: stabiliior is erat in genuina pleuritide.

7mo. attactum locorum dolentium persæpe non ferebant in rheumatica pleuritide; contrarium in genuina.

8vo. plerumque in rheumatica sano lateri facilius; in genuina vero eidem difficilior incumbabant.

9no. sensus oppressionis, difficilisque spirationis, aut nullus, aut perquam exiguus in rheumatica; luculentior in vera pleuritide.

10mo. lingua, fauces in rheumatica albæ mucosæque ut plurimum erant; siccæ in genuina.

11mo. cutis magis arida, siccitas narium, oculorum squallor, urinæ ruffæ, perpaucae, alvus exigua in genuina; nihil horum vero symptomatum, aut saltem longe minus occurrit in rheumatica pleuritide.

12mo.

12mo. pleuritides genuinæ sæpe in initio *siccæ* & absque sputo fuerunt: perraro sputabant mucosa, crocea, sanguinea, pleuritides vero rheumaticæ rarissime *siccæ* erant, sed tussis tenuit, sputaque mucosa, glutinosa sanguine striata, idque mox in morbi principio. Sanguis in utraque pleuritidis specie summe phlogisticus, hoc solo discrimine, quod in pleuritide *rheumatica* crusta fuerit crassior ut plurimum, majorque, ita, ut parum, aut nihil ferme nonnunquam crassamenti adparuerit. In *genuina* pleuritide crusta plerumque contrahebatur fimbriis circumscripta assurgentibus.

13tio. pleuritis vera acutior erat, majorique cum periculo decurrebat, crisi diebus criticis peragenda, & perturbationi criticæ subjecta; etsi vero pleuritidis rheumatica sputis & urina solvatur, nullam tamen certam legem natura observabat, juxta quam hæc morbi solutio contingeret. Non raro exortis sudoribus solvebatur.

Sedes inflammationis rheumaticæ in hac pleuritidis specie in pleura, musculis intercostalibus, ipsis quoque pulmonibus fuit; hos enim ab inflammatione rheumatica affectos esse demonstrabant sputa sanguinea.

Secundum nuper cadaver est hominis pleuritide rheumatica laborantis, cui portio materiæ rheumaticæ ad cerebrum, ejusque meninges delata phrenitidem, & mortem citam attulit. Si ex unica hac cadaveris sectione concludi de statu pulmonum inflammatione rheumatica laborantium quid possit, statuumdum erit, pulmones rheumatica inflammatione affectos, si in cadavere dissecentur, aliquam duritiem cultro opponere, minorem tamen, ac si vera, & genuina inflammatione laborassent.

Pulmones vere inflammati hepatis substantiam duritiæ in dissecando æmulantur, coloremque lacte roseum



seum exhibent. Præterea particula inde abscissa & aquæ injecta fundum petit. Verum pulmo rheumaticorum in aqua aut omnino non subsidet, aut difficiliter, tardiusque. Colore naturali est, ita tamen, ut roseis hinc inde filamentis intertextus appareat. Cura consistebat.

1mo. in venæ sectione una vel pluribus, prout circumstantiæ exigebant.

2do. in potu emolliente, nitroso, tepido.

3tio. in adplicatione matura vesicantium ad locum dolentem, vel etiam quemcunque alium: subinde sola antiphlogistica methodus sufficit, quin vesicantium necessitas fuerit. Verum ubi doloris acerbitas (ea enim perisæpe multo gravior est, quam in genuina pleuritide) venæ sectionibus non mitigabatur, vesicans latum ad locum dolentem, vel inter scapulas &c. applicatum, brevi dolorem omnem absterfit. Vix tres horæ quadrantes ab admoto emplastro vesicante labebantur, cum jam doloris expertem se æger diceret. Hinc adparet, ab resorpto vesicantium acri stimulo potius quam a diuturna loci affecti erosionem levamen hoc fuisse repetendum. Num sinapismi eadem vi gaudeant, necdum experimento constat.

In rheumatica pleuritide, fracto morbi impetu, sputis vero necdum satis attenuatis, kermes egregios effectus produxit.

In exhibendo kermes minerali, itemque in propinandis quibuscunque expectorantibus ex classe mineralium, non præmature agendum censuimus. Rebus enim jam in vado propemodum positis, medicamentum expectorans maturius, ac par est, exhibitum, novos febriles motus, venæ sectione componendos, aliquoties excitabat.

Hæc morbi curatio fuit, quoties is simplex, nulloque alteri jungebatur. Verum evenit non raro,

ut

ut biliosa simul colluvies adfuerit & *pleuritidem bilioſo-rheumaticam* produxerit. Hoc in caſu expendendum erat, quodnam in corpore vitium, *rheumaticum*, an vero *bilioſum* magis urgeat ! unde modo huic, modo illi occurrebatur, & methodus pariter compoſita adhibebatur.

*Pleuritidem rheumaticam* cum *gennina pleuritide* complicari, atque in hanc abire aliquoties vidimus.

Litem inter Auctores medicos de uſu veſicantium in pleuritide agitaram componi modo poſſe exiſtimo, ſi ea *veræ pleuritidi*, *eique adhuc crudæ* noxia dicantur; alteri vero, *rheumaticæ*, proſicua. Atque id adcurata praxis conſtanter probat.

Eſt fortasſe, qui reponat, nunquam fuiſſe in controverſiam adductum, utrum veſicans pleuritidi *rheumaticæ* medeatur, id enim ab omni ævo in conſeſſo fuiſſe; verum litem in eo verti, an in *vera*, *inflammatoria*, & *effentiali* proſit, aut noceat? ſed reſpondeo: eam, quam appello *rheumaticam*, apte quidem in ſcholis ab *inflammatoria* diverſam ſtatui, docerique; penes lectos autem ægrorum ſæpenumero utramque, non ſine gravi ægrotantium noxa, confundi, cum & in *rheumatica* perſæpe febris valida, dolor lateris atrox, cæteraque ſymptomata tam accurate veram ac inflammatoriam æmulentur, ut error confuſionis facillimus ſit, & quotidianus. Sed an adeo difficilis cognitu utriusque pleuritidis ab ſe invicem diſtinctio eſt, ut exercitatis etiam in arte viris impoſuerit toties, imponatque quotidie? non dignoverint præctici inflammationem ab rheumate? id equidem ita eſſe, ex ſymptomatibus utriusque morbi vix diſſimilibus, atque ex Sydenhamo, uti mox oſtendam, certo liquet. Etenim capite V. ad propoſitum noſtrum ap-prime faciente, quam facile utraque pleuritis pro una eademque habeatur, quid ex hoc errore detrimenti, quæ medendi indicata methodus ſit, luculen-

ter docet, ubi constitutionem adulti autumnii, hyemisque subingredientis sequenti ratione describit :  
 „ cum tempestas placida ac tepens, imo vero æstatis  
 „ simillima, præter solitum ad postremos usque  
 „ octobris dies perseveraret anno 1675, eam vero  
 „ mox exciperet alia multum diversa, frigida scilicet  
 „ atque humida subito ingruens, tussis ubique  
 „ numerosiores grassabantur, quam alio quovis,  
 „ quod meminî, tempore, nemini fere parcentes.  
 „ Quemadmodum tussis constitutioni opitulabatur in  
 „ febre producenda, ita etiam febris, occasionem  
 „ ex tussi natam arripiens, jam pleuram ac pulmones  
 „ haud aliter invadebat, ac caput invaserat vel  
 „ septimana illa, quæ harum tussium exortum fuerat  
 „ prægressa, quæ tam improvisa symptomatum  
 „ mutatio nonnullis, qui minus diligenter adverte-  
 „ rant animum, ansam præbuit, *febrem hanc pro pleu-  
 „ ritide essentiali, aut essentiali peripneumonia habendi*,  
 „ licet eadem omnino illa maneret, atque fuerat  
 „ per integram hanc constitutionem. — Et  
 „ quantumvis lateris dolor punctorius, spirandi difficultas,  
 „ color detracti sanguinis, & reliqua signa  
 „ pleuritidi familiaria, essentialem pleuresin subesse innu-  
 „ erent, non aliam tamen medendi methodum potulavit  
 „ hic morbus, quam quæ febri hujus constitutionis  
 „ quadrabat, ab illa vero, quæ veræ pleuritidi  
 „ conveniebat, abhorrebat admodum. ”

Jam vero hanc Sydenhami pleuritidem eandem fuisse cum *rheumatica nostra*, methodum medendi æque eandem Sydenhamiana cum nostris conferenti liquido constabit. Tota enim curatio apto regimine, una, raro repetita sanguinis missione, & epispastico nuchæ adplicato absolvebatur. Hac ratione symptomata universa placide solebant evanescere, cum, qui morbum ferocius, atque hostili manu adgredebantur, ingenti remediorum molimine bellum inferen-

rentes, vel suos ægros amitterent, vel saltem phlebotomia sæpius repetita, quam vel postulabat morbi genius, vel & tuto ferebat, eorundem vitam redimere cogerentur.

Hinc rationes, ex theoria, ab egregio plurimumque de re medica merito Trallesio, petitæ, veram utique pleuritidem concernunt; verum eas ad *rheumaticam*, utut æque periculosam, æque laboriosam, difficilemque, & sæpe non nisi ab oculatissimo a vera & essentiali internoscendam, adplicatas refutat certa, indubitataque experientia. Nescimus equidem adæquatas rationes, quare febre licet & hic præsentem, & subinde validissima, vesicans, stimulantissimum remedium, in *pleuritide rheumatica* dolorem tollat, febrimque: at vero ratiunculas nostras, utut perpulchras, filere, fida rerum, aliter, ac ratiocinabamur, se habentium, observatio jubet.

Sed quomodo cantharidum stimulus cum crusta illa phlogistica, huic pleuritidis speciei præprimis propria, ut ejus crassities ad signa diagnostica pertineat, concordat? quomodo acerrimum hoc, & summopere movens remedium cum febre convenit? Novimus has difficultates, quas aliis enodandas relinquimus, contenti utramque speciem pleuritidis bene distinxisse, aptamque utrique medelam adhibuisse.

Pleuritides, ab eximio Pringlio observatæ, curatæque, præsentem in hoc morbo vesicantium opem indubiam reddunt. Sed has ex tribu *rheumaticarum* fuisse, ea, quæ ex ipso præclaro Auctore referam, convincunt. Etenim morbus hic anno 1743. in Belgio, tempore verno, noctibus adhuc frigidis, nebulosis, sole vero interdiu paulo magis calente, amænoque, alterna frigoris, calorisque commutatione, commoratione sub tentoriis, loco videlicet humido erectis, in milites sæviit. Plurimi fuere pleu-



pleuritici, & peripneumonici, nec multo minor rheumatismo laborantium copia, ut hinc ex ipso æquali propemodum, & rheumate, & affectis pulmonibus decumbentium, numero, utriusque morbi affinitatem conspiciere liceat.

Præterea dolor pleuriticus sæpe adeo extendebatur, ut inflammationem viscerum abdominalium mentiretur. Pringle §. 4. edit germanic. *Vesicantia in morbi initio statim post primam sanguinis missionem, imo & priusquam ea instituta fuisset, modo paulo post subjungeretur, adplicabantur. Doloze hac ratione sublato, consultum videbatur, alteram phlebotomiam celebrare, nisi fors abortus sudor dolorem solverit, ubi nulla amplius remedium necessitas supererat. Idem ibid.*

Hucusque recensita cum mea huius pleuritidis descriptione belle congruunt, morbiq; genium declarant, atque usum cantharidum præstantem tot inter ægros, observante egregio Pringlio, cuicumque demum hypothefi contrariæ superiorem faciunt. Id adhuc addo, cl. Auctorem sedem mali non in pleura, sed in pulmonibus statuere, sectionibus Morgagnii & Halleri convictum.

En jam canones circa usum vesicantium in pleuritide observandos.

1mus. vesicantia in pleuritide rheumatica, ferme specifica sunt, debentque mox in morbi principio adplicari, præmissa sanguinis missione, subinde & iterata.

2dus. suppuratio post excitatam vesiculam excitari non debet; hinc epidermis non auferatur. Medicamenta suppurationem excitantia dolores inanes faciunt, & febrim augent; non enim suppuratio, sed stimulus vesicantium prodest.

3tius. vim cantharidum medicatricem experiuntur ægri, cuicumque corporis parti vesicans adplicetur. Præplacet tamen locus inter scapulas medius. Sedes

Pars I. E enim

enim hujus pleuritidis pulmo est, aut membrana pulmonem vestiens, uti supra ostensum.

4tus. vesicantia *pleuritidem veram*, atque *inflammatoriam* exacerbant: hinc quamdiu phlogosis viget, ab iisdem omnino abstinendum.

5tus. neque, instituta una alterave phlebotomia in pleuritide inflammatoria, confugiendum mox ad vesicantia est. Atque ut paucis dicam, quamdiu aliqua adhuc inflammatio adest, etsi ea ob celebratas sanguinis missiones a suo vigore multum remiserit, quin imo, quamdiu vel prudens suspicio, metusque est, ne denuo phlogosis recrudescat, vesicantia periculosa sunt.

6tus. quod si vero fracta penitus phlogoseos vis sit: si præcedens ægrotantis conditio in statum contrarium, nimia scilicet fibrarum elasticitas tensioque in laxitatem, humorum inflammatoria densitas in lentorem oppositum frigidumque, eorumque abundantia in penuriam abiverit; si præterea expectorandæ materiæ copia pulmones inundet, opprimatque, aut ejusdem visciditas eos infarciat, vis dejecta vitæ anacatharsi haud sufficiat, vesicantia palmare auxilium suppeditabunt.

7mus. in *pleuritide*, & *peripneumonia biliosa* cantharides, antequam gastricum systema repurgatum sit, nocent. Etenim sudores noxios movent, alvum tardiores reddunt, & materiam circa præcordia hærentem intra humorum circulantium territorium propellunt.

8vus. si vero vacuato ventriculo & intestinis, tenax illud, viscidumque sputum, uti in pleuritide biliosa fieri assolet, difficilem anacatharsin faciat, potus largus, calidus, mitiori stimulo aromatico armatus, & adplicata simul vesicantia omnem paginam absolvunt.

Rheumatismos febriles ad lumbos sæpe, ad co-

xam,

nam, & femur sæpissime curavimus. Adest dolor ad acetabulum, & motus impotentia. Dolor hic per femur externum ad caput fibulæ usque, quin etiam ad malleolum decurrit. Subinde & lumbi, & inguina dolent. Nonnunquam nullus dolor, sed femoris stupor, & gradiendi impotentia vexat. Hoc in casu ad caput fibulæ, sive ad externam genu partem, methodo Cottuniana, latum vesicans adplicabatur cum insigni emolumento. Aliquoties vesicans acetabulo admovebatur. Dabantur lenia diaphoretica ex sambuco & stibio diaphoretico non abluto: loca vesicantibus tentata diu fluentia conservabantur: hunc in finem unguentum digestivum cum pauxillo saponis illitum est. Eadem methodus in lumbagine rheumatica profuit.

Aliam rheumatismi speciem, superius jam explicatam, etiam hoc mense, sed multo rarius, vidimus, ubi colluvies biliosa systema gastricum occuparat.

Habuiamus quosdam his artuum doloribus affectos & febrientes, qui omnes biliosi apparatus notas exhibuere, ubi dato emetico, & cacochylia biliosa rejecta, dolores artuum illico evanuerunt.

Hanc speciem rheumatismi, biliosam scilicet, a resorptis particulis acribus e ventriculo, & ad artus depositis, ubique nervos vellicantibus ortam, frequenter in febribus biliosis, autumnalibus, diuturnisque observari tunc imprimis, quando eæ præmaturo corticis usu sufflaminantur, & materiæ debita præparatio, evacuativæ prægressa non est, supra jam diximus. Id adhuc præcedentibus addo, ægrum intempestiva corticis peruviani exhibitione curatum, ut ut a febre liberum, chronicis tamen artuum doloribus, eoque morbo vexari, quem Sydenhamus *rheumatismum scorbuticum* appellavit, quemve ex nimis diuturno corticis hujus usu provenire arbitrabatur. Verum non cortex, sed usus ejus præmaturus ante

requisitam materiæ febrilis coctionem, & evacuationem hosce rheumaticos dolores genuit.

## J U N I U S.

Mense hoc constitutio aëris moderate calida, sicque fuit: sed ventis frigidis ferme quotidie agitata, unde factum, ut quiescente vento corpora facile in sudores solverentur, eodem denuo revertente compressos.

Initio hujus mensis ad medium usque continuæ remittentes tertianæ, & quædam quotidianæ frequentes fuere, quæ fere omnes emetico, solventibus, & eccoproticis per epicrasin propinatis obedivere. Paucissimæ malignitatem minatæ, cortice peruviano sanabantur. A medio fere mense ad ejusdem finem usque pleuritides, peripneumoniæve biliosæ rarius visæ sunt, copiosiores vero rheumaticæ. Rheumatismi universales, ischiades plures, ac alias, comparuere. Mense quoque ad finem vergente, quibusdam, morbo bilioso laborantibus, petechiæ supervenerunt, quarum eruptio morbum neque graviolem, neque faciliorem, reddebat.

Et si veræ pulmonum inflammationes non hoc solum mense, sed & toto hoc verno tempore solito rarius viderentur, nihilominus cum pleuritidem bilioso-inflammatoriam, sive pleuritidem veram & essentialem cum vitio primarum viarum bilioso junctam, multarumque feracem observationum, curaverimus, juvat ejusdem historiam referre.

Vidua annos 55. nata, quæ integra a longo jam tempore sanitate fruebatur, die 14ta Junii circa vespertas horret per aliquot horas, dein æstuat, fitit magnopere: nox inquieta.

Altero die (15ta) mitius æstuantem circa meridiem pectus opprimitur, latusque dextrum a costis spuris ad mammam more pleuritico dolet. Tussitatio frequens,



quens, sputa nulla, laboriosa respiratio, atque cubandi in latus dolens difficultas summa. Sanguis mox eductus ex brachio est: crusta summe phlogistica, & oppressionis levamen, brevi tamen evanidum; rediit enim & dolor lateris, & oppressio pectoris paulo post. Ea vespera denuo horruit mitius, minusque diu, ac pridie: æstus: nox anxia.

Die 16ta mane eadem. Sputa nunc mucosa, sanguine tincta. Fuit denuo venæ sectio: sanguis idem, & idem levamen, Vesperi horror. Nox, uti pridie.

Die 17ma mane eadem omnia. Ad meridiem dolor, tussis, & oppressio augentur. Sputa jam nulla: Vesperi horror: æstus. Nox ut antea.

Die 18va ægra mitius per omnia se habere asserit: tussitat: sputat mucosa, flava. Latus non dolet, & facilius in latus ante dolens cubat. Levis vesperi horripilatio: nox quietior.

Die 19na ad Nosocomium deportatur. Dolor lateris vix ullus, nullus oppressi pectoris sensus. Cubatus in omnem partem facilis. Tussis rara: sputa pauca, mucosa, flavescentia: pulsus naturali modice celerior, subdurus; lingua biliosa: sitis multa: sapor bonus: alvus hucusque facilis. Non appetit. Capite non dolet: moderate calet, animus præiens, & alacer: prompta responsio: actorum adcurata narratio, facilisque quaecunque in partem vellet, conversio. Vis musculorum quasi mediocriter ægrotanti, aut sanæ propemodum. Respiratio, utut ipsimet ægræ facilis videbatur, citissima tamen, & abdomine potius, quam thorace, peragebatur. Instituta sanguinis missio: ingens crusta. Potus anti-phlogistici, copiosi. Exigua emendatio. Nulla vesperi horripilatio. Somni turbati.

Die 20ma nihil incommodi queritur. Omnia uti pridie; pulsus solum fortior, pleniorque hesterno. Respiratio citissima, solo ferme abdomine peracta:

fit venæ sectio: sanguinis crusta phlogistica tanta est, ut vix aliquid cruoris appareat. Levamen exiguum. Circa meridiem pectus sibi opprimi queritur: genæ intensius rubent, cita & parva respiratio cum intercurrente levi per intervalla animi deliquio. Hic inde parvæ in pectore petechiæ colore roseo conspiciuntur, Denuo sanguis mittitur a meridie, atque iterum vesperi, unde melior aliquantum respiratio fiebat, somni noctu longiores.

Die 21ma Junii omnia, ut heri vesperi. Sed cum spirandi difficultas dehinc inciperet, pulsusque semper pleni, fortes, & subduri, etsi magna identidem sanguinis copia demeretur, persisterent, binæ hoc die venæ sectiones institutæ sunt, & adplicatum ad pectus vesicans est. Crusta phlogistica eadem. Vesperi larga diaphoresis, & respiratio multo quam hucusque melior. Somnus tranquillus, protractus.

Die 22da Junii, cum diem morbi octavam agit, diaphoresis heri coepta continuat. Urina per totum morbi decursum tenuis, atque ex ruffo crocea, nunc citrina est. Pulsus, qui toto morbi tempore naturalibus non multum celeriores, pleni tamen, & subduri fuere, nil modo vitii habent. Paucissimæ petechiæ: alvus hodie sæpe mota suapte est. Sputa vix ulla; & respiratio emendata: nox bona.

Die 23tia continuat diaphoresis, alvus cocta, frequenter sua sponte mota, cætera ut heri. Nox bona.

Die 24ta larga diaphoresis, per omnia bene habet.

Die 25ta Junii mane nulla diaphoresis, oris amaror, sitis magna: a meridie alvus denuo sponte fluit: nox bona.

Die sequenti cum adhuc aliquoties sponte dejiceret, oris amaror, & sitis disparuere, atque inde nil amplius

plus molestiæ passa, recuperatis brevi viribus, a nobis sana discessit.

• En periculosam pulmonum inflammationem, vitio bilioso systematis gastrici stipatam.

Vere exacto, sub exordium æstatis morbi inflammatorii sensum pedem quotannis retrahunt, desertamque ab iis stationem biliosi occupant. Hoc fere tempore, quod utramque hanc anni partem, ver scilicet, & æstatem nectit, mixtum quoddam morborum genus plerumque dominatur, ex verna phlogosi, & bile æstiva compositum. Medendum utrique malo est, sed illi promptius, quod gravius urget. Hinc omnem propemodum in solvenda pulmonum inflammatione operam consumsimus, crudam ventriculi colluviem, quæ modum non excedebat, copioso potu enervantes.

Transitum pleuritidis in peripneumoniam malum esse, Hippocrates asserit, & assertum hoc observatio comprobavit. Cum enim inflammatio pulmonum, quæ & pleuritidi & peripneumoniæ ex æquo convenit, altius penetraret, difficilisque per hoc viscus humorum circuitus sanguinis a capite refluxum moraretur, rubuere genæ, respirationem abdomen per egit immoto thorace, pressumque ab accumulato humore cerebrum doloris sensum, præsentem licet ejusdem causâ, abstulit. Hinc pleuritidem eousque intensam, ut omnis molesta sensatio, cerebro laborante, pereat, cum periculo in peripneumoniam abiisse Hippocrates jure dixit.

Mentis præsentia, alacritas insolita, præteritorum exacta memoria, & narratio prompta cum insolita quadam, etsi ad rem accurate pertinente, loquacitate, attentum medicum adeo non decipit, ut hoc ipso *infido levamine* de gravissimo periculo admonitus, perniciem, ægri jugulo intentatam, universo artis apparatu quantocius avertere connitatur.

*Insidum id levamen* esse præcipue respiratio docuit, quam maxime, ac fere unice in morbis pectoris observandam Baglivius voluit. Hæc si prava fuerit, time semper, etsi omnia reliqua eventus exoptatos portendant.

Inito calculo septuaginta sanguinis uncix iteratis venæ sectionibus eductæ sunt. Copiosi potus ex decocto hordei, & oxymelle propinabantur. Regimen universim frigidissimum fuit; nihilominus petechiæ, etsi paucæ, comparuere. An ergo petechialis eruptio soli regimini calido debetur, & prava artis prava progenies est?

## J U L I U S.

Ineunte Julio minor atmosphæram calor, quin & frigus tenuit, ac pro hujus temporis ratione alias solet. Circa medium aër incaluit, at neque hic juxta morem aliis annis solennem. Ultimi mensis dies ejusdem principio respondebant. Fructus horæi pauci, insipidi.

Febris hoc mense inter infimam plebem sæpius ac præteritis mensibus apparuit, quam malignam, & petechialem ab efflorescentiis petechialibus, aut petechizantem appellant, ob id, quod, etsi ægros sæpe nullo exanthemate pingat, eadem nihilominus ratione decurrat, & iisdem cæteroquin symptomatibus stipetur.

Quæ circa febres exanthematicas, aliasque congeneres observavi, in futura tempora rejeci, donec lectis, collectisque aliorum, quæ huc faciunt, ac inter se, & cum meis comparatis observationibus, cum tam multiplex hæc febres contemplandi occasio in eo populi, ad hocce Noloscomium affluxu, sese quotidie offerat, limatius quid dare potuero, quodve in tanta opinionum circa hanc rem, tamque an-

cipiti



capiti varietate, in emolumentum artis, & miserrum mortalium cedere queat.

## PLEURITIS OCCULTA SIVE LATENS.

Morbus est, aut potius morbi cujusdam gravioris fomes perpetuus, quem Baglivius pleuritidem, aut peripneumoniam *latentem* appellat. Hanc cum initio hujus mensis aliquoties, & fere solito frequentius viderim, breviter delineandam centui.

Cognitu non raro difficilis hic morbus est, quod characteribus formatæ jam, veræque pleuritidis aut peripneumonix maximam partem destituatur. Febris nulla prorsus plerumque est; decubitus in utrumque latus aut facilis, aut non multum molestus. Tussicula rara, sicca, aut cum sputis paucis, coctis, mucosis. Lingua modicissime albescent, sitis nulla, oppressio pectoris non nisi in motu corporis, appetitus vicens, nulli febriles per intervalla motus, aut exigui. Nihilominus malum hoc si negligatur, aut in formatam gravemque, & universaliorem pulmonum inflammationem exsurgit, aut, quod pluries fit, in pulmonum indurationes abit, atque tubercula producit, aut, quod æque frequenter contingit, in phthisin terminatur.

Plures sunt phthisici ex neglecta exigua hac pleuritide, quam ex sæviori graviorique pulmonum inflammatione facti, non quod major in phthisin hujus morbi proclivitas sit, sed, quod aut prava tractetur methodo, aut curæ indignus habeatur, negligaturque.

Detegitur hæc occulta pleuritis aut peripneumonia.

Imo, ex descriptis superius symptomatibus.

2do si æger modo in hoc, modo in alterum latus sese convertere jubeatur, atque attendere, num quilibet decubitus æque ipsi facilis sit: num fors uni lateri incumbens tussitare debeat: num angustiores ipsi, difficilioremque fieri spiritum in hoc potius situ, quam in alio experiatur.

3tio. æger jubeatur fortius inspirare, exploreturque, num is inter respirandum aliquid in pectore incommodi, aliquem dolorem punctorium, ardorem, pressionemque sentiat.

4to. data opera validius aliquoties in vario corporis positu tussitet, & attendat, num quid molesti, pungentis, ardentis, prementisque doloris sentiat.

5to. status ægri prægressus diligenter examinetur. Sunt enim morbi, qui hæc pleuritides occultas, & peripneumonias sæpissime post se relinquunt. Nam

1mo. post veram & essentialem pleuritidem, eamque debite curatam, judicatamque, nihilominus restitat nonnunquam aliquid in thorace incommodi, ea ratione, qua paulo ante dixi. Nulla interim febris adest, & perfecta adeste sanitas videtur, si exiguum illud molestæ sensationis excipias, ob quam, postquam reconvalescent jam ex morbo, data quacunque occasione relapsus denuo in peripneumoniam, aut pleuritidem fit; nam leve hoc post pleuritidem incommodum rarius ab adhæSIONIBUS novis pulmonum cum pleura, frequentissime vero a superstite exigua phlogosi, particulam pulmonis pertinacius occupante, deduci posse videtur. Hinc ejusmodi ægri, etsi a morbo restituti, perpetuum tamen novarum pleuritidum fomitem intra thoracem foveant.

2do. post rheumatismos febriles, ac inflammatorios, post pleuritides, ac peripneumonias *rheumaticas* idem accidit.

3tio. sunt, qui, prægresso catharro per multas septimanas, quin & menses, levi alterutro lateris dolore, ardo-

ardore quodam, licet exiguo, oppressionis sensu, sputis non purulentis, sed puriformibus, coctisque veniantur, quin propterea decumbant. Hos levior hæc & occulta Baglivii pleuritis ac peripneumonia afficit.

4to. qui pulmones tuberculis oblitos habent, si quacunque ex occasione incaluerint, vino, motu, sole, atque circuitum humorum incitarint, his sæpe unum alterumve tuberculum inflammatur, quin propterea febre universali totumque corpus prehendente corripiantur.

Diagnosin ex hucusque dictis formare facile est. Est scilicet levis inflammatio particulæ solum pulmonis, quæ diu latere non raro potest, quin propterea noto quodam phlogoseon exitu terminetur. Certum enim est, dari morbos inflammatorios *etiam chronicos*, phlegmonem *veram sed chronicam*, quæ diuturno tempore cruda persistit, antequam vel benigne resolvatur, vel in suppurationem abeat, vel induretur, vel gangrænescat.

Prognosin quod spectat, id sciendum, occultas hæc pleuritides, ac peripneumonias vel in morbum gravem, acutum, inflammatorium abire, vel benigne resolvi, si detegatur, & apta curatione tractetur, vel, more aliarum partium inflammatarum, in suppurationem verti.

Hæc vomicarum clausarum in pulmonibus frequentissima genesis est. Cura est antiphlogistica omni modo. Venæ sectio una, quin & plures subinde requiruntur, & emulsa nitrosa, potus emollientes cum oxymelle, & nitro. In pleuritide hac *occulta*, quæ a materie rheumatica illuc deposita provenit, vesicans ad locum dolentem applicatum optime convenit.

Pleuritidem *veram inflammatoriam, sed chronicam* aliquoties videre est in hominibus collo longo, corpore gracili, pectore compresso exiguoque, genis roseis, fibra tenera, delicataque, ac summe irritabili

dona.

donatis. Hic longissimo tempore cruda inflammatio peritat absque aliquo consueto inflammationum aliarum exitu. Tandem sputa cocta, non *purulenta*, sed *puriformia*, qualia concocto catarrho solent, prodire incipiunt, copiosaque, quæ pectoris oppressio- nem, doloremque punctorium minuunt. Verum cum ea magna quantitate & diuturno tempore evacuen- tur, æger emaciatur, contabescit, moritur, quin unquam vere purulenti quid deprehensum fuerit. His si emollientia, mucilaginosa præscripseris, facile fe- runt, pectore non gravantur, interim aucta sputo- rum quantitate magis emaciantur. Remedia tonica, lichen islandicus, egregius alias in alia phthiseos specie, materiam expectorandam supprimunt, & pecto- ris incommoda augment. Balsamica, cortex, equita- tio *hanc phthiseos speciem* brevi mortiferam efficiunt.

Qui descripto corporis habitu, tenui, delicato- que præditi sunt, multoties sanguinem sputant: hos iterato, sed parca semper quantitate missus sanguis, dicta vegetabilis, & antiphlogistica vivendi ratio ferme semper relevat, in multosque conservat annos, quos methodus roborans, adstringens, balsamica in phthisin veram, consummatamque, ac mortem ma- jorum finem præcipitat.

## AUGUSTUS.

Constitutio sicca, æstus magni, nullis, aut non nisi raris imbribus subinde temperati. Ultimi men- sis dies sereni æque, sed quidam eorum perfrigidi fuerunt.

Fructus horæi paucissimi, immaturi, insipidi.

Diarrhœæ multæ, dysenteria non paucæ, chole- ræque virebantur: mense inclinante febres putridæ, petechiales, continuæ, quotidianæ, tertianæ.

Maximus hoc mense agrosantium numerus fuit,  
at



at morbi plerumque faciles, non diuturni: funera pro tanta ægrorum copia perquam rara

Hoc tempore æque ex primis viis laborabant, ac præterito: attamen id discriminis inter morbos biliolos hujus & præteritorum mensium intercessit, quod, qui nunc ægrotarunt, vomuerint difficilius, vitellina, amurcosa, glutinosa, gluten scriniariorum, aut ichtyocollam æmulantia, & universim pauciora, non ex defectu materiæ gravantis, sed, quod ob ejus tenacitatem pars magna restitaret, nondum mobilis, aut excretioni apta; pars autem alia, eaque non exigua, absorpta infarciret vasorum systema, massam circulantium humorum coinquinaret, & vasculis infixæ hæreret altius. Ob eam rationem repetita emesi non raro opus fuit, quam per epicrasin exhibita sæpius ipecacuanha movimus.

Id hoc mense aliquoties nobis contigit, ut radix hæc, quacunque ratione exhibita, aut nullam, aut non nisi unicam cieverit emesin, quia, ut opinor, ejusdem vis, stimulusve multo glutine obvolutus iners reddebatur. Id præterea est observatum, eos, qui dato emetico non vomuerant, ea ferme proportionem pejus manifesto habuisse, qua, qui probe vomuerant, statim a vomitu levabantur. Circa finem mensis, relicta ob rationem recensitam radice ipecacuanha, cujus vires hucusque periclitari voluimus, solutionem tartari emetici resumpsimus, eventu, quem sperabamus, exoptato.

Continuæ remittentes, quarum exacerbationes aut stata rediere lege, aut per incertos periodos recurrerunt, medicamentis solventibus, & interposita nonnunquam tartari emetici solutione, eaque sæpius aliquando repetita, sanabantur. Id solum peculiare hujus temporis febres habuere, quod & potentioribus indiguerint solventibus, & emetico validiori. Hinc quibuscunque spissum in ore gluten, lingua  
glæ-

glabra, prærubra, præcalida, consimili vitio præcordia laborare, ac morbum difficilius solvendum monstrarat, remedia convenerant, quæ præter saponem vegetabiles, salem quoque ammoniacum, glutinosa potentius discindentem continerent. Solennis nobis formula fuit, quæ aquæ sambuci Unc. v. oxym. simplicis & roob sambuc. aa Unc. i. sal. ammon. Dr. ij. — iij commiscet, & partitis vicibus intra 24 horas propinat.

Hiscæ usi continuo sumus, nisi. quod intercalari tempore subinde data potio emetica fuerit.

Observatum hac tempestate est, neminem ægrorum nostrorum, assumpto hoc sale, de molesto ad cardiacam sensu questum fuisse, quod tamen vernis mensibus frequenter evenerat, ut tunc temporis a multo minori ejusdem dosi non raro ob ægrorum querelas abstinere debuerimus. Major solidorum inertia, mucusque hoc tempore & copiosior, & tenacior ventriculi latera obliniens, observati phænomeni rationem, ipsiusque medicamenti incidentis, attenuantisque aptitudinem demonstrat.

Pierisque, quibus vis vitæ sufficiens, & subigendæ materiæ par fuit, hac sola ratione profuimus. Verum ubi materiæ alienæ copia, aut tenacitas tanta erat, ut vires coctrices, fors ineptis venæ sectionibus, aut undecunque, dejectæ, solo salis hujus adjumento eandem subigere, & per vias congruas eliminare non valerent, optato cum effectu radicis Arnicæ pulverem junximus. Multæ rationes sunt, alia occasione explicandæ, cur in febribus plerisque gastricis, mesentericis, putridis, malignis, quibus vulgata modo praxis corticem peruvianum opponit, radicem hanc a solertissimo Collinio, viro de arte nostra egregie merito, multiplices in usus tractam, præstantissimo cæteroquin peruviano remedio præponam. Diarrhœas maligne febrientium diuturnas, quæ-

quæve vires convellunt, hæc radix præ quovis alio medicamento fortunate compressit.

Salis quoque ammoniaci multiplex commendatio apud practicos semper fuit, isque in antisepticorum non vulgarium familiam recipiebatur, Verum cum morborum horum antumnalium genesin, præcipue paulo pertinaciorum, in crasi sanguinis soluta, lepticove fluidorum statu reponerent, & effectum non necessarium pro causa reputarent, cumque insuper non paucos hoc sale adjutos, eos potissimum, quibus incisum hocce remedio gluten fuerat, conspicerent, conclusionem de vi salis ammoniaci antiseptica formarunt.

Dysenteria longe, lateque per urbem, suburbia, atque circumjacentem agrum hoc mense grassabatur. Morbus hic quosdam bene per omnia se habentes repente invasit, ita, ut alvum primo bonam, dein cruentam mucosamque ponerent. Ad finem mensis quosdam tormina, & alvus statim cruenta, cum recte paulo ante adhuc valerent, quasi ex composito & non opinantes corripuere. Quidam febrim per dies complures passi sunt ex continuarum remittentium classe: tandem in dysenteriam morbus convertebatur. Alii per multos dies tormina patiebantur: demum alvus supervenit dysenterica.

Fuerunt, qui per aliquot dies lassitudinem, & dolorem urentem circa ventriculum questi sunt, dein, eo cessante, torminibus vexari circa umbilicum succedente paulo post alvo dysenterica, ceperunt. Obscurior febris in plerisque observabatur, quamdiu dolor abdominis, & tenesmus urgebat. At symptomatibus hisce evanescentibus, etsi cruenta, mucosæque perstaret alvus, motus tamen febriles nulli amplius advertiebantur. Paucis & ante dysenteriam, & ea vigente febris continua fuit, mirior ut plurimum, & per incertas periodos exacerbari solita. Dejectio-

nes primæ fuere rariores, fæces vero copiosiores: aucto sequentibus diebus dejectionum numero, & tormina, & tenesmus æquis fere passibus increvere, at minor tunc excretorum identidem quantitas fuit, & fæcibus ad initium bonis successit varia colore & consistentia materies, æruginosa non paucis, quibusdam amurcosa, profunde viridis, mucosa, sanguini commixta. Morbo jam confirmato accessit mictus frequens, stranguriosusque: lotium parca quantitate singulo mictu missum, biliosum, ac saturate flavum fuit. Dolor abdominis quibusdam continuus, plerisque per intervalla solummodo recrudit, proxime secuturæ dejectionis nuntius. Abdomen dolens attactum paulo rudiores non tulit. Paucissimi ingens solummodo pondus absque dolore circa umbilicum querebantur. Cardialgia morbi subinde prodromus, eo jam vigente aut nulla, aut multo minor. Lingua pura, aut parum abludens ab habitu naturali: sapor vitiosus, attamen minus ac tempore morbum proxime præcedente: & universim is oris & ventriculi status, qui sordes biliosas, acresque profundius fitas demonstraret, quam ut ejus præsentiam lingua, & fauces loquerentur. Nulli vomendi conatus: nausæ nullæ.

Varia methodo huic morbo medebamur, & plurimos sanitati restituimus integræ. Unus, cum diutius jam extra Nosocomium decumberet, mortem occubuit dysentericam, atque alius in hydropem incidit. Morbum in quibusdam pertinacem experti, animum omnem in partem convertebamus, ut brevior, tutiorque medicinam faceremus. Tandem sub mensis finem, atque per totum Septembrem, & sub exordium Octobris, stabilem dysentericis medendi rationem amplexi, quam plurimos, intra non multum tempus, & cum constantia sanavimus.

Nunc,



Nunc, quæ ad initium Augusti acta sunt, paucis referam.

Ipecacuanham primis, qui obvenerant, ægris propinabamus. Verum decantatum hoc antidysentericum non ita profuit, uti binis consequenter annis profuisse in Hungaria videram. Rationem hanc esse arbitrabar, quod materies morbum committens crassa supra modum esset, parietibus systematis gastrici firmitus adhæreret, aut ipsa fortassis materiæ dysentericæ sedes profundius in intestinis, atque ita sita fuerit, ut ipecacuanha revocari, & per os rejici nequiverit.

In Hungaria, ubi radicem ipecacuanhæ eximie conduxisse dysentericis dicebam, oris amaror, vomitus, vomituritiones, anxietas, præcordiorum molesta sensatio gravius multo ægros afflixerunt, quam in hujus tempestatis dysenteria, ubi ventriculi læsi signa perpauca vilesbantur.

Levioribus dysentericiis, & ad quas sanandas primis statim diebus accersabar, sequenti ratione in urbe, & suburbio vicino medebar: scilicet, injuncta tenui diætâ, æger omni hora, aut singulo saltem bihorio diu noctuque vasculum feri lactis sumpsit, in cujus lb. iij. solutæ erant pulpæ tamarindorum Unc. iij. adjuncta exigua dosi liquoris anodyni mineralis Hoffmanni. Quibusdam infusum rhei aquosum cum emolumento dedi. Hoc remedium continuabatur per duos plerumque dies, quo tempore dolor abdominis, tenesmus, stranguria ferme ex integro disparuere: at eadem dejectionum cruentarum, mucosarumque frequentia mansit. Contigit aliquoties, ut post numerosas dejectiones liquidas dura tandem scybala subsequerentur. A vespertino anodyno destiti, ni continuæ fors dejectiones omnem omnino somnum præpedirent, quod cum fieret, granum laudani exhibitum exiguum saltem ægro quietem,

refocillandis viribus adeo necessariam, conciliavit. Tandem, ubi a doloribus immunitas aderat, alvus tamen frequens æque ac antea esset, pulveres exhibui e mirobalanis, rheo tosto, & opii pauxillo compositos.

In quibusdam gravioribus dysenteriis, alvo tenesmoidea, frequentissima, mucosa, cruenta, torminibus stipata gravibus, plus emolumenti, durante primo stadio, mihi visus sum observare a pulpa tamarrindorum, aut prunorum soluta in decocto hordei, omisso stimulo quocunque salino, omissa & ipsa, miti licet, tinctura rhei aquosa. Alvi frequentia adeo quidem minuta non est, ut & augeretur, sed omnis in abdomine, circa anum molesta sensatio sensim diminuta, tandem disparuit. Lotium & libere, & absque doloribus mittebatur, fæces rejectæ cocti quid continebant, ut adeo primum dysenteriae stadium feliciter decurreret, & malum medicamento roboranti, adstringenti, mucilaginoso, opiato, aut illi, quod ex omnibus hisce coaluit, postmodum cito auscultaret.

Fuerunt, qui, etsi eorum dysenteria a gravissimis symptomatibus ordiretur, lenissimis paulo ante recensitis eccoptroticis in decursu stadii primi usi, præter illam a torminibus, tenesmo, & stranguria immunitatem, etiam id commodi obtinuerunt, ut alvus non solum absque doloribus, sed & parcius, rariusque flueret, & redderet sanis similiora, donec eodem continuato remedio, nullis nec opiatis, nec adstringentibus in auxilium vocatis, res in integrum restitueretur. At hos nihilominus invigorante remedio, stomachicove contra facillimum in priorem infirmitatem relapsum præmunire oportebat.

Inter ægros tuere quidam, quibus alvus torminosa uno alterove die moderate fluxit, atque æruginosa reddidit, verum suapte fluxus alvi substitit,

intestinorum cruciatu persistente, dolore ventriculi gravante, urente: mictu parco, stranguriosoque: oris amarore: jactitatione: atque ubi malum gravius urgebat, delirio quoque superveniente. *Dysenterias has imperfectas* datum emetico-catharticum, solutio scilicet tartari emetici intra breve tempus egregie certoque sustulit.

Alii iisdem, quibus dysenterici solebant, symptomatibus affecti, oris amarorem, cardialgiam, ventris tormina, mictum difficilem, sed alvo aut naturali, aut suppressa, querebantur. *Colicam hanc biliosam* ejusdem cum dysenteria proscapiæ, jugis potus solvens, datumque antimoniali emeticum cito & tuto absterfit.

Circa finem hujus mensis calculum ex vesica sectione eximi curavimus, cujus historiam referre hic juvat.

Juvenis, 15 annorum, filius militis, a triennio circiter post emissum lotium ardorem in perinæo experitur, qui per octavam horæ partem a mictu durat, evanidus postea. At si stando, aut ambulando mingat, nullus post mictum ardor affligit, neque etiam, si super sellam perforatam, aut ita sedeat, ut inter sedendum nulla perinæi pressio fiat. Die 15ta Augusti ad nos venit. A duobus fere mensibus arenulæ prodeunt, subinde & mucus *ductilis*, aut *materies mucosa* quidem, carens tamen ductilitate. Cum arenulæ solæ, tum & mucus ductilis cum ardoris per urethram sensu prodit. Ab hoc duorum mensium spatio & mictus solito frequentior est, & præprimis noctu molestus.

Aqua calcis cum æquali lactis copia & sapone veneto febriculam, mictum frequentiore, stranguriosum excitavit. Hinc mutata mox medendi ratione, præcipue cum ab adplicato difficiliter cathe-

tere, partium levis contusio accederet, præscriptum est medicamentum sequens:

R. Decoct. hordei adjecta  
liquiritia parati lb. 11.  
gummi arabici Unc. 1.

Diæta quoque maximam partem vegetabilis injungebatur. Die 29no Augusti æger asserit, se raro jam, & singula vice plus lotii mittere, cum antea frequentius quidem, attamen parcius mingeret; ardorem in perinæo jam nullum sentiri, sed sensum quemdam ibi loci rei alienæ percipi, utut exiguum, nec multum incommodum, statimque evanidum, neque post singulos mictus. Exigui calculi sæpius sub usu medicamenti hujus mucilaginosi, & majores ac alias, sed minori cum molestia prodivere: quod si malum nulla posthac incrementa sumpturum esset, se hac forte contentum fore ajebat, seque ad omnes aptum labores arbitrari.

Nihilominus cum hac ratione levamen solum temporarium conciliaretur, & æger, utut nunc doloris propemodum expers, tamen probabilius in priorem statum relapsurus erat, placuit sectione calculum eximere, quam dexterrimus hujus Nosocomii Chirurgus dominus Sartori manu exercitata die 30ma Augusti peregit. Usus eo cultro est, quem *Lithotomum occultum* appellant.

Operationem aliquantum morabantur frustra aliquot confracti intra vesicam calculi, qui totus asper, & friabilis erat, si nucleum multo duriores excipias.

Finite sectione, repositus in lectum æger, toto reliquo tempore nil præter morem incommodi patiebatur. Victitabat jusculo tenui, decocto hordei, emulsis. Elapsis aliquot diebus, oleribus cum jusculo carniū vescebatur. Die 26ta Septembris nulla amplius per vulnus urina prodibat, idque penitus eo

die



die coaluisse visum est. Lecto quoque exemptus, horam sedendo exegit. Die 10ma Octobris prima vice lentis & exiguis passibus per cubiculum gradiebatur. Die 17ma Octobris sanus discessit.

Ad feliciorem operationis eventum plurimum contulit, quod eam æger non nisi probe præparatus subiverit, tenuiori diætâ, ac vegetabili antea usus.

Lithotomiam instituturis suadendum, ne, si de præsentia calculi certi per catheterem facti sint, ægrum posthac frequentius adplicato cathetere vexent. Vesica instrumento frequentius irritata, difficilius sectionem sustinet, & secta, facilius, majorive cum periculo phlogosin concipit.

Varia instrumenta ab artis peritis pro facilitanda Lithotomia excogitata prostant. At vereor, ne & hic ea optima sint, quæ simplicissima. Scalpelli firmum, firmo donatum manubrio, fors omni alio instrumento præstat. Secabit enim, qui scalpello utitur, quousque, & quantum volet, nec hilo plus, minusve. Sectionem visus diriget, & firmior manus: nec alio, quo eandem perficiat, instrumento, opus erit.

## S E P T E M B E R.

September ab initio ad finem usque perfrigidus fuit, siccusque. Febres continuæ, remittentes, ex putridarum, & biliosarum familia populum affligerunt; minor tamen ægrotantium numerus hoc mense fuit, quam præterito, etsi, qui nunc ægrotabant, diutius decumberent. Paucissimas intermitteutes, quotidianas, tertianasque vidimus, & quartanas non nisi duas brevi & absque negotio, præter indolem quartanarum hoc præprimis Anni tempore, solis propemodum solventibus salinis cum constantia perfanatas.

Circa finem prioris mensis, & toto reliquo per au-

tumnum tempore, quo dysenterix sæviebant, aliam dysentericis auxiliandi viam inivimus, quam cum tutam certamque experiremur, fere solam posthac, rejectis aliis, sequebamur.

Ægris hisce ut primum ad nos venerant, copiosum potum ex decocto hordei, & oxymelle simplici exhibuimus: die sequenti antimoniale emeticum, tartari videlicet emetici solutionem propinavimus. Mictus ante parcissimus, stranguriosus, tenesmi, tormina, plerumque miraculi instar statim ab emetici operatione emendabantur. Alvus longe minus frequens brevi ita comprimebatur, ut post duos tresve dies medicamento indigerent alvum denuo molliter sollicitante. Finita emeto-catharsi solo ferme decocto hordei, cui oxymel & pulpa prunorum intabuit, utebantur, donec intra exiguum tempus medicamento invigorante contra relapsus præmunirentur.

Paucissimis post emesin rheo tosto, mirobalanis, atque opio in pulvèrem commixtis opus fuit.

Vir diligentissimus, atque egregius observator Collinius æque certo suis dysentericis sola arnicæ radice medebatur. Nullam is evacuationem, uti ex fidis relationibus accepi, instituere solebat, etsi humorum biliosorum copia non mediocri gravarentur. Ope radice hujus materies dysenterica subacta, immutataque, atque in benignum humorem conversa nocere desit.

Hanc methodum, etsi perutilem audieram, ob id tamen hucusque non sum amplexus, eamque in futura tempora reservavi, quod hæcce me hac tempestate nunquam defereret.

## O C T O B E R.

Ut cæteræ hujus Anni partes minus solito caluerunt, sic & October frigidior, ac plerumque soler, & siccus fuit: circa finem nebulæ multæ.

Mor-

Morbi chronici, hydropes, icteri, infarcta abdominis viscera, ob prægressas hac æstate biliosas febres, nos multum exercuere. Multi catarrhum questi sunt, tussimque noctu præprimis permolestam, quam sensus in hypochondriis, ad ventriculum, vel & inferius in abdomine dolorificus & præcedere, & comitari solebat, ita, ut hoc abdominis dolore de mox adfutura tussitatione præmonerentur.

His antea febres fuerunt intermittentes, aut suapte, aut non ex arte curatæ.

Tussis hæc, ad stomachicarum tussium speciem pertinens, remedia, pectori alias dicata, nequaquam admisit, sed ea, quæ glutinosa potenter incidunt, solvuntque, ac soluta, rejectaque per emeto-cathartin materie, ventriculo, & intestinis robur addunt. Rheum, elixirium stomachicum temperatum, decoctum lichenis, & polygalæ profuerunt.

Quicumque intermittente, aut remittente quadam febre hoc mense laborarunt, de spurio hoc pectoris affectu, difficili scilicet respiratione, & oppressio- nis sensu, tussique multa querebantur. Sputa aut nulla prodire, aut pauca, glutinosaque.

Perdifficile nonnunquam nobis accidit, *verane*, an *spuria* hæc pulmonum affectio esset, an malum in ipso thorace infarcto, inflammarique incipiente natum sit, an vero a primis viis attractum, probe internoscere; idque eo difficilius erat, quod hoc tempore utrumque sæpe vitium, levior nempe pulmonum inflammatio, & biliosum quid, mucosum- que a ventriculo oriundum una jungeretur.

Hinc consultum arbitrabamur, iis, qui complicata hac pectoris affectione laborabant, aut quos ea laborare suspicabamur, pauxillum sanguinis de- trahere, eosque diuturniori solventium, & diluen- tium usui addicere, donec, quam cœlum frigidius pulmonibus adpersisset phlogosin, dissipatam existis-

maremus, intra paucos ut plurimum dies evanidam. Interea vero, quod in tubo intestinali latuerat vitium, biliosum, mucosum, putridum, sese luculentius exerere, pluresque præsentiæ suæ, & indubitatos dare characteres cœpit. Vomitorium tunc, quod in initio *propria* thoracis affectio prohibuerat, insigniter profuit, cui fortunate salis ammoniaci largiores doses subjunximus.

Frequentior multo venæ sectionis necessitas fuit hoc, quam elapsis mensibus, &, si ab ipsomet ægro, priusquam ad nos veniret, præter rationem instituta esset, minus nocuit.

Quartanas jam multo plures, quam priori mense habuimus non rebelles, solventibus salinis, sale imprimis ammoniaco, datoque emetico usum solventium interpolante, vel ex integro curatas, vel ita cicuratas, ut sumpto cortice cito & cum constantia profligarentur. Quasdam quartanas remittentes æque levi brachio, & eadem methodo persanavimus.

Observare mihi visus sum, eas quartanas, quæ aut remitterent solum, aut vix intermitterent, citius faciliusque dicta ratione curari, quam illas, quæ paroxysmos habuere breves, sed inviolabili lege modoque redeunt, quæve intermedio tempore ægro nil, aut perparum incommodi reliquerunt.

Quartanarum maxima pars priori adhuc mense nata fuit, verum ægri post exantlatas primum aliquot accessiones nostram opem implorarunt: hinc factum, ut, etsi September quartanarum præ aliis feracior esset, plures tamen mense primum Octobri nobis curandæ obvenerint.

Quotidianæ, & tertianæ febres nec numero, nec pertinacia eas superarunt, quæ alios aliorum Anno-rum autumnos infestant.

Dysenterix paucissimæ hoc mense, plures tamen immi-



immitis morbi reliquæ comparuerunt, dolores videlicet, tumoresque, ac immobilitas articulorum. Accidit id in illis, quibus mala medicatio fluxum ventris stitit. Hic diversa profuere. Materiem dysentericam non raro male sedula medicatio intra viscera dato opio concludit; retentus vero fomes tunc sanguinem subit, & aut corpus oberrat, aut articulis, locisque illis, ubi tardior humorum motus, vasaque angustiora sunt, profunde insidet, maximeque sensiles partes vellicat.

Multi quoque hoc mense, uti etiam proxime elapso, fuerunt, quos tormina stranguriæ cum oris amarore cum in modum vexabant, quo dysenterici solent, silente alvo. Id mali, siue colicam *biliosam*, siue *siccam dysenteriam* malis appellare, eandem, ac ipsa vera dysenteria, curam postulat, & ni ventrem probe vacues, sed solis diluentibus, ac involventibus impugnes, tardam ægro, tædiolamque, & persæpe inutilem medicinam facies, morbumque, qui modo in ventrem detonat, haud difficulter inde pellendus, ad articulos, locave exquisitissimis persæpe medicamentis inaccessa convertes.

Morbus articularis non raro etiam febres biliosas excipit, eas duntaxat, quas cortex præmature silero iussit, aut, quæ sensim suapte fatiscebant.

Nullam hic cortici remediorum principi notam inustam volumus, cum præmaturum solummodo ejusdem usum incusamus. Uti enim diutius solvendo, præparando, eliminandoque materiam febrilem, febris ipsa multoties alitur, donec, sero licet, ad corticem confugiatur, ita e contrario inepti est, artemque ignorantis, audito mox febris nomine, nullo prorsus ad materiem febrilem respectu habito, largas corticis doses ingerere.

Vidimus ex multiplici hac origine naras arthritides non paucas. Profuerunt lenia purgantia, salina,

na, &, si morbus levior erat, ea ipsa remedia, quibus morbus, arthritidis genitor, si medicum scientem nactus esset, procul dubio auscultasset. Verum, quorum articulis malum profundius infixum hæsit, iis remedia ex potentiorum solventium classe deprompta profuere. Kermes minerale, sulphur antimonii auratum tertiæ præcipitationis, hisque nonnunquam potiora, aconitum, flammula jovis (vicina interea loca vesicante erosimus) saturata chamædryos, & chamæpytios decocta sæpissime votis respondebant. Quibusdam malum adeo alte insedit, ut potentissima remedia eluserit: his ternis, quaternisque consequenter diebus emplastrum latum vesicans ad eundem semper locum apposuimus. Post aliquot dierum tormenta dolor omnis ubicunque, atque etiam extra locum vesicante tentatum existens, aut corpus oberrans, orta diaphoresi larga, vel & pustulis prurientibus per totam corporis, artuum præcipue, superficiem excitatis, evanuit.

## N O V E M B E R.

Mense hoc varia tempestas lussit: cælum modo serenum, modo pluviosum: nives: tepor: frigus; ita tamen, ut nulla aëris qualitas aut exorbitaret nimium, aut diutius persisteret. Morbi longe pauciores ac reliquo totius Anni tempore, iidemque propemodum, qui præterito mense, si dysenterias jam modo compressas excipias.

## D E C E M B E R.

Mensis hic ad zomum usque raras pluvias, frigus tolerabile, nives copiosas habuit. Inde rigidum gelu, nives copiosissimæ. Hoc tempore lumbagines non paucæ, item tumor in alterutro genu summiopere dolens, & motum impediens, cum, vel etiam sine ischiade, Quibusdam articulus humeri doluit cum

immobilitate brachii. Multis glandulæ subaxillares tumeant, dolebantque, quæ subinde in suppurationem abivere. Plurimis, iisque potissimum fæminis, dolor, noctu ingravescens, femora, crura, pedesque per intervalla pervasit: febricitabant plerumque, sed moderate, & more vago. Tussis multæ, multoque plures, ac aliis hucusque mensibus.

Prout ab æstivo, & autumnali tempore longius provehebamur, ita rarius, mitiusque ex primis viis laboratum est, ingruente frigidiori anni parte ferocientem æstatis bilem comprimente. Verum per hoc tempus spissior facta humorum fere omnium indoles alios produxit morbos, atque alias, ac antea, corporis partes occupavit. Sanguis & compactior, & ad vasa, frigore nunc magis constricta, validius attritus, phlogoses non paucas generavit. Aquosa humorum portio æquo tenacior, vascula minutiora circa articulos, partesque tendinosas, ac glandulas locata, difficiliter permeavit. Facilis hinc explicatio est & rheumatismum complurium, & inflammationum nunc seorsim, nunc junctis una viribus affligentium.

Numerus ægrotantium multo minor erat, quam per æstatem: & qui nullam infirmitatem chronicam ad hunc morbum attulere, facile convaluerunt. Funera, si qua fuere, ea morbi longis, phthisi maxime, & consummato hydropi debebantur.

Exanthemata σποραδην & rarissime, & paucissima visa hoc, & præcedente mense sunt, ac ea fere ratione sensim disparuere, qua morborum biliosorum dominium contrahabatur.

## ANACEPHALÆOSIS.

Πολυμορφον morborum popularium genium per hujus Anni decursum sæpius mirabamur, cum in alio alia sit & morbi facies, & intensio, duratio, & eventus

tus alius. Nihilominus in tanto symptomatum lusu ejusdem epidemiei morbi, atque in ipsa diversarum epidemiarum successione mira quædam simplicitas obtinet, sive causam morbificam, sive vero genuinam methodum medendi spectes; illa enim varios ad speciem morbos, sive potius unum solummodo morbum, producet, sed qui diversissimos, atque alios in aliis mentiatur, prout vel aëris constitutio, vel corporis diathesis, quam quisque sibi propriam, atque ab alio diversam habet, *ejusdem morbificæ causæ vires diversimode* applicuerit.

Hæc vero paucorum remediorum, eorumque simplicissimorum usui, quem efficacem experientia docuerit, facile acquiescit, non, quod plura non suppetant; sed quod pluribus, in tanta causarum simplicitate, supersedere queamus.

Juvat nunc unico quasi intuitu totius Anni ad finem modo perducti constitutionem contemplari.

Ineunte Anno inflammationes pulmonum frequentes fuere: his pleuritides, & peripneumonix successerant a bile prognatæ. Denuo febribus biliosis intermittentibus, remittentibus, varia periodo, legeque recurrentibus æstas infestabatur. Autumnum proxime & præcedebant, & comitabantur dysenterix, biliosæ utique profapix, febribus æstivis sensim vela hoc tempore contrahentibus.

Sub initium hyemis febres inflammatoriæ denuo caput exerebant, morbique alii, ad phlogosæon familiam pertinentes.

En per totius Anni decursum modo sanguinis, modo bilis prædominium, vel temporibus intermediis æquale utriusque imperium, junctasque vires! En a gemina hac origine multiplicem morborum faciem, sed non adeo multiplici remediorum supellectile persanandam!

Fortunate medebitur, qui remedii exhibendi oc-



casiones sagax captat, quive repertæ indicationi potius, quam specificæ cuidam remediorum virtuti confidit.

---

## SECTIONES CADAVERUM.

### SECTIO PRIMA.

**S**ub finem Aprilis anni 1776. sectum cadaver fuit, cujus historia morbi, & anatomes hæc est:

Vir 40 Annorum, opilio, cum præterita æstate per Italiam pecudes ageret, vino italico, cum & itinere ipso, & fervidiore cœlo frequentius æstuarer, solito largius indulgit. Domum redux in Germaniam, sero autumnio tussitare primum, pectore oppresso esse, & asthmaticorum instar spiritum trahere cœpit. His incommodis per totam hyemem conflictatur absque remedio, si duas, tresve per tempus hoc venæ sectiones excipias, quas semper insigni cum levamine instituit.

Die ipso paschatis rigor horarum aliquot cum succedente æstu hominem corripuit: respiratio longe difficilior, oppressio pectoris major, quam hucusque, dolorque punctorius ad mammam dextram cum sputo cruento accedit. Ter vena secta est, sed quo morbi tempore, quæve sanguinis missi quantitas fuerit, ignoro: id solum ab ejus uxore rescivi, sanguinem crusta inflammatoria crassa, tenacique coactum fuisse. Cæterum an ullum, & quale remedium fuerit adhibitum homini ruri habitanti, & solius chirurgi curæ commissio, non scio. Negavit tamen uxor, quidquam fuisse adplicatum. Die mor-

bi-

bi decimo septimo in Nosocomium deferitur: respiratio summe laboriosa, dolor punctorius ad mammam dextram, pulsus celerior naturali, & in brachio affecti lateris obscurior multo; mollis, non debilis. Sputa multa mucosa, pauca cocta: decubitus in latus dolens impossibilis, sed talis, ut nec supinus omnimode, nec etiam in latus sinistrum cubaret. Strepitus in pectore inter respirandum quasi ferventis aheni. Sanguis illico missus crustam summe phlogisticam exhibuit, unde levamen doloris punctorii secutum, persistente eadem streperæ respirationis difficultate: pulsus evolutior: sputa eadem.

Altero die denuo vena secta, idque etiam quarto die factum, tum quod memorata inflammationis symptomata perseverarent, cum etiam quod recrudesceret pungens in latere dolor. Hoc die pulsum minus mollem, vere fortem ante venæ sectionem deprehendi; at a venæ sectione celebrata paucis horis exspiravit die morbi vigesimo.

Cadaver pectore hirsuto, & musculorum robore insigni, ab assistente chirurgo incisum, sequentia exhibuit:

Pulmo dexter ex toto inflammatus erat, portione suprema, præcipue qua dorsum respicit, excepta, quæ sana omnimode quartam pulmonis partem effecerat. Lobi, in quos pulmo dividitur, tum inter se, tum ad pleuram ubique validioribus cohæsionibus nectebantur, eamque illæsam, ac nullibi inflammata. Dexter hic pulmo majori suo volumine sinistrum urgebat, pressio sinistrorsum mediastino, & remoto sternum multum protuberabat. Ex sectorum bronchiorum orificiis albidus ac subflavus prodibat humor, qualem sputa mucosa, alba, intermixtis quibusdam coctis referunt. Pulmo sinister sanus, excepta parte ejusdem media dimidii fere pugni magnitudinem æquante, & inflammata. In corde, ac va-

sis

sis majoribus polyposæ, & albæ ut plurimum concretionibus erant. In pericardio plus feri collectum inveniebatur, quam communiter fieri assolet. Serum pariter in sinistro thoracis cavo repertum 20 fere uncias æquabat. Viscera abdominalia sana per omnia fuerunt.

In hac historia plura occurrunt, quæ nostram attentionem promerentur.

Imo. status ille asthmaticus per totam hyemem miserum affligens, quemque sola venæ sectio solabatur, nullas alias asthmatis causas videtur admittere. Pulmones, qua parte inflammatio abfuit, omni modo sani fuerunt, inflammati vero sat luculenter demonstrarunt, se ante hanc inflammationem omni alio vitio caruisse. Hinc asthma hoc, quo per hyemem premebatur, ex *continua & chronica inflammatione* profectum fuisse, indubitatum videtur. Constat enim, nullos dari certos inflammationis terminos, quibus elapsis ea noto quodam exitu solvatur, cum per multas sæpe septimanas, & menses cruda inflammatio persistet. Sunt, quos respiratio difficilior, dolor exiguus punctorius in latere longissimo tempore infestat, etsi omnibus cæteroquin muniis fungantur cum pulsu aut sanq, aut ab eo non multum abludente. Subinde sola difficilior respiratio est cum pulsu naturali, tussicula, & pectoris oppressione: abest dolor punctorius, nisi, si fortius inspirent, aut validius data opera tussiant, aut quacunque ratione cursum sanguinis incitent.

Morbi hi *veræ pleuritides*, & *peripneumonice* sunt, verum *chronicæ*: cumque ut plurimum absque motu febrili sint, & ita affectos lecto non affigant, ac characteribus, alias hosce morbos pulmonicos comitari solitis, destituantur, *latentes* a Baglivo appellantur, quas magno ægrorum emolumento sæpius detectas fuisse asserit, dum pungens lateris dolor aut

validiore tussi, aut profundiore inspiratione studio facta sese exfereret, aut quodnam in latus difficilior decubitus esset, exploraretur. Sed de his superius actum abunde est.

2do. æger fuerat pleuro-peripneumonicus, dolor vividus admodum, etsi pleura nullibi inflammata deprehenderetur.

3tio. cum die morbi 20mo morbus crudus adhuc deprehenderetur, apparet nullum posse statui dierum numerum, ultra quem venæ sectiones non admitti queant, neque ubique obtinere aphorismum 8vum L. 5. *Quicumque pleuritici fientes in 14 diebus non repurgantur, his ad suppurationem transitio fit.*

4to. æger in statu cruditatis ex eo moritur, quod pulmo inflammatus alterum sanum comprimat, omnemque humorum circuitum suffocet. Largissimæ venæ sectiones, quæ se invicem excipiunt, si primis statim morbi diebus instituantur, suffocationem fors subinde præpedire valent.

Recenset clarissimus Morgagni L. II. Epist. anat. med. XXI. art. 26. 27. 28. epidemicam pulmonum inflammationem, quæ hyeme Anni 1738. nusquam magis quam in quibusdam monacharum cœnobiis sæviit, & plures, paucos intra dies, sustulit. Cadaverum dissectio exhibuit gravissimam totius pulmonis inflammationem, qua ægrotæ brevi suffocabantur, cæ præcipue, quæ laxioribus ac imbecillioribus antea pulmonibus fuerant.

Statum hunc morbi crudissimi, ubi pulmo alteruter, infarctu inflammatorio turgens, spatio suo contineri nequit, & in vicinum thoracis cavum protuberat, atque sufflaminando sanguinis per corpus periodum occidit, Hippocrates designasse videtur, dum de pulmonis ad latus prolapsu L. 2 de morbis sic ait. „ Si pulmo ad latus prolapsus fuerit, „ tussis tenet, & erectæ cervicis spiratio, & sali-

„ vana



„viam tussiendo rejicit albam, & dolor ad pectus,  
 „& dorsum emergit, & incumbens pulmo impel-  
 „lit, & grave quiddam in pectore incumbere vide-  
 „tur, & dolores acuti pungunt, & sanguis stridet  
 „velut pellis, & spirationem cohibet, & ad affe-  
 „ctum quidem latus decubitus sustinet, non autem  
 „ad sanum. Verum velut grave quiddam ipsi de  
 „latere pendere videtur, & per pectus transpirare  
 „se putat.”

Subdit dein curam: *hunc calida multa bis in die lavato, & aquam mulsam ipsi bibendam dato.*

5to. pulmonis inflammati color lacte ruber erat, consistentia tali, qua hepar esse solet, atque ea gravitate, ut particula abscissa, atque aquæ immissa fundum petierit.

6to. in utroque ægroto, quin in aliis compluribus verum deprehendi effatum Hippocratis in coacis prænot. Afferentis: *quibus pleuriticis strepitus sputi multus in pectore est, & facies tristis, & oculus morbi regii colore infectus, ac caliginosus, hi pereunt.*

7mo. ratio, quare in latus dolens cubare non potuerit, non adeo in propatulo est, nisi hanc hujus rei causam esse existimemus, quod pulmo sinistè in medio inflammatus, atque ad latus hinc inde religatus, suo pondere dextrorsum premens pleuram, abstrahere connisus fuerit, sicque molestiam intulerit.

8vo. quorsum referre causam doloris punctori oporteat in pleuriticis, vel pleuro-peripneumoniacis, necdum videtur exacte constare. Id solummodo certum per observationes est, pleuram ea ratione absolvi posse, ut dolor ab ejus inflammatione, utpote quæ sæpius abest, non semper repeti debeat, quamvis, si revera phlogosi teneatur, ea sic affecta, citra acuti doloris sensum, respiratorio thoracis motu distrahi nequeat.

Fors non inepte doloris causam ex arctis illis pulmonum cum pleura nexibus, multoties explicare possumus, cum pulmo turgens, seque ipso durior, majorque factus, versus alterum thoracis latus prominet, aut, ut phrasi Hippocratica utar, ad *latus prolabitur*, quod certe fieri nequit, quin simul nexus hi urgeantur, ac distrahantur, & pleuram sollicitent.

yno. feri collectio primum hoc ultimo morbi tempore facta fuisse videtur; pressis enim majoribus vasibus, & retardato sanguinis per pulmones circuitu, tenuiores particulæ per ramulos laterales elabuntur, aut verius, exprimuntur. Accedunt & aliæ rationes, ex quibus hæc hydrothoracis species explicari potest, quasve Cl. Morgagni L. II. epist. anat. med. art. 34. paulo accuratius persequitur.

omo. pulsus arteriarum obscuri, humiles, contractique in latere, aut unice aut magis affecto, ferme semper observantur. Infida præterea indicatio est, quam tum in quocunque thoracis morbo, cum & præcipue in pulmonum inflammatione, ex pulsu venamur. Securior illa est, quam respiratio, majorve, aut minor morbi tolerantia subministrat.

## SECTIO SECUNDA.

Virum ætatis mediæ secui circa medium Aprilem, qui nono, ni fallor, morbi pleuro-peripneumonici die ad Nosocomium delatus est: omni hucusque auxilio caruit. Respiratio strepens, difficillima, elevatis summo cum labore scapulis ac thorace, ore, ac pinnis narium diductis, & erecta cervice peragenda. Ad lectum delatus, cum decumbere non valeret, inter maximos trahendæ respirationis conatus sedens moritur.

Pulmo sinister per totum inflammatus, & vicinæ pleuræ per multas fibras membranaque nexus, mag-

nam thoracis dextri partem oppleverat, & ejusdem lateris pulmonem sanum per omnia arcte compressit. In cavo thoracis dextro aquæ ad duas facile libras repertæ sunt. Vasa cordis coronaria mirum in modum dilatata, & multo sanguine turgida visebantur. Pleura ubique sana etiã hic ostendit, doloris pungentis sedem in pleuritide, aut pleuro-peripneumonia male in ejusdem inflammatione quæri.

Viden & in hoc casu *pulmonis prolapsum ad latus*, & serum in cavo thoracis, quo latere is sanus fuit, collectum. Vasa coronaria solito longe ampliora facilem habent explicatum ex laborioso sanguinis per pulmones meatu. Cor ipsum post repetitas pulmonum inflammationes magis amplum, & ferme aneurismaticum non raro reperiri, captæ per anatomicen observationes docent.

### SECTIO TERTIA.

Pistor 32 annorum prima Martii sæva pleuro-peripneumonia correptus ad Nosocomium deferitur. Institutæ quatuor venæ sectiones sunt, aliaque, quæ antiphlogisticorum nomine veniunt, ea, qua par est, attentione applicata. Melius inde, licet tarde, habere cœpit; mansit nihilominus respiratio naturali paulo impeditior cum dispositione quasi catarthosa. Accessit anxietas: pulsus celeres semper, & duriusculi: sitis nulla: decubitus in latus dextrum, quod sanum fuerat, impossibilis. Die morbi 10 no dolore corripitur acutissimo in molli hypochondrii sinistri parte: sitis, febrisque urgent: facies hominis quasi exsanguis, ac labia pallidissima fuerunt. Omnibus, quæ indicata videbantur, in usum tractis, factaque terna missione sanguinis summe phlogistici, qualis pleuriticorum esse solet; dolor, qui in abdominis latere sinistro, non multum infra sep-

tum transversum hæere visus est, non longo post tempore disparuit. Mansit tamen pulsus celer supra modum absque exacerbationibus. Dyspnœa major: facies, & totum corpus tumere incipit tumore leucophlegmatico: in abdomine fluctuatio persentiscebatur. Hinc, atque etiam ex aliis, quæ præcessere, hydropis purulenti suspicio nata. Sudores nocturni copiosi, & alvus subinde citatior ægrum exercebant. Diarrhœa tamen facile pulvere myrobalanorum, & rheo tosto compressa fuit. Urinæ tum in dolore illo acuto, qui abdominis esse putabatur, cum & postmodum, citrini coloris, & fere naturales fuerunt. 7ma Aprilis orthopnœa subito correptus, dum ex lecto in vicinum mundiorum reponeretur, vivere desiit. Prima morbi tempora, quæ ipsemet non vidi, fida narratione accepi.

Cadaveris, tumore leucophlegmatico ubique tumens, thorax sinister ultra duodecim libras puris dedit. Pleura sana fuit, eique hinc inde laciniae quædam adhærebant, quæ parietes sacci, in pulmone nati, & in cavum thoracis rupti, ex parte effecere; Diaphragma tam alte in abdomen ex illo latere, ab incumbens puris copia pressum, descenderat, ut dolor, qui abdominis esse putabatur, in thorace fuerit, atque inde ortus, quod saccus pure plenus ad ruptionem urgeretur, & divulsæ membranæ dolerent. Pulmones ambo, magis vero sinister, erosi reperiuntur. Abdomen duas circiter seri libras continebat, a qua tam exigua quantitate manifestam fluctuationem non facile repetere licet, ut adeo etiam hinc constet, quantum hujus fluctuationis sensui fidere quis possit. Sana omnia abdominis viscera reperta sunt.

Febris, qua detinebatur, uno tenore perseveravit, nullis, quæ sub sensus caderent, exacerbationibus  
stipata,



stipata, & notis illis destituta, quæ alias febrim a pure resorpto natam produunt.

## SECTIO QUARTA.

Die 26ta Maji cadaver me, & aliquot medicinæ Candidatis præsentibus, ab assistente chirurgo sectum fuit, cujus hæc morbi historia est:

Vir 54 annorum, a multis jam annis aurigæ officio functus, die 13tia Maji ad Nosocomium deferitur, queriturque urinam a quatuor diebus penitus suppressam. Adplicato mox cathetere multum lotii eductum est, sed obstaculum, circa collum vesicæ repertum, difficilem instrumento aditum fecit. Pus, ut relatum a chirurgo erat, nullum est animadversum. Quæ tunc ab ipso ægro, cum & ejus uxore post mariti mortem rescire poteram, narrabo.

Junior in Italia apud principem quemdam, munus aurigæ faciens, aliquot annos exegit: ibi se ægrotasse ex suppressa urina, & cathetere adjutum fuisse, uxori in hoc ultimo morbo fatebatur.

Ab illo tempore complurium cum utraque uxore (alteram enim jam duxerat) liberorum parens, potui, ut hoc hominum genus assolet, multum alias deditus, hoc tamen ultimo, quo vixit anno, vino moderate admodum, & ferme omnino non utebatur. Hoc etiam anno frequentiori mictu, eoque difficiliore, præcipue noctu, exercebatur, ut bis, terve præter morem de lecto surgeret, urinam missurus.

Initio Martii ab equo ad partes genitales percussus, magis conqueri de frequenti, & dolorifico mictu cœpit, itemque de urinæ stillicidio. Circa initium Aprilis domi ex pleuritide diebus tredecim decubuit. Bis ipsi primis diebus morbi vena secta est: cæterum præter mixturam quamdam a medico præ-

scriptam, nullo alio auxilio utebatur. Convalescere ex morbo videbatur, ita, ut denuo aurigæ vices subiret. Verum tussicula cum sputis flavescens, & quædam non magna oppressio pectoris ex morbo supererant.

Post initium Maji mictus difficilior, & magis stranguriosus, ac ante hac, quin & subinde penitus suppressus ægrium torquebat, cerei tunc tenuioris auxilio, quem ipse ea methodo, qua olim in Italia usus est, versus apicem magis extenuaverat, ac oleo inunctum urethræ immiserat, lotium misit, educto cereo denuo suppressum.

Tandem ad nos delatus est, cum a quadriduo nullam amplius urinam misisset, & toto hoc tempore nihil potulentorum assumpsisset, ne, ut ajebat, urinæ quantitas accresceret. Febricitabat pulsu forti, duroque, siti multa, faucibus siccis, uti inflammati solent. Secta vena est: sanguis eductus crustam phlogisticam, eamque crassam, exhibuit. A venæ sectione urinæ libertas fuit: verum cum noctu denuo suppresseretur, sitisque urgeret magna, denuo secta vena est: sanguis crassissima crusta phlogistica tegebatur. Usus interea est decocto hordei cum oxymelle, emulso seminum frigidorum cum nitro. Applicatum præterea est emolliens cataplasma ad perinæum, radicem penis, & ad pubem. Inde urina libere posthac fluxit, sed fluxu continuo stillante. Verum quarto die, ex quo ad Nosocomium venerat, diarrhœa accedit, nulla ratione comprimenda, etsi aliquoties rheo tosto, myrobalanis, laudano fuerit suspenso. Nullus ullibi dolor: animi indifferentia peculiaris: pulsus antea celer, fortis, durus, nunc humilior fit, debilisque, celeritate non nimia. Lingua pura siccescere primum, dein arida, lignea fieri: accessit & is oris habitus, quem risum sardonium appellant, quique continuo per septem,

tem, octove ultimos, quos vixit, dies morbi perstitit. Subdelirium, delirium, decubitus membrīs inordinate projectis. Varia data sunt, quæ vi antiseptica celebrantur. Rediit subinde mens per intervalla, pulsus non raro elatiores facti, denuo subsidebant. Sinapismis, vesicantibus, aliisque excitantibus, antisepticiis morbum frustra tentavimus. Vesicantia fortissima binis vicibus eidem locò apposita, vix exiguas vesiculas hinc inde excitarunt. Die 25ta Maji moritur.

Proximo die sectio cadaveris sequentia exhibuit :

Thorax sectus ex cavo dextro fudit libram propemodum aquæ paucò pure inquinatæ. Pleura cum pulmone abscessus non magni parietes effecit, quibus ruptis illud pauculum puris aquæ mixti profluxit. In sinistro thoracis latere pulmo ubique cum diaphragmate necebat, si locum excipias, qui duas fere puris uncias intra pulmonem, & diaphragma conclusas habuit. Inter pulmonem & pleuram, qua illa locum scapulæ objectum investit, pariter abscessus latebat, puris uncias facile quinque continens. Idem cavum libram dimidiam aquæ dedit. Pulmones variegata superficie, & sani cæteroquin reperti sunt. In corde, & vasis ejus majoribus concretiones polyposæ.

Recluso abdomine hepar solito longe majus, sed sanissimum, offendimus; lien duplo major, quam alias solet, sanus & ipse per omnia, sed, si digitis paulo rudius contrectaretur, nimis friabilis. Ren sinister innumeris & exiguis abscessibus plenus, solito longe major, & tubulorum bellinianorum, qui pure turgebant, is habitus, ut abscessus potius viderentur: ita quoque interna renis substantia mutata reperiebatur, ut pus non aliunde delatum, sed ibi natum apparuerit. Socius ren, & intestina nil præter ordinem habuerunt. Nulla bubonum vestigia,

aut cicatrices inventæ. Vesica, carneis crassisque parietibus donata, pauca granula, uti ovula formicarum, sed rubra in fundo suo exhibuit, quæ discissa pus fudere. Urethra e corpore exempta, dissectaque ostendit duos abscessus ruptos utrinque, atque in prostatica locatos, quorum dexter minor facile nucem moschatam caperet, sinister autem triplo major. Plures quoque in illa vicinia hinc inde positi abscessus perquam exigui, qui dissecti pus bonæ notæ dederunt. Nullæ alias alibi excrescentiæ, & canaliculi Morgagniani frequentes viscebantur. Urethra versus glandem prærubra, & quasi inflammata apparebat. Testis dexter fere duplo major visus secabatur, verum aqua intra eundem, & membranam vaginalem collecta, eum tumorem mentiebatur, Caput ob temporis penuriam non est sectum, neque uretheres, aut vesiculæ seminales examinatæ.

Plura sunt, hoc in casu notanda. Utur æger toties examinatus nil fateretur, quod ipsum gonorrhœa quondam laborasse demonstraret, multa tamen sunt, quæ hanc opinionem admodum probabilem reddunt. Videntur a longo jam tempore obstacula in urethra latuisse a male curatis, aut neglectis, ut fere fit, gonorrhœis nata. Hinc aliquando fit, ut, nisi diutius adhibito mingendi nisu, urina non prodeat, tot obstaculis, penes quæ transprimi debet, effluere prohibita. Sunt, qui per omnem vitam huic difficultati obnoxii vivunt, quin gravius quidquam inde unquam sequatur. At vero, si ea obstacula phlogosis prehenderit, seque ipsis majora evadant, canalem obturent penitus, necesse est.

De natura horum impedimentorum multum disputatum jam sæpe fuit. Cl. Brunnerus ephemer. N. C. cent. I. observ. 97. excrescentes in urethra carunculas inter figmenta chiiurgorum retulit, & naturam horum obstaculorum in quadam potius urethræ in-



signori contriotione, ac coarctatione posuit; cum e contrario Cl. Genselius eph. N. C. cent. 6. observ. 84. acriter pro carunculis contenderet. Verum cum per sectiones anatomicas constet, vestigia cicatricum in urethra reperta esse, cumque ora calliculorum morgagnianorum, quo sedes gonorrhœarum leviorum verosimiliter locatur, inflammari, erodi, coalescere, atque communi illa lege, qua id omnes reliquæ partes possunt, luxuriante carne, nodosæque cicatrice repleri queant, non video, quid improbabilis, vel etiam ab observatis alieni hæc opinio habeat.

Urethram subinde ab exstantibus obstaculis liberam nihilominus in uno, vel in pluribus locis præter modum coarctari constringique, uti Cl. Brunnerus voluit, non paucæ observationes probant.

At vero alterius naturæ obices præter superius enarratos reperiri, pariter extra dubium est; glandulas videlicet in urethra locatas, induratas, tumentesque, quæ, si propius sphincterem sint, impedimento sunt, quominus exacte vesica claudi queat, ut adeo urina penes tubercula hæc utrinque continuo stillicidio elabatur, donec ejusmodi tumores altius assurgant, & urethram ex integro obturent.

Hoc ultimo obstaculorum genere, glandulis videlicet tumentibus, inflammatis dein, & accrescente multum phlogosi tandem suppuratis, æger noster laborasse videtur. Hinc ille mingendi natus ad transprimendam urinam: hinc etiam explicatur, quomodo urinam penitus tandem suppressam tenuiori cereo immisso, quamdiu is urethræ impositus maneret, de nouo evocarit.

Cereus immissus equidem urethram magis obturasse videtur, at vero, pressis ope cerei tuberculis, non ita exacte canalis obstruebatur, quin non utrin-

que via restaret, per quam urina se subducere poterat.

Hoc adjumentum a cereo vel specillo quocunque etiam illi experiuntur, qui carnes habent excrecentes, & urethram obstruentes.

Quibus vero urethra contricta, coarctataque, præcipue si tortuosum ejus iter sit, nihil ab hisce specillis auxilii habent, nec etiam a candelis vi medicamentosa, absumente, erodenteque imbutis, plurimum vero non raro incommodi; irritata enim urethra fortius stringitur: urina tenuissimo filo, & stranguiose abit; accedit irritatarum partium inflammatio, & ischuria.

Morbi urethræ, utut frequentissimi, tamen nescio, quo infortunio, curatu difficillimi sunt, & maxime discrepantes de medendi methodo opiniones vigent. Sunt, qui omnes candelas medicamentosas rejiciant, & nullas admittant, nisi quæ sola mechanica ratione superius explicata obstaculum reprimant, & urinæ exitum parent. Sunt itidem alii, & forte maxima medentium pars, qui iisdem eo scopo utuntur, ut obstacula absumantur.

Viri, qui multum in hac re experientiæ habent, quique sæpissime hisce candelis apud ægros suos usi sunt, parum aut nihil levaminis, & plurimum incommodi suis ægris hac medendi ratione attulisse mihi aliquoties fatebantur. Meæ autem observationes circa usum candelarum pauciores adhuc sunt, quam ut certi quid de illis statuere queam. Id interea verum est, in his paucioribus meis casibus candelas medicamentosas juvisse nunquam.

Curationis difficultatem inde ut plurimum provenire opinor, quod mali diagnosi perdifficilis sit, & de obstaculi natura ac indole difficulter constet.

Quærendum itaque est, an glandularum, in urethra sitarum, tumor morbi, sive is stillicidium, sive stran-

stranguria, vel & ischuria fuerit, causa sit? dein, & quæ tumoris illius species sit? aliam enim medelam scirrhusus tumor, aliam is, qui ex inflammatione glandulam prehendente nascitur, atque aliam glandulæ habitus laxior, tumorque ortus à mucro copiosius collecto, & glandulam distendente postulat.

Vidi ischuriam, & mictum tenesmoideum, qui mucro albedo benigno per urethram fluente cessabat; verum elapso ferme dimidio die, sensim denuo nascebatur, prout muci hujus excretio minuebatur, quæ penitus sublata, omni fere horæ quadrante ingens ad matulam tenesmus redibat, donec maximo adhibito mingendi conatu denuo mucus ille exprimi, emulgerique inciperet cum mali decremento.

Hanc scenam morbus vix non quotidie semel lussit. Raro factum est, ut per duos continuos dies æger absque obstaculo mingeret. Profuerunt solventia salina, præcipue aquæ selteranæ sine lacte potæ. Æger sensum rei, canalem versus ipsius radicem obstruentis, toties habuit, quoties urina difficiliter pergeret; at fluxu restituto nullum alibi dolorem, ardoremque, aut obstaculi sensum querebatur. Interposita solventibus roborantia sunt, sed nullum remedium topicum adhibebatur, quod æger id omnino renueret.

Examinandum præterea, an constrictio, coarctatioque urethræ, an vero prominentes carnes, aut cicatrices nodosæ adfint, ut, si facta accuratior diagnosis sit, scire possimus, quid potius *non facere* expediat, quam ut incerti de morbi natura per varias, & sibi non raro quam maxime oppositas methodos, absque certa lege vagemur.

Febris inflammatoria siti, pulsu forti, pleno, duro, aliisque se manifestans, & alii quidam non abfimiles casus nos determinabant, ut omissis candelis, educta per catheterem urina, methodum mere anti-  
phlog

phlogisticam arriperemus, & cataplasmate emollientissimo vicinas partes foveremus. Glandulas tumentes illam in transprimendo lotio difficultatem, quam a tot annis experiebatur, attulisse opinor: sed cum tumores hi non assurgerent magis, minus inde multabatur, donec tandem phlogosi correpti in majus volumen expanderentur.

Aurigæ officium multum poterat conferre, quo facilius inflammatio hæc tubercula afficeret, cum concutiente carpenti motu, vel & magis adhuc, si quis equo infideat, partes urethræ vicinæ exagitentur, atteranturque.

Accedit, quod id hominum genus, uti de hoc nostro ex relatione uxoris constat, vino, & cerevisiæ deditum sit, iisque vilioribus, acidis, diureticis, inflammantibus.

Præterea & illud notandum, quod totius mali origo est, gonorrhœas in ejusmodi hominibus aut negligi omnino, aut prava admodum methodo curari.

Plura male curatarum gonorrhœarum exempla nosco, non a chirurgis solummodo minus expertis, sed aliis, etiam medicis, quos diuturna, & luculentior praxis commendabat.

Sæpius mirabar, qui fiat, ut in morbo tam frequenti tam non exacta medendi methodus sit, & tot graves quotidie errores committantur. Plures vidi casus, ubi dato validiori purgante, qui mos quondam etiam inter doctissimos viguit, & nondum, ut video, inter omnes est abolitus, fluxus virulentæ materiæ substitit cum delirio paulo post subsequente, & dirissimo morbo acuto nulla arte sanando.

Qui in nostro Nosocomio ex hac causa acute decubuerunt (contigit enim nonnunquam, ut ex luce occulta, quam perversa medicatio modo superius recensito exasperaverat, validissime febrientes, tanquam simplici acuta febre affectos causæ prægressæ igna-



ignari, & nec ægri confessione, nec alio insuper signo adjuti susciperemus) qui inquam ex hac causa acute laborarunt, plerique mortui sunt.

Cum hi per aliquot dies decumberent apud nos, quædam veneni latentis signa vel in ipso ægro deteximus, vel undecunque demum causam mali, & quid ante adventum ad nos actum fuerat, expiscabamur. Gonorrhœam purgante valido suppressam, morbumque acutissimum inde natum aliquoties deteximus; plerorumque enim animis, eorum præcipue, qui ex plebe sunt, prava hæc opinio insidet, posse virus venereum ex parte affecta revocari, & per alvum eliminari. Hinc ipsi sibi medicinam per sæpe faciunt, & spiritum vini purgantem, sive resinam jalappæ spiritu vini solutam ex pharmacopœis repetunt.

Sed hæc methodus uti perniciosa est, sic alia non quidem mortem tam citam, attamen innumera alia mala, quibus etiam noster auriga conflictabatur, producere solet.

Multi videlicet, gonorrhœa affecti, unice exoptant, ut fluxus virulentæ materiæ quantocius sistatur: hinc aut chirurgorum inexpertorum consilio, aut proprio Marte therebinthinam deglutiant, vel alia styptica, quæ fluorem sistunt, aut injectiones ex aqua calcis, & aceto lythargirii adhibent.

Hinc illa malorum ilias, hinc aut radicata lues, aut si benignius quid ægro accidat, morbi urethræ non raro immedicabiles nascuntur. Imprimis autem hac methodo fit, ut partes, quas inflammatio venerea corripit, atque in tumores elevat, indurentur, idque maxime, si glandulosæ fuerint: unde difficilis mictus, aut nullus omnino, nisi mediante specillo, atque perpetuus metus, ne tubercula hæc, etsi nunc indolentia, motu humorum quacunque ex causa aucto, doleant, inflammentur, tristemque tandem tragediam ludant.

Methodus, qua recentibus gonorrhœis felicissime medeor, sua simplicitate, quodve morbi naturæ accurate respondeat, atque idcirco fortunato se eventu, commendat.

Hujusmodi ægri carnibus, vinoque penitus abstinent, solum jusculis cum oleribus vescuntur: assument magnam quantitatem decocti foliorum althææ, malvæ, quibus subinde aliquid ficuum, vel filiquarum dulcium incoquitur.

Fuerunt, qui pauxillum lactis addidere, & duodecim, pluresque etiam libras per diem hujus decocti hauserunt.

Adhibentur continua ferme balnea penis tepida, ubi simul glans penis perpetuo abluitur, ne quid materiæ venereæ intra præputium & glandem restitans rosiones, & ulcuscula venerea faciat. Plurimum semper ad breviorē curationem facere credidi, si æger quam sæpiissime pudenda abluat; si enim sanus ex impuro coitu ideo vitium trahat, quod matéries venerea ad glandem penis allapsa resorbeatur, nonne qui infectus jam antea est, se ipsum continuo de novo coinquinabit, & morbum alet, nisi identidem materiam hanc, si qua intra glandem & præputium hæserit, eluere conetur? quemadmodum scabiosus morbum prolongat, seque ipsum identidem contagio affiat, si vestes scabiosa materia infectas non sæpius purget, neque cum aliis commutet.

Qui gonorrhœam recentem curat, meminisse semper debet, se *inflammatæ parti*, eique *glandulosæ* mederi, semperque benignam phlogoseos resolutionem omni modo tentandam esse.

Horum memor a therebinthinaceis, aliis stypticis sive injiciendis per urethram sive ore assumendis, a purgantibus etiam lenissimis abstinabit, probe gnarus, nullum revera antiphlogisticum dari purgans, quod, utut parum, sanguinis motum non incitet, & hoc

hoc ipso phlogosin non augeat. Horum loco clysmata emollientia adhibebit.

## SECTIO QUINTA.

Hoc loco juvat historiam alterius pariter aurigæ referre, prout illam autumnò proxime elapso in mea adversaria retuli.

Vir 43 annorum ante quatuor annos a quodam chirurgo ex gonorrhœa curabatur. Suspicio est, eum & ante & post hæc illa sæpius laborasse. Ex sæva pleuritide jam aliquoties convaluit. Jam ab anno dimidio de ardore urinæ sæpius queritur.

Die 2da Octobris anno 1775. dysuriam, solitoque majorem stranguriam patitur.

Die 3. 4. 5ta Octobris mitius habet: lotium expeditius, & copiosius mittit. Hucusque officio aurigæ impigre adhuc fungitur.

Vesperis die 5ta Octobris domum rediens post cæreviliam largius haustam cubitum petit, sed paulo post de ardore, dolente admodum ad matulam tenesmo conqueritur: ejulatus: jactitatio: dolor in hypogastrio, & ad radicem penis: somnus nullus.

Die sequenti, scilicet 6ta Octobris, itemque septima eadem symptomata, sed multum aucta: inquietum: corporis ad interiora ob dolores summos incurvatio; nixus mittendi lotium frequentissimi, dolentissimi. Hucusque ferme obambulando ægrotabat.

Vesperis die 7ma Octobris prima vice catheter applicatur, sed ad vesicam non pervenitur: in ipso applicandi catheteris conatu, educto filo argenteo pus boni moris ad unciam per cannulam effluxit: urina nulla. Catheter sæpius frustra tentabatur.

Die octava Octobris mane omnia, uti pridie. A meridie hujus diei, dum alvum deponit, inter con-

tinuos ad matulam tenesmos circa tertiam horam pomeridianam subito exclamat, sibi quidpiam in corpore ruptum esse: riget, livetque toto corpore. Sudor frigidus, copiosus in guttas collectus. Paulo post decumbit quietior: abdomen tumet, doletque ad attactum. Nullus amplius ad mejendum conatus.

Die nona vocatur medicus, qui, cum chirurgus ipso præsente denuo catheterem adplicare, sed frustra, conaretur, paracentesin, in perinæo suavit. Facta punctura ciciter uncia urinæ saltu prodiit, & dein pauxillum sanguinis. Tandem cum nihil amplius, tentatis omnibus, efflueret, educta cannula est.

Die 10ma Octobris vesperi advocatus alius medicus paracentesin vesicæ supra os pubis fieri curavit: at nec gutta urinæ prodiit. Circa mediam noctem ejusdem diei lotium ad lb. v. sponte per urethram fluxit. Abdomen insigniter detumuit. Nullus amplius ullibi dolor. Circa meridiem diei proximi, cum bene speraret ipsemet æger, & adstantium quidam proxime futuram sanitatem serio prædicerent, vegetis omnino sensibus, animoque semper præsente cito, & tranquille moritur.

Sectio 12ma Octobris mane facta est. Urethra primo dissecta exhibuit circa vesicæ sphincterem: imo ulcera exigua gangrænosa, 2do prostaticam proximamque eidem glandulas tumentes, inflammatasque, & magna ex parte gangrænosas.

Dissectis herniæ scrotalis (nam etiam hac laborabat) integumentis inventus faccus est ex producto peritonæo natus, partem intestinorum tenuium continens. Intestina facili negotio per dilatatum abdominis anulum redierunt.

Aperto abdomine urinæ magna quantitas profluxit. Vesica urinaria in fundo disrupta inveniebatur, ruptura duos transversos digitos facile æquante. Intestina tenuia levem hinc inde inflammationem, &



incipientem gangrænam exhibuere. In urethræ superiori parte, ossa pubis respiciente, vulnus, secundum urethræ ductum ad unum cum dimidio pollicem decurrens, recenterque factum, quodve circa radicem penis paulo ante sphincterem terminabatur, est observatum. Punctura in hypogastrio facta, intra peritonæum & musculos abdominis, versus pelvim progressa evanuit.

Plura nos docet hæc morbi, & sectionis historia.

1mo. Vulnus illud in urethra recenter factum catheteri debetur. Quod si paulo majori vi instrumentum adigatur, sæpius accidit, ut novæ viæ eadem aberranti parentur. Optime serviunt catheteres minus curvati, & ex lamina tenui in spiram contorta confecti.

2do. Optimus pro paracentesi vesicæ locus videtur (dummodo nihil peculiare id prohibeat atque aliud suadeat) is ipse, quo a recentioribus lithotomia institui solet, in perinæo videlicet. Quod si punctura in hypogastrio fiat, minus certa operatio erit; licet enim vesica eo usque assurgat, utpote ingenti lotii quantitate turgens, tamen cum sint, qui hypogastrio præpingui gaudent, puncturæ profunditas admodum erit incerta. Præterea facile fieri potest, ut, dum vesica,educta jam aliqua urinæ portione, se denuo in pelvim profundius recipit, cannula subtrahentem se vesicam non amplius contingat, præcipue si chirurgus eadem acu triangulari utatur, qua hydropicorum abdomen pungit.

3tio. Grave monitum hic casus præbet, scilicet, auxilia seria in rebus seriis haud quaquam differri debere. Punctura vesicæ die septima, aut octava Octobris ante meridiem instituta, procul dubio hominem servasset.

4to. Eo tempore, quo paracentesis celebrabatur, abdomen lotio inundatum jam erat. Catheter die

9na Octobris in urethram immissus, & paulo post denuo extractus colore plumbeo inficiebatur.

5to. Ratio, cur urina fluxerit sua sponte 12 ante mortem horis, haud obscura est; nam, præsente jam gangræna, tumores urinæ transitum prohibentes subsidebant, uti omnis inflammatorius tumor affolet, si cum gangræna jam prehenderit.

6to. Doloris absentia, animus tranquillus, superstitie sola breviori respiratione, mentis continua præsentia, & magna ob superatum, ut credunt, periculum hilaritas, minus attentos sæpè fallunt, dum, instante jamjam ob præsentem gangrænam morte, salutem proxime secuturam promittunt.

Mors hæc sæpius in illis fit, qui ex enteritide, aut hernia incarcerata, moriuntur.

7mo. Iteratæ gonorrhœæ, diathesis sanguinis phlogistica, de qua ex repetita sæpius pleuritide constat, item potus cerevisiæ largior in ipso morbo, sufficientes nobis rationes suppeditant, unde primo tubercula, dein eorum inflammatio explicentur: accessit aurigæ munus, quod & ipsum suam symbolam contulit; cur inflammatio hæc partes præ reliquis occuparit.

## SECTIO SEXTA.

Auriga 47 Annorum, multis consequenter annis sanus, ultimo Bacchi festo hujus Anni in peripneumoniâ incidit, cum rigidissimum tunc temporis sæviret gelu, quo plures eo die horas carpento insidens, præter morem urebatur. Domi suæ decubuit, ubi sanguinem binis vicibus misit, morbum medicatrici naturæ committens. Circa festum paschatis eas primum vires receperat, ut consuetum aurigæ munus denuo subiret.

Die 12ma Junii horis pomeridianis valide riguit:

ves-

vesperi ingesta evomit: appetitus dejectus, fitisque: accessit dolor lumborum, & sinistri thoracis pungens cum tussi. Nox insomnis.

Die proximo symptomata augebantur. Vespera illius diei venæ sectio facta est cum aliquo levamine, sed brevi evanido. Die 14. & 15ta omnia exacerbantur.

16ta Suo Marte vomitorium ex tartaro emetico sumpsit, unde septies flava, fusca, amara inter gravissimos pectoris, præcordiorum, abdominisque dolores vomuit, & fere toties dejecit.

Noctu somnus nullus. Jactatio multa.

Die 17ma Junii sexta morbi ad nos delatus sequentia exhibuit: dolor a mamma sinistra usque ad os ilei, & ultra, multa tussi, inspiratione, & attactu exacerbatus: fitis magna: decubitus in latus affectum impossibilis: sputa spumosa, sanguine tincta: respiratio strepens: pulsus celer, fortis, durus: lingua alba, humida. Larga venæ sectio facta mox est, & cataplasma emolliens dolentibus locis adplicatum: datus potus emolliens, tepidus, copiosus, antiphlogisticus: sanguis pleuriticus. Noctu somnus perquam turbatus.

Die 18va Junii morbi septima dolor lateris nullus: decubitus in omnem partem facilis: respiratio cita, strepens, exiguo ac fere nullo thoracis motu, sed solo abdomine peracta. Inspiratio duplicata: pulsus antea fortis, nunc debilis valde, mollisque ac celerior multo: urina ruffa absque sedimento: tussis non multa: sputa spumosa, pauca: alvus diarrhœica: lingua alba, humida. Cæterum vigor: animi præsentia: præteritorum exacta recordatio, ad minutias usque accurata, &, ut hoc hominum genus solet, jocosa, ac potius hilaris narratio: vivacitas magna: aptæ ad interrogata responsiones: facilitas magna sese, quodcunque in latus vellet, convertendi. Faciei ha-

bitus ab eo sanorum non abludens, nullus oppressio-  
nis, aut difficilis respirationis sensus.

Hoc rerum statu cum cerebrum impeti animad-  
verteretur, latum vesicans cervici adpositum est.  
Pulsus mox e debili factus est fortis, plenus, durus  
supra modum, & perquam celer; hinc facta denuo  
venæ sectio est, sed absque levamine. Cum alvus  
immoderatus flueret, remota omnia sunt, quæ eam  
vel levissime sollicitant, nitrum, & oxymel. Emul-  
sa, mucilaginosa, diacodiata nil profecere. Hoc die  
sputa quædam cocta adparuerunt. Vesperi frequen-  
tes pulsuum mutationes. Cætera uti antea. Noctu  
leve delirium, & ad auroram mors.

Die sequenti facta cadaveris sectio est. Aperto  
thorace pulmo dexter sanus reperiebatur, sinister ve-  
ro ex integro inflammatus, attamen sic, ut inflam-  
matio non ex gravissimis fuerit; nam & substantia  
pulmonis inflammati durior quidem fuit, ac in statu  
naturali solet, minus tamen, quam in graviore phlo-  
gosi consuevit; & resectæ ejusdem particulæ, si aquæ  
injicerentur, tarde ac ne vix quidem fundum petiere.  
Quædam omnino infra aquæ superficiem suspensæ  
manserunt.

Præterea materies quædam, qualis illa sputorum  
coctorum esse solet, bronchiorum ramos opplevit,  
& copiose ex pulmonibus leniter pressis profluxit.  
Inter sinistrum hunc pulmonem & diaphragma, feri  
subflavi paucæ uncix repertæ sunt, quo loco mate-  
ries lardacea medium fere digitum crassa, crustam  
phlogisticam & colore, & tenacitate reterens, pul-  
monis infimas oras obtexerat, ea ratione, ut primo  
intuitu rupti abscessus parietes mentiretur: sed laci-  
niæ hæ avellentem digitum facile sequebantur, &  
subjectam pulmonis, partiumque vicinarum substan-  
tiam integram demonstrabant.

Mediastinum subinflammatum: pleura sana, ad  
quam



quam plerisque in locis in utroque thoracis cavo pulmones carnosus, & quasi ligamentosis crassisque nexibus religati fuerunt. Vasa coronaria ampliora solito, sanguine multo infarcta, & fere varicosa.

In abdomine omentum inflammatum ex toto. Intestina tenuia multis in locis inflammata, & hinc inde incipiente gangræna tentata apparebant.

Dissectum caput duram meningem sanguine turgentem, & hinc inde inflammata, qua vero parte cerebrum a cerebello disjungit, crassis fibris parallelis intertextam exhibuit. Pia meninx majori, ac ferro universali phlogosi tenebatur. Cerebrum assulatum sectum, medullarem substantiam pluribus ac majoribus punctis rubris, quam alias solet, distinctam monstrabat.

Viden effata Hippocratica etiam hic demonstrata: *spiritus densus, & parvus inflammationem in locis principalibus significat. L. de coac. prænot spiritus extendens, & urgens, & obscurus, & dupla intro revocatio, velut superinspirantibus, lethalis. Ibidem.*

Inde præterea constat & *strepentem* respirationem, & dolores citra rationem levatos, Hippocrati merito daminari.

Hinc prognosin, dictante id etiam Baglivio, non ex hoc utpote infido symptomatum levamine, sed ex sola spirandi libertate majori, minorive in morbis pectoris formare convenit.

In hoc casu illud quoque Celsi obtinuit L. 2. C. 7. ubi mens laborare iis dicitur, quibus causa doloris neque sensus ejus est, & protinus insaniam timendam esse, ubi expeditior alicujus, quam sani fuerit, sermo est, subitaque loquacitas orta, & hæc ipsa solito audacior.

## S E C T I O   S E P T I M A.

Fœmina cœlebs 30 annorum, habitu strigoso, biliosoque die 24ta Julii ad nos venit, cujus historia morbi hæc est:

Ab octo diebus extra Nosocomium quotidie paroxysmum febrilem sustinuit. Febrilis accessio plerumque a vomitu bilioso spontaneo ordiebatur. Subinde, idque primis morbi diebus, præter vomitum etiam alvus movebatur, attamen non præter modum. Obambulando hucusque ægrotabat.

In Nosocomium suscepta linguam habuit biliosam, os amarum glutine tenaci obductum, appetitum dejectum, respirationem difficilem. In paroxysmo febrili apud nos non amplius vomuit. Color leviter flavescens totum corpus, faciem præsertim infecit, & paucae hinc inde petechiæ non latæ, & coloris obsolete rubri viscebantur. Auditus paulo gravior.

Præmissis solventibus ex oxymelle, roob sambuci cum sale quodam medio, vomitum, exhibita radice ipecacuanha, movimus. Difficulter vomuit, & ter solummodo, pauca, vitellina, crassa supra modum, tenaciaque: subjungebatur denuo solventium usus.

Die tertio ab assumpto emetico pulsus admodum debilis, intermittens, remittens, ac omni modo inæqualis fieri, somnolentia, ac somnus fere continuus accedere, frigus extremorum, sudorque frigidus quasi mox morituram per intervalla occupare. Ad interrogata expergefit, & apta respondet, & solum oris amarorem queritur. Viribus ita vacillantibus cortice peruviano, camphora, sinapismis, & vesicantibus suppetias ferre studebamus. Vesicantia nullas vesicas excitarunt.

Die quinto, ex quo ad nos venit, totius morbi decimo tertio, moritur.

Sectum cadaver sequentia monstrabat:

Resecto cranio, corticalis cerebri substantia colorem solito magis fuscum, & ex levissimo rubore lividum exhibuit. In utroque choroideo plexu racemus hydatidum fuit, quarum maxima cicorem magnitudine æquabat. Medulla oblongata prementi digito, & cultro dissecanti duritiem hepatis opposuit.

Aperto thorace pulmo dexter validis nexibus ad costam 3. 4. 5. tam, numero a superioribus ducto, religatus inveniebatur.

In abdomine color omnium fere intestinorum lividus fuit, multumque a naturali abiudens. Omentum fuscum, putridum. Ventriculi interior membrana maxima ex parte colore fusco erat, præcipue in ejusdem fundo. At versus pylorum levis inflammatio eandem internam membranam prehenderat. In cavo ventriculi materies colorem medicamenti referens, sed mucosa plurimum, & ductilis reperiebatur.

Vesicula fellea admodum turgida saturatissimo colore flavo tangebatur, quem & omnes vicinæ jecori partes referebant. E dissecta vesicula prodiit materies primo aspectu atra, tenax, oleum pervetustum, & amurcosum referens: charta bibula huic immissa profundo colore flavo imbuebatur. Substantia hepatis bona, sed obscurioris, magisque fusci coloris, ac alias solet.

Ex hac sectione anatomica, aliisque consimilibus per alios factis, morborum malignorum, petechialiumque causa, & sedes, mortisque inde prognatæ, ratio constare videtur. Non enim crudus, putridusque solummodo primarum viarum apparatus hujusmodi morbos generat, sed & bilis quantitate peccans, peccans itidem prava qualitate; tenax quippe, glutinosa, amurcosa, acrisque, partim intra vesiculam collecta, eandem sollicitans, distendens, partim vero quoad tenuiores suas particulas ex systemate gastrico,

& bilifero resorpta, symptomatum in morbo maligno observari solitorum, explicatus non obscuros suppeditat.

Biliofa hæc materies occidere videtur diversa ratione; vel enim, quas allabatur partes, ventriculum, & intestina inflammat, vel absque prægressa inflammatione necrosin ac gangrænæ aut sphaceli speciem quandam iisdem visceribus infert.

Inflammatio hæc ab acri hac bile generari solita alterius speciei videtur, & *maligna* esse, ac ab illa multum differre, quam, cum venæ sectionibus, diluentibus, emollientibus haud difficulter curemus, *benignam* appellare convenit.

Hæc biliofa, & acris materies absorpta, & ad alias partes delata idem mali, videlicet vel inflammationem, vel necrosin lethalem producit. Hinc in quibusdam cerebrum, in aliis pulmones, aliaque viscera male affecta reperta sunt, prout quis viscus quoddam ante morbum quacunque ex causa imbecillum habuit, ad quod materies biliofa resorpta decubuit.

Scriptores medici, qui sectis cadaveribus causas, effectusque morborum rimabantur, haud absimiles viscerum noxas in iis repererunt, qui ex febre maligna decessere.

Spigelius Lib. de semitertiana, *intestina tenuia partim inflammata partim sphacelata*, in hominibus, febre maligna demortuis, inventa, memorat, etsi de nullis in vita doloribus ventris unquam questii essent. Non raro *lividas in ventriculo maculas, tanquam ab hausto veneno viderat*.

Cornelius Gemma in cadaveribus hominum, hemitritæ pestilenti defunctorum, præter dictas partes etiam hepar, & cor cum pulmonibus ex integro, aut magnam saltem illorum partem, nunc *instar carbonum nigra*, nunc *tuberculis suppuratis plena*, observavit.



Constat præterea auctoribus Spigelio, Schenckio, Helmontio, Diemerbroekio &c. eadem, quæ in corporum externa superficie proltare alias solent, exanthemata, & anthraces, etiam in ventriculo ac passim alibi in corpore reperta esse.

Teste Hieronymo Occone, cum terras brixianas terra olim lues funestaret, secta mortuorum cadavera cerebrum ipsum graviter affectum, *combustum, nigrum, & arefactum* exhibuere.

De emeticorum usu in morbis malignis in præsentiarum quædam dicam. Vis radicis ipecacuanhæ ea ratione propinata, ut singulis horis grana decem ejusdem radicis devorentur, donec tertia dosis absumpta fuerit, dummodo materies sat mobilis sit, & evacuationi apta, multiplici ex causa convenire hisce morbis præprimis videtur:

1mo. Enim evacuat ea via, qua brevior nulla datur, quidquid alieni in ventriculo, & proximo intestino hospitatur.

2do. Ipse vomendi conatus turgentem prava bile vesiculam emulget.

3tio. Radix ipecacuanhæ vi antiseptica, aromatica, roboranteque hoc in casu perutili commendatur.

Hinc illa methodus, qua Cl. Wagnerus Lubecensis medicus, Heisteri discipulus, adeo, fortunate usus est, peculiarem commendationem meretur; cum enim febres exanthematicas, petechiales, purpuram, & consimiles pro morbis gastricis, sive melentericis haberet, mixturam propinavit ex unciiis tribus, quatuorve aquæ cardui benedicti, & drachma dimidia radicis ipecacuanhæ cum sale quodam medio tritæ, concinnatæ, unde omni vel dimidia, vel integra hora cochleare ordinarium sumebatur, donec ipecacuanha effectum sortiretur. Mixturas postea solventes, quæ & alias excretiones, diapnoën, & diuresin promoverent, exhibuit. At si morbus in-

tra horas circiter duodecim gravius urgeret, si vertigo, faucium affectus, & lipothymia nondum remississent, si pulsus, & respiratio nondum emendarentur, prædictam potionem evacuantem denuo ac toties repetiit, donec symptomatum remissio morbum in meliora tendentem ostenderet.

Ad respirationem præ cæteris attentus fuit, cujus difficultatem in morbis exanthematicis inter signa pathognomica jure recensuit.

Cl. hic vir (ut id modo dicam, cujus gratia hæc præmisi) pauca grana ipecacuanhæ mixturis morbo convenientibus, semper addidit, donec signa malignitatis evanuerant.

Exiguæ hæ ipecacuanhæ doses continuas vomitiones, subinde & vomitum excitant, majoremque hac ratione humorum salivalium, lentescentium, glandulas infarciunt, & ipsius bilis vesiculam distendentis, irritantis, putrescentis, ac jamjam resorbendæ, affluxum ad cavum ventriculi, & intestina conciliant, quin & sordes biliosæ jam absorptæ denuo revocantur, ut excitato salutari vomitu, alvoque mota, eliminantur.

Hac methodo etiam ego aliquoties exoptato cum eventu usus sum: morbi materiem solvenubus mobilem reddidi, emetico paulo post excutiendam. Mota emesi denuo solventia præbui, ut, quod restabat sordium biliosarum, æque aptum efficiatur, quo iterata emesi eliminari totum queat. Medicamentis hisce solventibus exiguas ipecacuanhæ portiones adjeci, quibus nausea continua, subinde etiam vomitus concitabatur.

Utilem hanc praxin censebam, quotiescunque os supra modum mucosum, dentes sordidi, lingua crassa, tenacique materie conspurcata, consimilem & ventriculi, & tubi intestinalis statum indicabant, &

quotiescunque post primos vomitus insigne levamen non sequeretur.

Hæc crudæ, tenacissimæque materiæ conditio tempore verno rarius apparebat, æstare vero & autumno frequentissime. Inde potissimum morborum, adulta ætate & autumno regnantium, pertinacia est, etsi & aliæ accedant non nullius momenti causæ.

Id præterire in recensenda hac methodo non possum, plurimum scilicet interesse, ne exhibitis illis refractis ipecacuanhæ dosibus, res intra solas nauseas, vomiturationesque consistat. Quid enim utilitatis, aut quid non damni potius ægrum experiri necessum est, si nulla nec emesi, nec catharsi mota materies præcordia inundet, & denuo vi alterantis, & alexipharmacæ radice intra humorum circulantium alveum adigatur? hinc nauseas, vomiturationesque subinde vomitus salutaris interpellet oportet.

Cum viscerum noxas in hoc cadavere per me, in aliis vero per alios repertas recenseo, alterius cujusdam sectionis recordor, a me, dum inter Hungaros physici, ut vocant, officio fungerer, institutæ, quæ etsi alio & tempore, & loco facta sit, nihilominus ob argumenti similitudinem, aliæque quædam scitu non injucunda apprime huc facit. Hanc, quemadmodum tunc fuerat in adversaria relata, excerptam dabo. Sit ergo

## SECTIO OCTAVA.

Die 6ta Augusti 1772. Anna Maria Kazyi annum agens ætatis quintum, a nativitate nullo graviore morbo decubuit, morbillis, & variolis necdum defuncta. Verminosa nihilominus perpetuo fuit. Excrevit non raro lumbricos, & ascarides, communioraque ac leviora vermium symptomata sæpius patiebatur.

Mense Octobri Anni elapsi, cum per sex fere septi-

ma-

manas tertiana laborasset, a medico sanabatur. Nuper quotidiana corripiebatur: paroxysmi leviores, pomeridiani. Exacto secundo paroxysmo, a parentibus convocatae in consilium vicinae matronae sunt, quarum disquisitioni puellae genitor remedium quoddam proposuit, illis in terris ad curandas in junioribus febres, solenne; balsamum id est ex balsamo peruviano, oleis stillatitiis, & spiritibus quibusdam confectum. Matronae in id coivere, dandas esse saepius per diem guttas tres quatuorve penetrantissimi remedii. Habuit puella tres adhuc paroxysmos.

Die 3tia Augusti loco paroxysmi, qui omnium universim paroxysmorum sextus fuit, calor solum advertebatur. Puella solum sub ipsis paroxysmis, nec sub his semper decubuit; ita facile ægritudinem tulit.

Die sequenti, quarta scilicet Augusti, puella consuetum alias jentaculum nauseat, languet parumper, & alvum ponit paucam, paucio floridoque sanguine commixtam. Circa nonam matutinam pauca vitellina vomit: prandium more consueto, & cum appetitu sumit. Circa quartam pomeridianam, quo tempore febrilis accessio fieri consuevit, dolore colico, item ventriculi, hypochondriorumque corripitur. Circa septimam vespertinam somnus: ad mediam noctem evigilat. Dolor acerbis præcordiorum, & totius abdominis, ejusque tensio, ejulatus, jactitatio per reliquum noctis, diem subsequenter, & noctem proximam. Alvus nulla: vomitus nullus.

Die 6ta Augusti eadem symptomata. Vesperi vocatus, multas maculas petechiales in cruribus reperi: color earum diversus, roseus, intense ruber, profunde ruber, castaneus, livescens, nigrescens, varia magnitudine, aliae lenticulares, latae aliae. Una alterave tantum amplior macula, & livescens in trunco corporis & brachiis. Pulsuum frequentia stupenda,



da, calor ad attactum mordax, jactitatio, & ejulatus continuus.

Die 7ma Augusti eadem omnia. Plures interea maculae petechiales latae & nigrae per corpus visebantur: in brachio sinistro supra cubitum macula latissima livida. Circa meridiem frigent extrema. Nullus amplius ad carpum pulsus. Ejulatio, & jactatio perstant: a meridie frigus extremorum auctum: nulla mentis praesentia, jactatio, & circa septimam vespertinam mors.

Die 8va Augusti cadaver secui. Aperto abdomine omentum leviter inflammatum deprehendebatur; intestina vero tenuia, si tractum duos circiter transversos digitos longum excipias, partim profunde rubra, partim ex rubro livida. Intestina crassa sana.

Per totum intestinorum tenuium partim inflammatorum, partim gangraenosorum tractum, crebrae petechiae conspiciebantur, parvae, magnaeque, & coloris varii, vel lacte rosei, vel ex rubro nigricantis, vel atrii penitus. Mesenterium, & peritoneum simillimis, ac tenuia intestina, petechiis large conspergebantur. Glandulae mesenterii majores multo, ac in sanis solent, ex rubro nigricabant, & totidem quasi sanguinis grumos referebant.

Macula petechialis, scalpello per medium secta, humorem fudit *extravasatum*, ac si pars quaedam sugillata dissecaretur, & ejusdem coloris, quem macula ipsa petechialis, antequam secta esset, monstravit.

Ventriculus exacte maculatam tigridis pellem referebat, albidam videlicet, & maculis nigris amplis, crebrisque interstinctam. Pulmones sani. In ipsa cordis externa superficie petechiae varia magnitudine, & colore diverso visebantur.

Petechias per brachia, & crura dispersas cum examina-

minarem, eas per totam cutis substantiam, & quasdam non exiguam sæpe numero subjectæ pinguedinis portionem penetrare, eodemque has partes colore afficere deprehendi, quem petechia visui exhibuit non dissecta.

Macula illa lata omnium in corpore maxima, supra cubitum in externa sinistri brachii parte visa, cum in eam scalpello inquirerem, ad musculos usque per profundam satis pinguedinem penetrabat, eo modo, ut conum referret, cujus apex musculos tangeret, basis vero in externa brachii superficie formaretur.

Lumbricos aliquot, paucos tamen, in intestino colo reperi.

Doleo me in tanta festinatione disquirere non potuisse, an & in aliis, & quibus in partibus petechiæ reperiantur.

Nota, in tanta ventriculi inflammatione, quam dira necrosis excepit, vomitum non adfuisse, nisi levem, & semel tantum, cum ad initium hujus ultimi morbi pauca vitellina rejiceret. Et si ægri, gastritide correpti, *vomitum dolentissimum statim ab omni ingesto, cum singultu dolorifico* docente Boerhaavio experiantur.

Gravissima omnium fere tenuium intestinorum inflammatio *ileum* non excitavit.

## SECTIONONA.

Juvencula Annum vigesimum secundum agens ad Nosocomium venit, & sequentia queritur:

A sex annis ulcera crurum habet non ampla quidem, nec profunda, sed cicatricem recusantia. Ab aliquot Annis in fabrica, ut appellant, conficiendis tæniis fericis dicata, texendo sibi victum comparat. Corpore ibi proclivi sedent, & parte sterni infima

ad-

ad machinam fortius adpressa laborem exercent. Tempus inter texendum cantando fallunt.

Sana cæterum fuit. Menstrua ordinata. A quinque mensibus se catarrho laborasse ait. A sex autem septimanis spiritum fieri multo difficiliorem, tussim frequentiore, adventante præprimis vespere, noctuque: sputa purulenta reddi, sitire, levi per intervalla horrore perstringi, & insomnes noctes agere. Non multum emaciabatur, & laboribus suis ita fungebatur, ut per duos solum dies domi suæ decubuerit.

Die secunda Septembris 1776. nos accedit. Pulsus febrilis, non debilis, attamen nec durus: decubitus difficilis in latus sinistrum: dolor ad infimam sterni partem: rubor perfrequens genæ sinistrae: sudores nocturni, & diarrhoea ægram exercent.

Cum usque ad diem ejus mensis istam præter sudores, qui comprimebantur, nil emendaretur, alvusque sex, octove vicibus intra nychthemeron, uti antea, moveretur, & nihil in pejus conversum arbitraremur, ecce, cum sedens in lecto & cum infirmariis loquitur, plenoque decocti vasculo epoto decumbit, & facillime in alterutrum latus se convertit, vegetis omnibus sensibus, nihilque præsentiens vix non inter loquendum moritur.

Cadaver pro juvenulæ habitu torosum satis, & macie nequaquam confectum apparuit.

Aperto thorace pulmo dexter levioribus membranaceis nexibus cum pleura cohæsit. Pulmo ipse pondere gravis hepaticam duritiem cultro opposuit. Sectus innumeris exiguis abscessibus, purulentam materiem plorantibus, scatebat, quorum plerique lentem vix caperent, pisum aliqui, pauci nucem avellanam. Bronchia, bronchiorumque ramos pus inundabat. Reliqua pulmonis substantia abscessibus

inter-

interposita, gravi crudaque inflammatione tenebatur. Pulmo sinister sanus fuit.

Pericardium feri uncias fere octo continebat: sectum abdomen libras feri circiter duas, viscera vero sana monstrabat, glandulas mesenterii si excipias, grandiores videlicet, ac in sanis solent.

Cum collo strumoso esset, glandulam *thyroideam* secuimus, quæ substantia gelatinosa, glutinosaque hinc inde distendebatur.

Vix ullus morbus est, in quo tam varia remedia, ac in phthyfi sananda celebrantur. Verum tamen niquis exacte morbi causam inter tot alias dignoverit, infortunatam medicinam faciet. Ob neglectam hanc in phthyfi disquisitionem accuratam, cum etiam ob ipsam mali, licet probe cogniti, gravitatem, quotidie fit, ut morbus hic tot hominibus exitium afferat.

Phthisis purulenta, ex hæmophthyfi, vel peripneumonia, vel pleuritide suppurante orta, omnium pessima est; & si juncta febris hectica sit, si sudores colliquantes, & diarrhœa supervenerint, brevi perniciofa.

Multæ rationes sunt, quæ ulcera pulmonum coire, confanarique prohibent.

In phthyfi pulmonali a fomite purulento aliud quoque vitium præter abscessum in pulmonibus plurumque reperitur, inflammatio videlicet partium abscessui vicinarum: hinc nova sanandæ phthyseos difficultas.

Qui hæmophthyfi aut laborarunt, aut adhuc laborant, purulenta sputant, sanguine subinde tincta: per intervalla auctum lateris dolorem queruntur, omniaque illa signa monstrant, quæ *latentem, & chronicam pulmonum inflammationem* indicant superius descriptam.

Phthyseos ex hac hæmophthyfi natæ, vel cum eadem



dem junctæ ideam exactam habebit, qui *continuum* & *chronicam pulmonum inflammationem* concipiet, vel *chronicam quandam peripneumoniam cum sputo cruento* ob vasa pulmonum debiliora solito largiori, ubi pars quædam inflammata in suppurationem transit, reliqua reliqui pulmonis inflammatione cruda persistente. Sermo hic est de illa hæmopthysis specie, quam *inflammatoriam* appellare convenit, ab aliis alia ex origine natis probe distinguendam.

Abscessus pulmonum ex pleuritide, & peripneumonia acuta (nam & chronicam dari, supra ostensum est) comitatur æque partium ulceri vicinarum inflammatio, minor tamen ut plurimum, quam in *hæmopthysi inflammatoria*.

His præmissis facile patebit, quid in phthysi pulmonali ex hæmopthysi, vel peripneumonia, aut pleuritide suppurante orta profut, noceatve.

Balsamica, uti balsamum Locatelli, therebinthinam, myrrham, aliaque hujus generis a multis celebrata remedia Morgagnius, & ipsa toties repetita observatio reprobatur: calorem augent, febrimque: peripneumoniam comitem, & suppurationem promoveant.

Salina, aquæ selteranæ, aliæque consimiles, uti in lentore, & infarctu pulmonum frigido, eorundem tuberculis, & scrophulosa diathesi eximie profunt, ita certo hic nocent.

Cortex peruvianus phthysin ab hæmopthysi inflammatoria natam, ipsamque hanc hæmopthysin adeo non sanat, ut illam insigniter promoveat, & ægros in perniciem præcipites agat. Inde etiam ratio habetur, quare adstringentia in *hæmopthysi phlogistica*, etsi vulgata praxis iisdem toties utatur, morbum plerumque immedicabilem reddant.

Attamen cum magni viri corticem peruvianum in internis suppurationibus laudarent, alii vero haud in-

feriores reprobarint, dispiciendum est, quibus sub conditionibus remedium hoc exhiberi cum emolumento queat.

Si a ratione & experientia consilium petatur, cortex proderit, si nulla in sanguine phlogistica diathesis fuerit, si liber puri exitus pateat, sique penes abscessum nulla insignis inflammatio sit.

In suppurationibus externis, atque etiam in iis internis, ubi libere profluere, atque extra corpus ferri purulenta materies potest, corticis vis sanguinem a labe contrahenda præmunit, & tabem averruncat.

Pure alicubi intra corpus concluso, aut præsentē sanguinis phlogistica diathesi, aut pulmonibus, penes abscessum graviter inflammatis, hic cortex aut inutilis, aut perniciosus artem ludit.

Decantara ab omni ævo cura lactea fuit. Lac febricitantibus, ad quos nostri quoque phthysici pertinent, teste Hippocrate, & experientia non convenit: in diathesi phlogistica ob partem caseosam omnino prohibetur. Hinc mirum non est, curam lacteam, utut per multa sæcula vel inter plebem de prædicatam, in hac phthysi spem medicantium, & ægrorum semper fallere.

Lac quadrupla aquæ quantitate dilutum, vel ipsum lactis serum potiori jure præscribitur. Lac asininum humano magis analogum a veteribus celebratum expectationi nostræ in hac phthysios specie neutiquam satisfacit.

Hinc etiam patet, quid a lacte humano ex mammis sugendo sperandum, timendumve sit.

Antihecticum Poterii eviluit.

Accubitus corporis juvenilis hoc in casu ægro nihil prodest, & accumbenti nocet.

Sed quid de equitatione ab Sydenhamo summis encomiis, celebrata, qua & sudores, & diarrhœam col-

colliquativam vir summus curasse se asserit, sentiendum?

Doleo male intellectam a multis in ægrorum perniciem Sydenhami mentem esse; certe multiplex experientia docuit, hoc remedii genus, utut præstantissimum in plurimis morbis chronicis, phthysicis ex ulcere interno laborantibus æque parum convenire, ac pleuriticis & peripneumonicis; eosque equitatio, & vectio in curru

*Ad stygias certo limite ducit aquas.*

Aptius utique hoc exercitii genus adhibetur in iis, quibus dejecta vis ventriculi intestinorumque, ingesta male assimilat, atque hinc atrophiam, & maciem inducit: aut ubi diu perdurans tussis stomachica eum corporis habitum effecit, qui phthysin mentitur: in tussi *habituali* dicta, a congestione lenta, viscidoque pulmonum infarctu orta: in hypochondriacis, sedentariis: viscerum abdominalium pituitoso infarctu, indeque nata atrophia laborantibus: post febres biliosas, intermittentes diurnas, rebelles quartanas, lentas, mesentericas, colicam biliosam, dysenteriam: post quoscunque morbos, qui atoniam solidorum, & humorum bonorum penuriam vel suapte, vel longa, & difficili medicatione post se reliquerunt: post nimiam nobiliorum succorum, sanguinis, seminis, liquidi nervei deperditionem, natamque inde pravam, tabidamque corporis diathesin.

Lichen islandicus laxo, imbecillique pulmoni pulchre medetur. Quibus udum corpus est, & pulmo ferosa colluvie frequenter inundatur, his catarrhosam hanc diathesin plastica, simulque tonica lichenis virtus corrigit.

Decoctum polygalæ iisdem ac lichen prodest, cui apte non raro jungitur. Hæmopthysi & phthysi inde

natae ob rationes supra narratas aequè parum, ac cortex peruvianus, aut alia roborantia, convenit.

Lichen islandicus, & polygala in spuria illa phthi-si, quam equitatione sanari supra diximus, vires non contemnendas possidet: veram pleuritidem, aut peripneumoniam nunquam sanat, saepius vero spuriam, serosam, pituitosam.

Quod si post veram pulmonum inflammationem fracta dudum phlogosi, vis vitae languens anacatharsi non sufficiat, & materiae expectorandae copia pulmones gravet, virium imbecillitati lichen & polygala robur addent, & *spuriam hanc peripneumoniam* auferent. Verum etiam in alio casu polygalae decoctum admodum efficax observavimus, ubi scilicet sputa inflammationem pulmonum judicantia *diutius*, ac par est, ac *copiosius* prodeunt, viresque aegri residuas convellunt, eundemque consumunt.

Qui frequentes parvasque sanguinis missiones instituerunt, adcuratiorem phthyleos ex haemoptysi inflammatoria natae notionem habuisse videntur, ac ipsorum, a quibus damnabantur, advesarii. Venae sectiones morbo, & viribus aegri respondentes, decocta herbarum & radicum emollientium, emulsa, & victus mere vegetabilis in sananda phthyfi purulenta insigniori reliqui pulmonis inflammationi juncta, omnibus aliis remediis palmam praeipiunt.

## SECTIONO DECIMA.

Vetula habitu corporis strigoso & icterico, circa finem mensis junii ad nos venit, dolorem ad hepatis regionem versus ventriculum, & ardorem insignem inde a costis infimis ad cristam ossis ilei ab aliquot diebus quæsta. Se ante tres septimanas e Nosocomio Pazmaniano discessisse ex ictero sanam, vegetamque ajebat, quo ibidem septem fere septima-



nīs decubuerat. Plura, utut aliquoties interrogata, non retulit.

Adplicatis tum externe, cum interne iis omnibus, quæ ex usu esse arbitrabamur, en repente post paucos dies sanguinem copiosum, nigrum, leviterque grumosum vomit. Cum aqua simplex multo spiritu vitrioli alterata pro potu, omniaque alimenta frigide darentur, ligaturis artuum adhibitis, cruentus hic vomitus brevi quievit, quo compresso exiguæ portiones rhei cum tartari cremore præscriptæ tuere, educatæque fæces multæ, multo sanguini grumoso mixtæ.

At quotidie circa meridiem febris quotidianæ accessio non diuturna, nec vehemens, & paucis diebus elapsis iterum evanida observabatur. Dolor in abdomine inde ab illo sanguinis vomitu pedetentim mitior factus, tandem in delicatiorem tantummodo, & rudioris attactus non omnino patientem sensationem convertebatur, quin tamen reapse contrectata abdominis plaga vere doleret. Pulsus nihilominus exiles, obscurique, & frequentiores, quam tunc fuerant, cum ad nos veniret, continuo observabantur.

Octo fere ab ultima febris quotidianæ accessione elapsis diebus, cum jam abitum e Nosocomio meditaretur, subito moritur.

Cadaver sectum exhibuit in cavo thoracis singulo feri uncias fere octo. Pulmones sani cæteroquin, sed flaccidiores multo ac alias esse solent, dissectioni serum stillabant.

In abdomine ventriculus dissectus in medio inter utrumque orificium arcui ejusdem majori insidentem tumorem cancrum, inæquali superficie, ac tuberris solani forma præditum continebat. Tumorem hunc vasa varicosa, cæruleaque perreptabant, & pressus ichorem fudit. Inde a tumore ad pylorum

usque ventriculus angustus intestini potius duodeni, quam ventriculi figuram referebat.

Duodenum longo tractu arctis supra modum validisque nexibus, quos cultro solvere, quin nexa viscera læderentur, non licuit, cum hepatis cavo cohæserat ita, ut vesicula fellea ab utroque viscere intercepta elideretur penitus, ejusque loco abscessus nucem juglandem æquans, ac foetidissima, amurco-saque materie plenus reperiretur.

Ductum communem choledochum, quo loco is intestino duodeno inseritur, calculus triplici obtuso angulo præditus, obturabat, ita, ut ibi natus videretur, cum receptaculum, quo continebatur, exacte replet, & quodam suo angulo ductum, quo is in intestinum aperitur, perfecte clauderet.

Calculus minorem nucem moschatam magnitudine referebat, & circumcirca materia tenaci, flavaque obliniebatur, quæ paulo post exsiccata firmior ac fere lapidea evasit. Cum frustulum ejus calculi vi avelleretur, diversa, strata apparebant, quæ calculum effecere. Quousque ductus supra calculum hepar versus pertingeret, an cum abscessu amurcam continente, an vero recta cum hepate communicarit, non constat.

Substantia hepatis sana, sed tunicæ vasorum sanguiferorum, per hepar disperforum, præter modum crassæ, vasque ipsa solito ampliora. Totum ileum, & jejuni major portio profundo, ac obsoleto rubro colore tangebantur, quem non a sanguine grumoso transparente, multoque per omnem intestinalem tubum collecto fieri, portio ablatis clotique intestini demonstravit. In ileo lumbricorum viventium adhuc, glomeres reperi sunt.

Robur musculorum, doloris absentia, & animus præsens, salutem promittebant; at vero *ευφορίαν* hanc

hanc infidam esse, ictus arteriarum per ultimos octo vitæ dies obscuri, fractique indicabant.

Icterus chronicus in seniculis, diuturna cardialgia, dolor vel tumor præcordiorum continuus vitium grave, & *organicum* systematis vel gastrici, vel biliferi plerumque notat. Aliarum quoque sectionum recorder, quæ hoc assertum comprobant.

Medicus medicinam his faciens & famæ suæ, & ægris consulit, si a *potentiori solvente* remedio caverit; id enim ineautius datum noxios, brevique funestos motus concitat, mortemque, serius alias occupantem, ni intempestive sedula medicatio accessisset, accelerat. Victus blandus, & decocta radicis graminis, ac taraxaci tutius præscribuntur.

## SECTIONO UNDECIMA.

Vidua 74. annorum militis officialis quondam uxor, a multis jam annis sanissima, corpore *ευααγκω, ευχευς*, cum more consueto alacris esset, & vesperi paulo lautius cœnaret, hausto inter cœnandum meraciori, & generosiori vino, ac alias consueverat, die 12ma Augusti cubitum sanissima concessit. Mane cum consueto tempore ad jentaculum sumendum non compareret, a domesticis in lecto aphonos, & toto latere dextro paralytica reperitur. Hesternæ cœnæ reliquiæ vomitu per noctem procul dubio rejectæ, & lectum, & penes eundem pavementum conspurcabant.

Medicus accersitus venam secuit in pede sinistro, & tria vesicantia applicuit.

Die 14ta circa noctem ad Nosocomium desertur, cum non haberet, qui sumptus ferret, atque ipsa penuria pressa iisdem ferendis impar esset. Adplicitis iis, quæ convenire visa sunt, cum nec domi, nec in Nosocomio ulla mentis præsentis indicia daret,

aut saltem pauca, & per intervalla solummodo, nocte diem 16tam excipiente moritur.

Cadaver aliquot a morte horis sectum exhibuit intra meninges in utroque latere serum multum. Meninx pia solito durior, crassiorque membranam aponeuroticam æmulabatur. Vasa ejusdem meningis in latere sinistro multo ampliora, ac in altero latere, & admodum infarcta plurimo sanguine turgebant. In ventriculis pauxillum feri continebatur.

Cerebri substantia mollior solito apparebat; arteriæ carotides, ubi cranium subeunt, osseæ ex toto reperiebantur, talesque fuere, quousque illas intra canalem osseum persequi ob penuriam temporis licuit. Rami carotidum magnam partem ossei, ita tamen, ut portionem osseam alternatim exciperet alia naturalis. Arteriæ in latere cerebri sinistro longiori tractu osseæ erant, quam ex lateris oppositi. Quidam ramuli solum lamellas osseas exhibebant.

*Sinus falciformis*, qua is vertici capitis opponitur, ossiculum tribus lineis crassum, quatuor latum, & fere pollicem longum, ea parte continebat, qua falx proxime corpus callosum respicit.

Sinistra carotis in suo intra cranium introitu amplior multo, pluribus, ac amplioribus donata ramis erat, quam socia lateris dextri.

Vertebrales arteriæ idem omnino vitium exhibere, atque ita primitus comparatæ videbantur, ut sinistra vertebralis capacior multo esset, & in plures ramulos æque latiores dispesceretur, quam vertebralis dextra.

Cor, & ejus valvulæ juxta morem consuetum fuere. Arcus aortæ solito amplior, & arteria pulmonalis in superficie sua interna granulis asperis, osseisque hinc inde obsidebantur. Aorta descendens usque ad locum, ubi in iliacas dividitur, lamellas osseas exhibuit sat magnas, & quibus hinc inde vix



una tertia pars defuit, quin integrum circulum complerent. Iliacæ utriusque initium tubulum osseum longitudine fere dimidii pollicis referebat.

Alia aut non fuere quæſita, aut juxta naturam ſe habuere.

En cauſam apoplexiæ in latere cerebri ſiniſtro maxime repertam, & latus oppoſitum corporis paralyticum.

Originaria prædiſpoſitio aderat in inæquali arteriarum utriusque lateris capacitate. Id etiam præter conſuetum morem fuit, quod vaſa ſiniſtri lateris præ vaſis lateris alterius ampliora fuerint, cum alias plerumque contrarium obtineat.

Apoplexiæ cauſa prædiſponens vaſorum videlicet & major capacitas, & offeſcentia emendari non poterat.

Ex vomitu ab heſterna ingurgitatione orto, & cerebro dicta ratione prædiſpoſito apoplexia facile explicatur.

Periculofus plane vomitus in ſenibus eſt, & quidquid ſanguinem validius verſus caput urget, prandium lautum, vinum meracius, fæx dura, ſternutatio, opium &c.

Neque id ordinarium eſt, cerebrum fuiſſe ſolito flaccidius, etſi vetula fuerit, & arteriæ offeſcerent.

Ad ſeroſas apoplexias hanc, de qua loquimur, pertinere non rebamur, etſi multum ſeri intra meninges in utroque latere contineretur. Reſtitante enim, congeſtoque intra calvariam ſanguine, tenuiorem partem, ſerum nempe, per lateralia vaſcula vi transprimi, percolarique neceſſum fuerat. Atta-men productam a ſanguine apoplexiam ſerum extra-vaſatum auxerat.

In apoplecticorum ſecto cerebro frequenter leguntur vaſa cerebri ſanguine turgida & ſerum multum effuſum. Hujus generis apoplexiæ plerumque ſeroſæ

audiunt: verius *sanguineæ* appellarentur; accumulatus enim intra caput sanguis, & feri effusi, & apoplexiæ causa est: serum ipsum effusum *ad concausas* pertinet *serius accedentes*, quæve morbum ipsum non produxere, attamen productum augent.

Discrimen non intra sola vocabula consistit: medendi enim methodus alia est, si *serosa* apoplexia fuerit, atque alia, si *sanguinea*. Porro diversitas utriusque methodi tanta est, ut, si alteram pro altera adhibeas, nil agas indifferens, quodve si non profit, non noceat, sed ægrum data opera jugules.

Morgagnius apoplexiam, ubi *vasa encephali sanguine turgentia*, & serum intra meninges effusum *deprehenderat*, inter *serosas* retulit. Veruntamen errorem practicum prudens cavit, dum in quibusdam apoplexiis *serosis* necessitatem venæ sectionis stabilivit, ibi videlicet, ubi *sanguis vasa distendit*, & *turgentia vasorum cum aqua conjiciuntur*.

Refert idem Cl. Auctor, esse quosdam, qui aquam nunquam apoplexiæ causam arbitrentur, sed effectum causæ apoplecticæ, sanguinis nempe in cerebro, & vasis circa cerebrum restitantis: sed addit, id quidem plerumque ita se habere, tamen non semper.

Vere & originarie *serosas* apoplexias dari certo constat, ibi venæ sectio occidit. Succi pravi, & diuturna cacochema diathesis præcedens: senectus, non cruda illa, vegetaque, quæ actionum integritate ipsam persæpe juventutem superat, sed fracta, & imbecilla: acidulæ a debilibus, seniculis largius, & inconsulto potæ: sanata crurum antiqua ulcera, quæ serum copiosum fundere diu consueverant: humida, frigidaque tempestas: corpus catarrhosum longo ante apoplexiam tempore signa suppeditant, quibus adjutus *serosam apoplexiam a sanguinea* non difficulter dignoscas.

## SECTIO DUODECIMA.

Juvenula 26 Annorum die 28va Augusti ad Nofocomium deferebatur. A multo jam tempore sana fuit, & menstruis stata periodo redeuntibus usa, quorum reditum proxime exspectabat. Die 21ma Augusti prægressa artuum lassitudine frigit, caluitque per intervalla, & capite doluit. Eadem die facta venæ sectio est: die altera purgans a chirurgo datum alvum diutius fluentem reddidit. Die sequenti denuo vena secta est, & emeticum exhibitum, unde multa mucosa biliosaque vomuit, continuata diarrhœa.

Cum ad nos veniret, querebatur alternos horrores, caloresque: os amarum, mucosumque fuit, lingua glabra, prærubra, præcalida: pulsus debilis, admodum celer: petechiæ lenticulares, coloris obsolete rubri, prostabant.

Indicatio a vacillantibus vitæ viribus desumpta est, dataque ea sunt, quæ imminentem compagis dissolutionem præpedirent, cortex peruvianus, camphora &c. aliaque, quæ morbo convenire arbitrabamur. Verum indocilem prorsus, immorigeramque nacti ægram, & operam, & medicamenta perdidimus. Remedia enim aut non assumpsit, aut sumpta in faciem custodum exspuit, mentis semper compos, & eorum, quæ faceret, probe conscia hinc factum est, ut toto morbi tempore potior medicamentorum pars pessumiret.

Interea pulsus frequentiores, debilioresque fieri, lingua asperari, siccati, ut assæ potius carnis frustum referret: ardor circa præcordia, & in abdomine, qui attractum non ferebat, sentiri, tandem tussi validissima, sicca, vesperi: præcipue vexari, noctu demum subdelirare, etsi morbo multum jam progresso,

so, & subinde tantum id fieret, ac adstantes, si quis ipsam alloqueretur, probe nosceret. Fæces nunquam in lectum misit, sui, suarumque necessitatum nunquam penitus oblita. Cæterum robur musculorum ita viguit ad mortem usque, ut ad alvum ponendam ad ultimum usque vitæ tempus vel sola vel unica custode adjuncta facile surgeret.

Die 23tia Septembris, cum per tres ultimos dies stupenda pulsuum frequentia, & exilitas esset, moritur.

Cadaver apertum exhibuit omentum corruptum, sphacelatumque magna ex parte: intestina vero hinc inde partim inflammata, partim vero gangrænosa. Ventriculi interior membrana, præcipue versus pylorum, maculis rubris, lenticularibus, totidem petechias referentibus, distinguebatur, & hinc inde leviter livebat. Vesicula fellea bile multa, quam ex aspectu laudabilem diceres, turgebat. Glandulæ mensesenterii solito majores erant, & grumos sanguinis referebant. Uterus antrorsum versus ossa pubis, & sinistrorsum ita inclinabatur, ut cervix ejusdem cum vagina in angulum acutum coiret, & uteri osculum latus dextrum ac retrorsum respiceret, ligamentum latum lateris sinistri multo brevius dextro fuit: interna uteri facies lineolas rubras, punctulæque rubra non exstantia referebat.

Pulmones sanissimos, nullaque in iisdem tussis validissimæ, morbo multum jam provecto, vexantis, vestigia reperimus.

Febrim vel continuam, vel remittentem, quam cruda, & *biliformis* materies præcordiis insidens producit, *biliosas* alii, alii *putridas* appellant. Eandem hanc febrim, si morbi materies altius infixæ, & tenacior sit, ac magna ex parte in sanguinem traducta, ad nobiliora viscera deponatur, & gravia hoc ipso symptomata producat, *malignam* nominabimus,



bimus, quæ varias alias febres *petechialem*, *petechizantem*, *miliarem*, *scarlatinam*, *febrim carcerum*, *nosocomiorum*, *castrensem* &c. sub se quasi totidem ejusdem febris differentias accidentales continet.

Alia nominum vis, & potestas in denominandis febribus apud veteres fuit. Quas nos modo *inflammatorias* dicimus, illi *biliosas* appellabant ob crustam sanguinis phlogisticam, & flavescentem, quam ii *bilem sanguinem biliosum*, *pituitosum*, *ωρον αίμα* nominarunt. Ballonius omnes ferme pleuritides *biliosas* vocat, eas videlicet, quæ nobis *inflammatoriae* sunt. Ipse Hippocrates L. de locis in homine, nomine *bilis* pleuritidem notat. *Pleuritis biliosa* nobis toto genere diversus morbus est.

Qui veterum libris uti cupit, eorum phrascologiam, & vigentes quavis ætate opiniones, modosque loquendi, quin peculiarem cujuslibet scriptoris medici philosophandi rationem nosse debet, ni in graves errores abduci velit. Iisdem enim persæpe vocabulis cum veteribus utimur, sed quæ alias nobis ideas quam illis exprimunt. Sic cum Galenus in Comment. ad Aphor, 23. L. 1. in febribus *biliosis* venæ sectionem etiam ad Lipothymiam usque præcipit, e contrario vero Arabes sanguinis missionem in morbis iisdem reformidant, manifesto constat, non eandem & Arabibus & Galeno biliosi morbi notionem fuisse: & hunc, & illos verum dixisse, si Galenum de *inflammatoriis* loquentem, quas is *biliosas* dixit, Arabes vero de *biliosis* nobiscum sentientes accipiamus.

Venæ sectionem in morbis putridis, gastricisque intempestive vel ab ipsomet ægro, vel ab aliis male consulentibus, antequam ad nos venirent, institutam sæpius lugebamus. Dolenda plebeculæ fors est, quæ, ut primum morbo corripitur, plerumque a medicastis, cum pecuniarum, & ipsius nonnunquam caris-

carissimæ vitæ dispendio, opem petit, etsi tot asyla pauperibus pateant, ubi omne auxiliorum genus gratis porrigitur.

Nescio, an morbi ipsi, qui in populum sæviunt, an vero ii, qui artem, quam non addidicere, illotis manibus tractant, numerosiores strages edant.

Præpositorum nostrorum sagaci providentiæ debemus, quod hæc populi pestis indies mitius affligat, & a sacris Æsculapii profani, quantum fieri potest, arceantur.

Emesin cum emolumento in ejusmodi febribus moveri, per innumeras observationes constat. Id auxilii medicastrum raro negligunt, at nullo sano consilio, nullis observationibus ducti, quadratis rotunda miscent, ac purgationes, emeses, venæ sectiones, intra quæ ipsorum tota scientia consistit, nulla habita temporis, sexus, morbi ratione, instituunt, repetunt, quemadmodum cæco impetui, & vanæ ipsorum empiriæ libuerit.

Lingua glabra, prærubra, præcalida, aut inæqualis ob papillas ejusdem magis elevatas, tumefactasque, etsi cæteroquin humida sit; aut in medio sicca, asperaque, quasi lingua bovilla; vel vero sicca, non aspera, sed levis, multiplici nostra observatione febrem gastricam putridam, eamque difficiliorem curatu, longioremque portendit. Quosve hac linguæ diathesi affectos accipimus, præmissis solventibus, emetico vacuumus, ac dein solventibus, sale ammoniaco, juncto persæpe cortice, consanamus.

Exhibito primis 24. horis decocto solvente, solutionem tartari emetici propinamus. Postea ubi major virium jactura fuerit, vel solum corticem, vel camphoræ maritatum, vel in decocto, vel vero in substantia, ut ajunt, prout ex aliis circumstantiis magis convenire arbitramur, exhibemus. Ipecacuanha

apud ejusmodi ægros impar, ut plurimum, tantimali vindex est.

Linguas albas humidassque, aut virescente materia obductas, minus timebamus: his etsi vomitorium antimoniale cum utilitate dabatur, nihilominus ipsecacuanha per epicrasin data satisfecit.

Purgans vices emeticirarissime subit. Febrim purgans frequentissime incendit, quam emeticum uno quasi ictu jugulat.

Inanis plerumque metus emesin prohibet, eique alvinam purgationem substituit.

Etsi alvus minori in præsentiarum cum molestia moveatur, quam emesis, peracta tamen operatione, citius motæ ab emetico turbæ componuntur, quam quas purgans pharmacum conceitavit.

In febribus putridis, sive biliosis observatum frequenter est, datis solventibus, motaque emesi, alterutrum ex duobus statum obtinere; vel enim eliminata morbi materie æger insigne omnium symptomatum, cephalalgiae, temulentiaeque præcipue, ac cardialgiae levamen experitur, ac ferme apyretos est, vel vero rejectis licet copiosis sordibus, caput æque propemodum, ac antea, gravatur: pulsus debiles, exigui, frequentesque perseverant. Quod si prior ægroti conditio obtineat, sufficiet continuatus solventium, salis præcipue ammoniaci usus.

Salem hunc aliis remediis salinis anteferendum ex eo existimo, quod glutinosa, tenaciaque potenter incidat, & torpescences simul fibras stimulet, quo resistentes saburræ reliquias excutiant.

Verum si alter ægroti status sit, ubi eliminata licet ingenti materiae mole, quæ præcordia citra noxam occupare non poterat, levamen evacuationi conveniens non respondet, & pulsus molles, humiles, frequentesque sunt, illico ad corticem peruvianum, camphoram, serpentariam virginianam confu-

gere oportet. Hoc rerum statu radicem arnicæ vel solam; vel camphoræ junctam una alterave vice perutilem observavi.

Fœminæ laxæ imbecilli ventriculo præditæ, chloreticæ; viri debiles, sanguinis missionibus intempestive institutis exhausti, si morbo bilioso teneantur, utut emesi indigeant, nihilominus raro solis solventibus, & emetico persanantur, sed plerumque in cortice peruviano, & antisepticis ex classe roborantium desumptis salutem inveniunt.

Omnes, qui graviore morbo putrido, sive maligno laborant, si diutius decubuerint, molesta tussi vespera, noctuque præprimis infestante corripuntur. Hi sputa aut nulla, aut spumosa reddunt, aut, ut in non paucis est observare, *puriformia*. Dolorem in thorace nullum, nisi si diutius, & validius tussitent, nullam inter spirandum difficultatem queruntur: at scrobiculum dolet, indeque, si attentius observes, irritamentum ad fauces, gutturve, & demum ad thoracem prodit. Hinc tussis hæc, si genesis spectes, a gastrico systemate orditur, & illæsis pulmonibus fit, nisi forte & hi a sæpius repetita ac validiori successione, tussique diuturna proprium quoque vitium traxerint, & humores ipsi illuc allekti decubuerint.

Tussis hæc *stomachica* reconvalescentibus diu non raro molesta roborantibus, stomachicis, polygala, & lichene islandico tollitur.

De hac tussi illa Ballonii valent, dum ait: *in validis tussibus, præsertim cum inanes sunt, dolorem audivimus tantum in ventriculo natum, ut necessario opitulandum ipsi ventriculo fuerit. Quemadmodum difficultas respirationis facit, ut vi sympathiæ dolores in partibus ventris inferioribus oriantur, sic difficultas aliqua spirandi oritur ob læsionem, doloremque partium interne contentarum, & tunc est opitulandum partibus*



*ventris inferioris, relicto thorace, & partibus ejus. Causa sæpe latet in hypochondriis.*

Tussis stomachica apud alios ægros nullo alio morbo laborantes frequenter occurrit. Res est subinde difficilioris indaginis, ut *oppressionem pectoris, ardorem in thorace, tussim a pastu præcipue affligentem, sputaque puriformia*, quod horum causam, generisque concernit, probe dignoscas. Uti enim hæc symptomata pectoris originarie affecti esse possunt, sic in hominibus laxis, debili ventriculo donatis, & male digerentibus, in sedentariis, fœminis, pueris &c. frequentius a præcordiis, & relaxato systematis gastrici tono nascuntur.

Profuere aliquoties purgantia lenia, rhabarbarina, salina, & continuatus postmodum amarificantium, polygalæ, lichenis islandici &c. usus.

Quod si crudus apparatus ventriculorum gravet, & irritationem ad pulmones propagando, eosdem continuata, validaque tussi concutiat, ut sputa cruenta ruptis pulmonum vasculis appareant, Ipecacuanha instar miraculi aliquoties profuit. Sed ea de re alibi erit distinctius differendi opportuna occasio.

Uteri obliquus in hac fœmina situs ea nobis in memoriam reduxit, quæ apud Hippocratem de *uteris transmotis, de utero in lumbis incumbente, ore uteri complicato, uteris sursum progressis, ad vesicæ stomachum, ad lumbos, ad coxas conversis, in inguina, & urinæ meatus incumbentibus, ad sinistram partem & coxam inclinatis, uteris commotis, & aliquo allapsis, ad sedem conversis, & secessum secedere prohibentibus, uteris circumversis ad dextram partem, puerperii purgamentis non fientibus, uteris obtortis, foras egressis, dependentibus &c. diversis in locis consignata leguntur.*

Hæc de vera uteri aliter, ac in statu naturali solet, locati positione accipienda omnino esse, & hæc.

ce nostra dissectio, & aliorum, atque haud infrequens Morgagnii observatio probat. Et si, quæ divus medicinæ parens de uteris ad cor, atque ad caput progressis, & strangulantibus &c. habet, ad spasmos ex hypogastrio oriundos, aut ibi loci se primum exercentes, qui & alias corporis partes in consensum trahunt, & mutatum uteri situm mentiuntur, pertinere, clarum sit.

In Morgagnii epistola anatomico-medica XLVIII. latorum uteri vinculorum laxitati tribuitur, quod is antrorsum concidat: eorundem vero, vel & utrorumque nimia ex alterutro latere aut brevitās, aut laxitas uterorum obliquitatem facit, undecunque hanc vinculorum inæqualitatem sive a nativa constitutione, sive ab adventitia primum alicujus ligamenti vitio, sive etiam a gibbo, qui spinam dorsi, cum eaque partes nexas, vicinasque ad obliquum detorquet situm, derivare libuerit.

Ne vero has de obliquo utero observationes usu carere practico, atque inanes quis arbitretur, idem Cl. Vir, & frequenter in partu perumpi uterum ob obliquum infantis positum, & hunc ipsum ob ipsius uteri sæpius, ac vulgo creditur, evenientem obliquitatem fieri, ex aliorum quoque, præter suam, experientia docet.

### SECTIO DECIMA TERTIA.

Pistor Annos viginti tres natus initio Augusti cerevisiam, vinumque promiscue, ac affatim hausit, cum die testis, ut hoc hominum genus solet, genio una cum sodalibus liberius indulgeret. Altero mox die alvo cita, torminibus, ac tenesmo corripitur. Primis morbi diebus vigesies per diem deiecit; at exactis duabus septimanis, cum circa medium Augusti nos accederet, sexies intra nycthemeron aquosa purga-

ba;

batur, quibus quædam quasi albæ laciniae, aut minutula quasi pastæ farinaceæ frustula innatabant: nullus amplius in abdomine dolor, tenesmus nullus. Os amarum, lingua albescens, pulsus humilis, non febrilis. Data est radix Ipecacuanhæ per epicrasin: non vomuit, verum alvus frequentissima facta est, & vires minuebantur. Exhibebatur pulvis ex myrobalanis, succo catechû, & opio, unde alvus compressa quidem est, at circa 24tam Augusti sine voce, facie hippocratica, & artubus frigidis, pulsu frequentissimo, debilissimo, tremuloque quasi jamjam moriturus jacet. Vesicantia, acres sinapismi, camphora radici arnicæ mixta tenuem vitam resuscitarunt.

7ma. Septembris deglutitio difficilis, vox rauca, tussis dein major indies ægrum exercere inceperant. Nil vitiosi in faucibus conspiciebatur, præterquam leves hinc inde rubores absque tumore.

Hisce remediis etsi morti præsentî ereptus videretur, nihilominus circa nonum Septembris, cum reliquam sanationem iisdem perfici posse desperabamus, ad corticem juncta simul camphora accessimus.

Excoriari ad os sacrum, & trochanterem utrumque, summa licet adhibita diligentia, cepit. Tussi primum sicca, clamosa, sonora, quasi ex cavo tus-sitaret, ad vesperam, nocturne vexari; demum & sputa copiosa *puriformia* rejici. Macies indies major. Pulsus repentes, obscuri, naturalibus celeriores: decubitus in latus dextrum impossibilis: hypochondrii sinistri dolores punctorii crebri: noctu nonnunquam copiosus, & foetidus sudor: horror validus, & ossa concutiens aliquoties accessit. Alvus naturalis.

Die 28va Septembris in auxilium præter corticem & camphoram, polygalam, & lichenem islandicum vocabamus. Sputa subsequenti diebus minuebantur:

tur: vox paulo melior: at ab aliquot jam diebus foetor peculiaris, qui absque sensu incipientis deliqui ab adstantibus ferri diutius non poterat. Reliqua symptomata persistere.

Die 25ta Septembris a meridie pulsus magis humiles, admodum exigui, & frequentissimi: dolor per aliquot momenta immanis in hypochondrio sinistro: ejulatus: animus praesens, & die sequenti mors.

Latus thoracis sinistrum lividum in cadavere, lividi, nigrescentesque illius lateris muscoli fuere. Apertum sinistri thoracis cavum duodecim propemodum libras feri turbidi, virescentis, foetidissimeque continebat. Pulmonis externam faciem, pleuram, pericardium, diaphragma, qua parte sero hoc contegebantur, membrana albescens quasi ex pasta farinacea confecta obvestiit. In pericardio libra ejusdem feri, minus tamen turbidi, & absque ejusmodi pseudo-membrana inveniebatur.

Pulmo illius cavi ita compressus, & in exiguum spatium redactus erat, ut a sua functione diutius jam vacasse visus fuerit, etsi dissectus nil vitiosi monstraret. Cavum thoracis dextrum pulmo sanissimus replevit.

Secto abdomine omentum convolutum, ut intestina non obduceret, exiguum, & putridum reperiebatur. Intestina lividissima, ac ferme nigra fuere, excepto intestino recto, si colorem spectes, sano. Ad initium intestini ilei praeternaturalis coarctatio, futuri fors morbi ilei rudimentum. Faeces consistentes per totum intestinum ileum, & vera stercora. Colon, per plures prius anfractus in pelvi sitos circumductum, tandem inde ascendens in rectum abiverat. Ventriculus externa facie sanus, interna lividus.

Resecto cranio, aqua sub arachnoidea contenta gelatinam mentiebatur: reliqua sanorum instar se habuere.



Pistores morbis acutis correpti præ aliis multo facilius sæpiusque perire, tum meis, cum & aliorum, qui per aliquot jam annos ægris in Nosocomio adstitere, observationibus comprobatur. Morosi ut plurimum sunt, tardi, stupidi, sermonis pauci, aspectu torvo, facie pallida, ejusque coloris, quem græci *χλωρον* dixere. Morbis malignis maxime subjacent, ex quibus raro convalescunt.

Horum ratio a vivendi genere, & opificio repetenda est. Frequenter, & valide incalescunt, æstuantque. Igne, motuque corporis percalefacti subito refrigerantur potu largo, & frigido, atque insuper ob id, quod rigente etiam gelu ex hypocaustis se foras proripiunt nudi, & non nisi linteo pudenda tecti.

Tussis valida, sonora, ad vespertas, & noctu aucta facile explicatur. Sed unde sputa copiosa, *puriformia* pulmonibus integris? unde seri tanta collectio? an ea ante præsentem morbum adfuerat, an eodem inchoante, cum pridie vino, & cerevisia, corpore fors æstuate, se ingurgitasset, primum nata? an, cum circa 24tam Augusti evacuationibus prægressis exhaustus, micante pulsu tenuissimo, & extremis frigidis jamjam moriturus videretur, extrema vascula relaxata serum dimisere, posthac non amplius resorbendum, idque in sinistro thoracis cavo potius, quam alibi, ob præexistentem fortasse pulmonis illius lateris quandam debilitatem?

Colon solito longius, & per gyros, antequam in rectum terminetur, circumductum, sæcum in anfractibus coacervatarum exitum morari necessum est. Hinc nasci aliquando fors hernia, ad quam intestino ita se habente prædisponcbatur, a *prolabente colo* potuisset, quam *raram* auctores dicunt.

Vomitibus stercoreis etiam illæsa Tulpii valvula,

uti per aliorum quoque observationes constat, fieri potest.

## SECTIO DECIMA QUARTA.

Sartor 34 Annos natus a duodecim propemodum annis ad scrobiculum per intervalla dolet, sanus cæteroquin. Vesperis cubitum concedens horruit. æstuatque: mane sequentis diei dedolatus, æstuans, difficili respiratione, tussi, & dolore punctorio utriusque lateris in thorace corréptus jacet. Difficilis in utrumque latus decubitus.

Terna venæ sectio dolorem pungentem minuit: at major postmodum pectoris oppressio orta.

Die morbi octavo ad nos delatus pulsus frequentem, non durum exhibuit. Calor ad attactum magnus: respiratio laboriosa, frequens, tussis moderata: sputa pauca, aquosa, mucosa: lingua humida, modice albescens, mens constans, alvus liquida, septies octiesve per 24 horas sponte mota. Factis compluribus per intervalla venæ sectionibus, sanguis semper crassa phlogistica, contracta, margine fimbriato contactus. Levamen a venæ sectionibus nullum omnino, si respirationem spectes, minor tamen utrinque punctorius dolor.

Die totius morbi 17ma ad finem vergente, cum se vesperi mox suffocandum ob brevissimum, difficillimumque spiritum diceret, denuo sanguis, isque ultima vice detractus est æque phlogisticus ac antea. Inde levamen exiguum, donec maiorem omnium solamen post mediam noctem mors afferret.

Sectio cadaveris pulmo uterque ita inflammatus deprehendebatur, ut exiguae solum ejusdem portiones sternum versus a phlogosi immunes essent: sinister, qua is claviculam respicit, exiguis tuberculis piceris magnitudine, intra spatium exiguum interstine  
guebat.

guebatur, duris, & nigricantibus. Pulmones ambo arcus nexibus ad pleuram ligabantur, excepta ea eorundem portione, quæ anteriora thoracis spectat, quamve ab inflammatione liberam esse diximus. Firmissima adhæsiō, & cultro, nisi alterutrum lædatur, haud dividenda, pulmones diaphragmati utrinque junxit.

Pleura inflammatione caruit. Omentum, convolutum in funis speciem, intestina non obtegebat, & explicatum perexiguum fuit. Colon ex latere dextro adscendens sub hepate contra se ipsum replicabatur, & flexum fecerat mirum quantum expansum, ac *tympaniticum*; at transversa coli pars, cum portione ejus per latus sinistrum descendente, angulum rectum, quin tamen contra se ipsum retorqueretur, in regione lienis formabat: utraque intestini coli portio, & quæ ventriculo subtendebatur, quæve per sinistrum decurrebat latus, angusta, contractaque funiculi non crassi speciem referebant. Curvatura *sigmoidea* nuncupata denuo justo amplior, & tractu semi-alterum pedem æquante vere *tympanitica* fuit. Ventriculi interna superficies colore plumbeo fœdabatur, versus pylorum maculis, & punctis rubris distincta. Vasa vero ventriculi multo ampliora solito, &, ubi in ramos dispescebantur, varicosa sanguinem multum nigrumque continebant.

Gravissima ea thoracis inflammatio est, quæ utrumque pulmonem, eumque ferme integrum corripit; priusquam enim noto quodam, atque omnibus aliis inflammationibus consueto exitu terminetur, *suffocando* occidit, cum auctum visceris volumen intra angustiore thoracem conclusum spiritum elidat. Sed & totius oceani sanguinei fluxum, & refluxum *stendo* vitam adimit, cum e contrario, ubi alteruter solum pulmo laborat, sanus alter ægrotantis vices subit.

Quod si quid auxilii contra diram hancce totius pulmonis inflammationem suppeditare ars possit, id erit solummodo sub exordium morbi gravissimi, si sanguinis subita, largave evacuatio ex vena lato vulnere pertusa instituatur, antequam fixa penitus phlogoseos sedes sit. Alterum post hæc subsidium cruenta scarificatio habet, non ubique instituta, sed in dorso, & inter scapulas facta, cujus rei ratio ex nexu vicino affecti visceris patet. Sed & hic meminisse oportet, quod, morbo jam adulto vigenteque, omnis medicina plerumque fera sit.

Sartores quam plurimos vidimus pulmonum morbis præ aliis laborantes. Cum enim corpore antrorsum incurvato, inclinatoque capite continuo ferme sedcant, necesse est, sanguinem per corpus inæqualiter dispensari, eumque in pulmonibus plus æquo accumulari, tum quod compressa ob situm corporis abdominis viscera minus sanguinis admittant, hinc ad superiora major humorum copia urgeatur; cum etiam, quod ob exiguas, quas sedentarii hi homines faciunt, inspirationes aggestus in pulmonibus sanguis non æque prompte, ac oportet, promoveatur. Plethora hinc *topica* nascitur, pulmonum videlicet, multaque alia incommoda ab hac origine fieri consueta.

Præterea cum hocce hominum genus præterquam quod sedentariam agant vitam, nullos inter sedendum labores peragant, qui exercendis musculis, firmandoque corpori pares sint, eos laxos, molles, & carniū esse effœminatarum oportet.

At vero pulmo & imbecillus, laxusque, & multo sanguine turgidus, si aërem frigidum forte incautius admiserit, universalem, lethalemque ut plurimum inflammationem suscipit. Sed etiam sanguinis sputum, tum in Sartoribus, cum aliis quoque, qui vestibus supra abdomen arctius constrictis, pressoque idcirco abdomine multum sedent, & scriptitanda oc-



eupantur, frequenter occurrit, chronicum plerumque, & *απυρετον*, quove ad seram usque senectutem nonnunquam conflitantur. Huc pertinere illa hæmoptœs species videtur, quam Hippocrates L. 2. prorrh. *periculi expertem* dicit.

Hanc hæmoptœs speciem haud satis exacte a recentioribus descriptam, utut frequentiore, ac vulgo æstimatur, Hippocrati nihilominus cognitam fuisse, depictamque ab eo, ex L. 1. de morbis videmus, ubi venarum *varicosam dilatationem* in pulmonibus adstruit, quam is *σπαδωνα* appellat, quod venæ pulmonum ob copiam inundantis sanguinis distrahantur, & varices, *νεσοι*, producantur.

En ipsa Hippocratis verba, rem egregie, ut ubique solet, & paucis exprimentia: *si vena quidem non omnino rupta fuerit, sed ea præcipue velut varix disenditur, quod etiam confestim quidem, ubi factum fuerit, dolorem quemdam tenuem, & tussim siccam exhibet, si vero diutius traxerit, & neglecta fuerit, primum quidem paucum, & subatrum sanguinem transmittit, mox etiam copiosorem, & maxime sincerum, deinde pus. His confert, si circa exordia curandos susceperis, ut manuum venæ relaxentur, & victus ratione utatur, ex qua siccissimus, & maxime exsanguis evadat.*

Pulsus arteriarum in nostro homine non duros, & progrediente morbo molliores continuo deprehendimus.

Flexus coli hepaticus, quem tympaniticum vidimus, multarum in sedentariis molestiarum fons, & origo est, apud illos maxime, qui gulæ liberius, simulque otio indulgent. Flatus ibi loci conclusi, a pastu præcipue, & turgente ventriculo, a longa sessione, anxios, morosos, capite gravatos, præcordiis dolentes faciunt, quos medici visceribus infarctis, hepate præprimis obstructo laborare perperam subinde arbitrantur, & ob eam rationem diutur-

næ medicationi subjiciunt, donec, quam restituere fatagunt, sanitatem, penitus labefactent. Frugale prandium, matutina abdominis trictio, motus, & usus frigidae hypochondriacos nostros epulones feliciter sanaret, quam quaecunque solvente, roborante, nervinoque, ac carminante scopo pharmacopœa suppeditat.

Vasa ventriculi dilatata, & ferme varicosa ea nobis in memoriam revocant, quæ Cl. Joan. Kœmpf de infarctu vasorum ventriculi peculiari, & lectu dignissima dissertazione, & post eum vere egregius Tissotus in ea, quam Cl. Zimmermanno inscripsit, epistola de *margo nigro* scripsere. Multa sessio, corporis inclinati situs, & impeditior idcirco per gastricum systema sanguinis circuitus facilem cardialgiæ illius, quam æger a duodecim fere annis querebatur, explicationem subministrat.

Ruptus successu temporis fortasse varix morbum *nigrum* Hippocratis, seu *atram bilem* exhibuisset.

## SECTIO DECIMA QUINTA.

Musicus Annorum 32 die 8va Octobris ad nos defertur, delirus, pulsibus celerrimis, & exiguis, & digito vel levissime appresso, evanescentibus. Per eos, qui ægrum huc detulere, id solummodo resciuntum est, hominem ab integro mense domi decumbere, usumque esse chirurgi cujusdam opera, qui dolenti testiculo medebatur. Cum genitalia examinarentur, deprehensum est præputium callosum, & glandi firmiter ita circumcirca nexum, ut nec retro glandem penitus, neque ex integro antrorsum trahi potuerit, & glans semidenudata prospiceret. Nulla cæteroquin ullibi exulceratio visa est. Sinister testiculus aliquantum major dextro apparebat. Orificium ure-

urethræ ita arctum , ut cereis nostris aditus præcluderetur.

Indicatio vitalis urgebat , & , quidquid causarum , vitæque subesse poterat , quod nos latebat , id nihilominus in propatulo erat , tenuissime micantem vitæ scintillam omni stimulantium , cardiacorumque apparatus , quasi affuso oleo animandam esse , priusquam ex toto extinguatur. Vesicantia , sinapismi , infusum radicum serpentariæ virginianæ , & contrajervæ cum larga camphoræ dosi , pléniores magisque vividos arteriarum ictus efficere , mensque post biduum ad exiguum tempus rediit , ut diceret , se ob plures gonorrhœas ab octennio difficulter , & filo tenuissimo lotium misisse. Plura narrare volentem delirium denuo superveniens prohibuit.

Hoc tempore , quo apud nos fuerat , urinam per paucam misit , & difficillime. Tandem tenuiori cathetere imposito lotium prærubrum , & sanguine tinctum evocabatur. Die 12ma Octobris ad finem vergente moritur.

Dissecta urethra insignem circa frænulum coarctationem monstravit , quæ difficilem in vivente catheteris applicationem fecerat , cum , superato hoc angustiori urethræ principio , nullum amplius nec cereus immissus , nec catheter obstaculum in reliquo ad vesicam itinere offenderet. Sana per reliquum urethræ tractum omnia ; nulla cicatrix , nullæque excrecentiæ , aut alia læsarum quondam partium vestigia. Sana seminalis caruncula , nisi quod utrumque ductuum ejaculatoriorum orificium solito magis ampliatum hiaret , & sinistrum , compressa prostatâ , pus funderet. Ex eadem glandula digitis leviter compressa , per omnes ejus excretorios ductus , sanos quidem ipsos pus proliciebatur , sectaque exiguos abscessus , lentis quosdam , ciceris alios , magnitudine continuit.

Vesicula seminalis sinistra pure plena fuit, ipsa ex membranis duris, crassisque, & hinc inde inflammatis composita. Sana dextra, & liquore seminali turgens. Cum teste sinistro, quem dextro majorem diximus, tunica vaginalis arctissime cohæsit, isque dissectus abscessum, qui nucem juglandem æquans pure bono, crassoque replebatur, in parte a testiculo accessorio averſa exhibuit.

Sanus uterque funiculus spermaticus. Vesica urinaria urinæ sanguinolentæ paucam quantitatem continebat, & maculas amplas profunde rubras, quasi totidem sugillationes, per omnem ferme internam superficiem monstrabat. Renes solito intensius rubebant: intestina tenuia erant inflammata.

Pulmo dexter labis expers, at sinister tuberculis, lentis cicerisque magnitudine, per omnem ferme substantiam obsidebatur, duris, albis, solidis, quasi ex molliori cartilagine factis: reliqua his interjecta pulmonis substantia admodum friabilis fuit, digitoque contractanti, & ipsi oculo minus sana apparebat: pleuræ præterea ubique firmissime necdebatur.

Pleura ipsa tota quanta in latere sinistro admodum crassa fuit, ita, ut maxima ejus crassities latum pollicem æquaret: substantia ejus in quibusdam locis molliorem cartilaginem & sectione, & ipso aspectu, tactuve referebat. Aliæ ejusdem pleuræ plagæ albidæ, tenaces, ac tendinæ erant, & variis sibi invicem impositis stratis cultri, aut etiam manuum ope ab se invicem dividendis, comparatæ. Transversim secta pleuræ frustula, digitisque compressa sanguinem per minutula vascula, ipsam ejusdem substantiam frequentissime percurrentia, ubique plorabant.

Resecto cranio laterales ventriculi sero flavescente turgidi inventi sunt.



## SECTIO DECIMA SEXTA.

Fœmina 30 Annorum mane inter pauperes ad nos venit, atque, ut in Nosocomium suscipiatur, petiit. Interrogata, quamdiu, & quo morbo laboraret, respondit, se per octo dies alvo cruenta, torminosa, citaque, non tamen supra modum exercitata fuisse, at fluxu hoc subsistente in quartanam incidisse, cujus binos universim paroxysmos pertulisset. Ab aliquot diebus, ex quo alvus quiesceret, abdomen intumescere querebatur. Cum bajuli susceptam ad cubilia ægrorum deportare juberentur, ipsa suis confisa viribus sola per gradus ascendit, seque exiit: cum in lectum se reclinat, repente moritur.

Caput dissectum, & sedulo perquisitum, nil vitiosum obtulit.

In cavo thoracis singulo libra feri flavescentis, & pauxillum aquæ ejusdem intra pericardium inventum. Pulmones sani. Cor solito multo majus: paræ magnitudini parietum crassities, & proportionatum utriusque ventriculi cavum. Aortæ principium, ut primum ex corde emergit, paucarum linearum tractu osseum fere totum fuit. Valvulæ ejusdem crassæ, partim cartilagineæ fuere, partim vero ejus naturæ, quæ inter os, & cartilaginem ambigit: parum mobiles, claudere, sive aperire aortam oporteret, & *semi-biantes* fuere.

In abdomine hepar mole ingens, & sanum per omnia, omnem præcordiorum regionem, hypochondrium scilicet utrumque, & quod utrique interjacet, occupabat. Sinister ejus lobus in hypochondrium finitrum protensus lienem & ipsum solito triplo majorem, triangularemque loco movit, detrusitque. Ventriculus exiguus prægrandi hepatis subster-

nebatur; ipse vero intestinum crassum mediocriter amplum potius referebat, ita tamen, ut in medio per dimidii fere pollicis tractum constriingeretur, & duos exiguos ventriculos exhiberet, quorum alter in alterum orificio vix digitum capiente aperiebatur. Color intestinorum non sanissimus, sed qui aut prægressam phlogosin, aut incipientem indicare videbatur: hinc inde inchoans livor notabatur.

Uterus, uti in nubili puella, exiguus, etsi præterito anno idque prima vice peperisset. Ovaria ovulis maximam partem non bonis foeta.

Mortem repentinam ab aucto, dum primo scabellum, & depositis dein vestibus lectum conscenderet, humorum ad cor allapsu deduximus, qui ab osseo aortæ capite, valvulisque ferme ex toto rigidis expediti, promoverique ulterius nequiverant.

Quibus vasa sanguifera obrigescere incipiunt, feniculis, aut quos gravis duravit labor, aut quibus hoc vasorum vitium peculiare est, ictus arteriarum tardi, durique sunt, non a sanguinis phlogistica densitate, copiae, sed ab aucta tuborum sanguiferorum rigiditate repetendi. Sanguis imprudentius missus vires convellit, & funestam brevi debilitatem accersit. Minuta enim humorum moles in vasa rigidiora impotentius agit, & sanguis, post venæ sectionem celerius circumducendus, fibras arteriarum frequentioribus contractionibus impares offendit. Hinc læsam, quæ inter fluida, solidaque intercedit, rationem ars nulla in integrum restituit.

At vero, ut sanguinis detractionem hi difficiliter ferunt, ita auctior ejusdem motus, aut copia subito nonnunquam letalis fit: hinc proportio vim motricem inter & pondus apud eos, quorum arteriæ rigidiores evadunt, intra multo arctiores terminos, ac apud alios hujus vitii expertes sita est.

Hæc eo dicta sunt, ut, ubi prudens offescentium

vasorum suspicio est, quid agendum, omittendumque sit, & quæ imponere medico nonnunquam possint, cumque ad instituendam sanguinis missionem hujusmodi ægro funestam perducere, clarius elucescat.

## SECTIO DECIMA SEPTIMA.

Quadraginta Annorum vir ex pistore, quod opificium admodum juvenis addidicit, per 23 annos miles, atque olim inter Borussios levis armaturæ equites stipendia meritis, die 3tia octobris ad Nosocomium venit, ex quo sequentia audivimus:

A 20 annis, quo tempore, cum acute laboraret, largis venæ sectionibus institutis intra tres fere septimanas convalesceret, quotannis quater, ut plurimum, ob frequentes narium hæmorrhagias venam sibi tundi curavit.

Ante sex annos, cum præter modum palleret, multumque salivæ in fauces conflueret, purgans, nescio cujus suasu, sumpsit, quo tæniæ portionem longitudine viginti ulnas æquantem abegit. Ternis vicibus eodem medicamento purgante ulus est, ita tamen, ut octo semper dies singulis purgationibus interponeret. Singula vice portio tæniæ expellebatur, ut, si totum accipias, quod excrevit, quadraginta ulnas æquet.

Toto militiæ tempore multoties æstuante corpore, ut fit, frigidam hausit, & ad hanc-usque diem largiori spirituum ardentium potu delectabatur; inde a multis jam annis doloribus laterum, pleuriticorum in morem, tentabatur, quos aut neglexit, cum ipsum nunquam lecto affigerent, aut celebrata subinde sanguinis missione mitigavit.

Ab octo annis phthisicum se dicebat. Sputabat pauca, mucosa, difficilia, subinde puriformia. Respira-

spirabat anxie, cum sibilo, tussi crebra, diu nocturne molesta. A binis mensibus respiratio magis laboriosa, sibilosa magis: sputa viridia, foetida, per pauca: carnes evanidæ: tussis frequentior: defluvium capillorum: virium jactura manifestior: vomitus per intervalla, mane præcipue, ac jejuno ventriculo, isque inanis, ut plurimum: diarrhoea: dolor ad scrobiculum. Ab aliquot diebus vesperi crura tument.

Cum, quæ usui esse videbantur, adplicarentur, increvere nihilominus enarrata symptomata: deglutitio fieri tandem difficilis: vox rauca vix percipienda. Die octava Novembris moritur.

Aperto thorace pulmo dexter ex toto gravissime inflammatus, si partem non magnam, quæ diaphragma respicit, excipias, deprehendebatur. Suprema ejusdem pulmonis pars conclusum abscessum pure tenui repletum continuit. Cavitas vomicæ tota, quæ ovum anserinum facile cepisset, particulis albidioribus, & quasi membranam mentientibus intus obducebatur. Circa abscessum inflammatio gravior erat, quam locis a vomica magis remotis. Haud procul ab hocce abscessu aliam exiguam, quæve nucem moschatam vix caperet, vomicam pure minus tenui, & ex albo virescente turgidam vidimus.

Sinister pulmo diaphragmati per quandam pseudo-membranam circum circa ita neciebatur, ut in medio inter diaphragma scilicet, & pulmonis infimam superficiem aliquid feri, quod elabi ob nexum pulmonis cum diaphragmate non poterat, concluderetur.

Idem pulmo arctius hinc inde ad pleuram religabatur, cæterum & ipse dire inflammatus, præterquam qua parte septum transversum contigit: is dissectus unicam, eamque parvam, ut quæ vix nucem avellanam æquaret, vomicam continuit pure  
non



non illaudabili plenam. Cæterum tota pulmonis utriusque substantia tuberculis obsidebatur, quorum singula ex granulis compluribus albis, durisque, & lentem æquantibus componebantur. Rami bronchiorum ossei. Cartilagine asperam arteriam, ejusque caput constituentes ita induruerunt, ut potius ossæ essent. Superficies interna trachææ aspera absque ulcusculis: rima glottidis amplissima.

In pericardio aquæ libra inventa est.

Dissecto abdomine hepar magnum flavo colore, totam ejus substantiam penetrante, reperiēbatur: vesicula fellea tenaci, multa, nigricante bile turgebat, &, licet fortiter compressa, liquorem tamen contentum in intestina, ob deletam ductus choledochi cavitationem, non effudit. Ventriculus exiguus, & intestinum referens, tunicas solito multum crassiores habuit. Glandulæ mesenterii confertissimæ, consuetum multum majores, duræ, & quæ inter eos maximæ erant, materia sebacea replebantur. Crassorum intestinorum glandulæ solito evidentiores apparebant, duræ pariter, quarum non paucæ, quemadmodum multæ quoque in mesenterio, cartilagineam fere duritiem dissecanti cultro opposuere.

Remedia in ulcere pulmonum, nataque inde consumptione usitata cum iis comparari merentur, quæ cadaveris hujus sectio exhibuit.

Sed cum non absimilem sectionis historiam, & quædam ad curam phthiseos pertinentia supra retulerim, curta eorum, quæ hic observavimus, narratio ad stabilienda superius prolata sufficiet.

## SECTIO DECIMA OCTAVA.

Vidua 37 Annorum 25ta Junii ad nos venit. Per quinque menses menstruis caruit, quæ ante octo dies redierunt. Ante 11 dies prægressa ira frigidam hau-

*Pars I.*

*I.*

*fit,*

sit, unde dedolatio, & gravitas corporis, & præcipue capitis stupor, horripilationes, calores, appetitus dejectus. Per plures dies horrores caloribus mixti continuabant.

Pridie quam ad nos veniret, sumpsit sal amarum, a quo per hos dies alvus trigesies septies movebatur. Vena secta fuit cum levamine quoad corporis gravitatem. Hucusque semper erecto corpore laboravit, & morbum facile tulit. Cephalalgia: somnolentia continua: lingua biliosa: os mucosum, amarum: spasmodica faucium constrictio præcedentibus vomendi conatibus, & tussi: sitis multa: calor jam nullus: petechiæ purpureæ hac nocte eruperunt. Pulsus celerior naturali, mollis: respiratio non læsa.

Retulit ægra, se custodem adstitisse infanti ex petechiis decumbenti, qui modo denuo convaluerit.

Hæc foemina, cum post paucos dies, ex quo suscepta in Nosocomium est, petechiæ successive evanescerent, mansit tamen somnolenta, tarda, de sanitate sua plurimum anxia, querula, immorigera, sæpius secum ipsa interdiu, noctuque mussitans, varia obstinate appetens, sano tamen iudicio, & memoria firma.

Pulsus aut naturalis, aut naturali paulo celerior, debilisque: calor præter naturam nullus. Gravitas perpetua capitis ad tempora, auresque præcipue cum tinnitu valido, continuo. Somnus noctu bonus videbatur: interdiu, cum dormire videretur, somnum tamen se capere negavit. Vires non valde dejectæ, cum & facile se converteret, corpusque erigeret, & in lecto sederet: quin & extra lectum esse poterat. Continuum inappetentiam, oris gustum non amarum, attamen prævum semper quæstæ est. Cæterum de nullo aut pectoris incommodo, aut ventriculi, abdominisque dolore unquam querebatur.

Diarrhoeam toto fere tempore, quo apud nos de-

cubuit, patiebatur, quam inde ab assumpto extra Nosocomium purgante ortam continuo persistere agebat. Alvus quacunque ratione comprimeretur, nihilominus denuo fluere cœpit.

Die 13 Junii, cum & præcedentibus diebus, eoque ipso die paulo melius valere existimaretur, etsi toto tempore, quo apud nos fuit, nil detractum ex viribus, quin potius quædam earum accessio facta videretur; cumque ejus diei hora tertia pomeridiana & medicamentum propinatum alacriter hauriret, & apte prompteque responderet, ac erecto sederet corpore, elapso horæ quadrante, dum in latus se convertit, repente moritur.

Cum ipsemet eo die ob adversam valetudinem domi detinerer, atque idcirco sectioni, uti alias solebam, interesse non possem, Cl. D. Joannes Philippus Ritter Bambergensis Franco, dignus praeclaro genitore filius, qui superato multiplici tædio tempus fere omne penes lectos ægrorum in perdiscendo morborum diversissimorum genio, modoque medendi exegerat, cadaver cum assistente chirurgo secuit, & sectionis historiam, ut sequitur, mihi tradidit.

Collum, dorsum, & humeri livebant; abdomen tactu molle. Margines locorum vesicantibus tentatorum gangrænosi. Dura mater cranio solito firmitus adhæsit: vasa piaë matris multo sanguine infarcta: substantia cerebri valde compacta, ejusque medulla pluribus, quam alias, punctis sanguineis distincta. Plexus choroidei sanguine turgabant. In dextro ventriculo superiori solito plus aquæ continebatur. Apophysis clinoidæ posterior sinistra erat scabra. Pulmo sinister solito flaccidior per membranas cum pleura, & diaphragmata undique cohæsit.

Hepar, lien, pancreas in statu naturali inveniebantur. Vasa coronaria ventriculi sanguine multo re-

pleta. intestinum cœcum, colon incipiens, & mesenterium inflammata deprehendebantur. In mesenterio. repertum fuit *ulcus cancrosum* cum initio intestini coli communicans, & in illud materiem amurcosam, pultaceam, foetidam effundens. Margines concavi renum erant solito ampliores, profundiores, & laxiores: reliqua secundum naturam fuere.

Quod ad cohæsiones pulmonum ad partes vicinas attinet, quæ nullum in respirando impedimentum fecere, non est, quod nostram admirationem mereatur, cum id & aliquoties a nobis, & aliis quam frequentissime fuerit observatum. Notatu dignius est, quod intestinorum pars quædam inflammata fuerit reperta, quin de dolore abdominis, de febris, caloreque unquam quereretur. Ulcus mesenterii in colon apertum, quodve, qui dissecuit, *cancrosum* dixit, an morbi petechialis effectus, an ex tumore diu antea ibi latente natum fuerit, minus constat. Colluvies putrida in intestinis diu collecta, ni & tempestive, & apta via eliminetur, febris petechialis & communissima causa est, & inflammatione, abscessu, gangræna intestinorum præcipue, sed etiam vicini mesenterii, cerebri, & pulmonum &c. occidit, si ea in sanguinem recepta ad hæc partes decubuerit.

## SECTIO DECIMA NONA.

Vidua 41 Annos nata, duodecim prœlium mater a sexennio menstruis caret. Ab Anni quadrante abdomen intumescere, atque frequentibus infestari flatibus queritur.

Ante decem septimanas prægressa per aliquot dies oris mucositate, dejectove appetitu, cholera corripitur: quæ vomitu rejiciebantur, biliosa fuere. Dolor eo toto die in abdomine ingens. Die altero cholera nulla, at idem abdominis, qui pridie dolor, minus



minus tamen tumescens, ac unquam alias. Dolor hic sensim minutus per aliquod tempus evanuit. Exactis quatuor septimanis bene valere videbatur, nisi quod abdomen per intervalla tumeret, tensumque adpareret. Elapso hoc tempore denuo cholera recrudit, qua post tres demum dies cessante sanitas rediit, etsi minus integra, quam antea.

Cum die quarta Septembris ad nos deferretur, præcedentibus sequentia adhuc addidit: a decem diebus alvum non reddidisse: per octo dies ultimos quotidie ter, quaterve biliosa, mucosaque cum dolore totius abdominis vomuisse. Hunc abdominis dolorem per intervalla gravissimum fuisse, exortumque a sinistra regione lumbari extendi ad umbilicum usque.

Cum ad Nosocomium in sella portatili deferretur, alvus moveri cepit, jamque septies intra paucas horas dejecit. Abdomen tumet, doletque cum sensu exulcerationis ad attactum aucto. Nulla in abdomine duries, nulla ejus tensio. Inappetentia: calor nullos præter naturam: sitis nulla, aut vix ulla. Pulsus molles, naturales, aut naturalibus paulo citatiores.

Dato emulso eccoprotico, cui pauxilium camphoræ jungebatur, denuo aliquoties dejecit: dolores abdominis aliquantum minuebantur, & per intervalla exacerbabantur, sic tamen, ut, nisi contrectata, eos facillime perferret. Borborygmi fere continui, & flatus permolesti sursum, deorsumque erumpentes. Usa est deinceps emulsis, oleosisque, additis lenioribus carminantibus, quibus exiguum levamen obtinebatur. Calor nullus: pulsus frequentes, exigui. Inappetentia, & os insipidum cum levi amarore: facies diluta flavedine tincta. Somnus parvus. Alvus facilis. Fœtidissimæ, & coloris castanei, & aquosæ fæces. Dolor ad attactum

Etum auctus in toto abdomine, urinæ difficiles, stranguriosæ, colore laudabiles.

Die 12ma Septembris circa vesperam repente ejulat, de acerbo totius abdominis dolore, & suffocante respiratione queritur: pulsus frequentissimi, valde exigui: mentis præsentia. Elapso unius horæ spatio quietior facta est, & circa mediam noctem mente constans moritur.

Cutis in hypogastrio pendula, rugosaque fuit, qualis in iis solet, quæ frequenter peperere. Abdomen tumidulum, & prominens. Pinguedo multa sub cute pectoris, & abdominis musculos obsedit.

Dissecto abdomine foetidissima materies profluxit, coloris, & consistentia ejusdem, quam alvo reddidit. Omnia intestina, & mesenterium inflammata erant. Peritonæum ubique fere inflammatum vasa sanguifera copiosissima exhibuit. Omentum inflammatum, & hinc inde gangrænosum. Intestinum ileum, quo loco in cæcum inseritur, tractu quatuor digitos transversos longo angustum, sphacellatum, & foramine tres fere lineas amplo pertusum. Intestini angustati cavitas perexigua. Parietes crassiores solito, & hinc inde arrosi.

Vesiculam felleam calculi tres penitus repleverunt, nullaque ibi bilis, nisi perpauca, eaque glutinosissima calculos obliniens reperiiebatur.

Hepatis substantia magis, ac naturaliter solet, friabilis, dilutum colorem flavum dissecta monstravit. Reliqua juxta naturam se habuerunt.

Sectio hæc complurium observationum ferax demonstrat denuo, inflammationem intestinorum adesse posse cum febre vix ulla, & dolore exiguo, idque frequentius fieri, ac communis opinio ferat.

Quod si doloris acerbiteriam ex querelis, ejulatu, jactatione metiamur, constabit, hanc, de qua  
agi-

agimus, foeminam abdomine gravius non doluisse, etsi attactum paulo rudiores non tulerit.

Confirmatur & hac, & aliis a Cl. Morgagnio recensitis historiis, dolorem colicum, pulsibus & urina bonis, per aliquot dies valde tolerabilem, subito letalem fieri posse. Ultimis enim diebus ægra apud nos decubuit, morbum haud graviorē pertulit.

Quin & ex eodem Cl. Auctore, nostrisque nonnullis sectionibus constat, inflammationem intestinīs alte insidere posse, etiam *nulla præsente febre*, dummodo eam non ex pulsu solum frequentiori, sed ex auctiori simul carniū colore definiamus, quem nostræ huic ægræ abfuisse antea dixi.

Hinc moniti ab hoc Auctore prolati (L. III. epist. anat. med. art. 21.) veritas novo denuo argumento stabilitur, ita enim is ait: *quando cum aliis inflammatorum intestinorum signis vehementem dolorem, & acutam febrem in ægrotantibus deprehendes, jure quidem, meritoque credes rei medicæ auctoribus hæc duo inter præcipuas notas magnæ intestinorum inflammationis ponentibus; nec tamen, si quando alterum, vel utrumque horum aut abesse, aut vix esse invenies, continuo putabis, aut nullam esse inflammationem, aut levem, neque gangrænam, & sphacelum in eorum esse intestinīs non posse, in quibus duo illa præcessisse non videris.*

Signa ergo diagnostica inflammationis intestinorum a Boerhavio recensita, videlicet: *febris acuta continua, sitis ingens, calor magnus, pulsus durus, dolor igneus, urina flammea, debilitas subitanea* ad dignoscendam intestinorum inflammationem non raro parum conferunt, neque in ægra nostra multum conferebant.

Cl. Sennertus inter signa intestinorum inflammationum urinæ suppressionem posuit; ægra nostra eandem parce, strangurioseque misit.

Inter innumeras ilei, & colici doloris causas æque frequens intestinorum inflammatio est, eaque, ut vidimus, non semper sævis symptomatibus stipata, sed subdola, diu nonnunquam, attamen tolerabiliter affligens, sed quæ nihilominus ægros non opinantes occidit, dum gangrænam & sphacelum intestinis inducit.

Hanc in rem præclara quædam sæpius laudatus Morgagnius scripsit, & quid Albertinus, & Valsalva hoc in casu factitarint, diligenter exposuit. Uterque, uti in initio venæ sectionem non reprobabant, ita morbo vigente, & jam progresso ab eadem abstinebant. Rationem non addidere, sed observationem, citius videlicet ægros mori detracto sanguine, sed & mori non detracto, serius tamen. Hoc in casu ab omni eo sollicite abstinebant, quod inter *magna remedia* numeratur. His stantibus, uti vanum auxilium in exiguis jusculeorum oleosorumque dosibus quæreretur, ita inutilia fore quæcunque alia medicamina arbitror, & ignominiam præstantissimis alias remediis affricari.

Dum caute agendum existimo, ubicunque alvus pertinacior, nec enematis, nec mitioribus, & forma liquida exhibitis purgantibus auscultat, dumque rebus ita se habentibus ad oleosos haustus, ad juscule tenuia, ac plenam ab omnibus tum alimentis, cum remediis abstinentiam potius confugiendum reor, quam ad quadruplicatas purgantium, etiam validiorum, doses; Neutiquam improbo, quæ a claris in arte viris & observata, & usu comprobata, leguntur, etsi ab hac nobis laudata methodo aliena sint.

In curando ileo plurimum interest, ut mali causa detegatur, qua ignorata empiricum est, quidquid tentaveris.

Methodus huic morbo medendi vaga plerumque est, eaque, quæ variis, iisque persæpe oppositis remediis utitur. Verum si in ullo unquam morbo ob-



servandus is canon est, *non esse ab medico nocendum, ubi is prodesse nequeat*, id profecto in ileo sanando obtinet, ubi obicuræ mali causæ nullam medico agendorum notitiam suppeditant. Malim ego cum egregio Valsalvæ præter exiguam olei e dulcibus amygdalis pressi quantitatem ægro nil quidquam propinare, ubicunque me morbi causa fugerit, aut ea talis sit, quam validius aggredi sine gravi noxa nequeamus. Imo malim potius in ejusmodi casu otiosus spectator esse, quam causæ ignarus ea moliri, quorum me postea lecto cadavere pœniteat. Jusculum tenue pulli vel solum, vel cum oleo amygdalino exiguis dosibus, atque ita exhibitum, ut æger nil vel ciborum, vel potulendorum vigente ileo accipiat, in plerisque ilei causis directe prodest, &, ubi nec hoc, nec aliud quidpiam prodesse potest, non nocet. Affertur veritas ex perpenis frequentioribus ilei causis patebit.

Hauftus oleosos præ aliis remediis in ileo imminente perefficaces experti sumus. Binis hoc Anno vicibus alvus pertinaciter clausa nobis obvenerat, non a vitio quodam organico, & incurabili, sed a materie, ut videbatur, acri, vellicante, & spasmopertinaci intestina alicubi locorum stringente. Purgantia varia, acutaque, enemata primo emollientia, dein acria, acerrima nil profecere. Imminebat in una (utraque enim ægra juvencula fuit irritabili supra modum nervorum systemate donata) vomitus stercoreus, cum assumpta pertinaciter vomeret. Carminantia, opiata ne hilum profecere. Soli haustus oleosi cito alvum referabant.

Ægra nostra stercorea vomuit, etsi materies vomitu rejecta e tenuibus solummodo intestinis esset. Verum aliunde jam constat, vomitum stercoreum, ligato etiam ileo intestino in, felibus & canibus, itemque ob herniam incarceratam constricto, non raro fieri.

## SECTIO VIGESIMA.

**Scriniarius** 27 Annorum a longo tempore sanus, mane per duas fere horas valide riguit, subsequente calore intenso. Circa meridiem dolor pungens partem posteriorem lateris dextri infra scapulam invasit. Respiratio difficilis: oppressio circa iterum. Post meridiem hora tertia dolor pungens magis ad anteriora ejusdem lateris processit, ibidemque fixus mansit, inter tussitandum auctus. Sitis multa. Ad noctem venæ sectio ipsi facta cum levamine doloris, & oppressionis. Nox insomnis.

Die altero dolor punctorius ut pridie: oppressio pectoris magna: respiratio difficilior: lingua alba, atque in ejus latere dextro ulcusculum aphtham referens. Hoc die in Nosocomium a medico, ut vocant; Assistente, meas, tunc graviter ægrotantis, vices obeunte, susceptus est. Pulsus plenus, celer, durus. Facta venæ sectio ℥. j. cum levamine aliquo.

Die morbi tertio dolor pungens nullus fere amplius: oppressio minor: pulsus fortis, plenus, valde durus: respiratio difficilis: facta iterum venæ sectio unc. X. crusta phlogistica admodum crassa, tenax: levamen nullum.

Die quarto nulla emendatio: facta venæ sectio unc. VI. sanguis semper idem.

Die quinto nulla emendatio. Venæ sectio unc. X. A meridie alvus quinquies sponte mota est.

Die sexto supervenit mane dolor pungens lateris sinistri, totam occupans plagam, quæ tertiæ costæ veræ, & primæ spuria, numero a superioribus ducto, interjacet. Hypochondrii ejusdem mollis portio æque dolere cepit, dolore ad attactum aucto. Oppressio pectoris ingens: respiratio difficillima. Pulsus plenus, durus, celer. Venæ sectio ℥. i. Applicatum loco dolenti vesicans est.

Die

Die septimo dolor lateris nullus amplius, sed oppressio pectoris aucta; anxietas ingens: respiratio solo abdominis motu peracta. Pulsus minus fortis.

Die octavo respiratio adhuc difficilior, maxime anhelosa; omnia pessima. Eodem hoc die mors.

Decima octava post mortem hora sectum cadaver est: aperto thorace pulmo uterque ad latera, & versus dorsum, item cum diaphragmate sat firmiter mediante pseudomembrana, eaque crassa, alba, lardacea necēbatur. Membrana hac lamellatim ablata, subjacens pleura sana reperta est.

Pulmonis dextri substantia inflammatissima, durissimaque erat, & frustula plura aquæ injecta fundum illico petebant. Sinister vero hinc inde tantum inflammatus eadem, licet minus crassa, pseudomembrana pleuræ cohæsit. Membrana hæc ut plurimum digiti crassitiem æquabat, illi, quam per totum morbi decursum in superficie sanguinis emissi vidimus, simillima. Seri flavi paulo consistentioris circiter libra in cavo dextro thoracis collecta, pus, aut potius *puriformem* materiem referebat. Liquor pericardii quantitatem solitam vix non excedebat. Cor magnum: vasa cordis turgida, quasi injecta. Venæ cavæ initium polyposa concretio replevit.

Abdomen dissectum intestina tenuia, ileum præcipue, & jejunum, partim summe inflammata, partim gangrænescentia monstrabat: hinc inde intestina tegebantur materie *purulenta*, aut purulentam potius *mentiente*.

Intestinorum quoque crassorum pars, mesenterium vero totum inflammata fuere. In cavo abdominis *puriformis* pariter materies, sed paulo consistentior illa, quæ in thorace reperta est, ad unc. VIII. circiter effusa erat. Hepar sanum pseudomembrana, multo licet tenuiori, circumvestiebatur. Lobus hepatis medius ope ejusdem membranæ spuriae ventriculo

culo jungebatur. Lien sanus. Omentum convolutum, leviter inflammatum. Renes sani.

Sectio hæc intestina inflammata, partim vero jam gangrænosa, item mesenterium totum dire inflammatum exhibet, licet nulla enteritidis signa unquam apparuerint, si dolorem hypochondrii sinistri, auctum, si ea plaga contrectaretur, & die primum sexto totius morbi supervientem excipias, qui etiam ipse die sequenti evanuit.

Transitum pleuritidis in peripneumoniam Hippocrates, suffragante ipsi experientia, jure damnat. Pleuritidem in peripneumoniam abiisse die septimo morbi arbitrabamur, ubi *dolor omnis cum pravorum symptomatum augmento* disparuit, respirationis præcipue, oppressionis, atque anxietatis.

En denuo pleuram in pleuritide vitii expertem!

Materies illa, quæ pus ex parte simulabat, ex parte vero in membranas coivit, viscera aut connectentes, aut obtegentes, ea ipsa videtur esse, quam emissio sanguine, atque in patina asservato, *crustam phlogisticam* appellant; hæc enim mala crisi per ultima exhalantia vasa in ea corporis cava subinde deponitur, unde nullum natura exitum fecit. Neque id absque exemplo est, cum in anginis toties contingat, ut tonsillæ inflammatae materiem phlogisticam conferim dimittant, quæ mox in membranam eas partes obvestientem inspissatur, aut suppurationem mentitur; inde est, quod, qui frequentius anginosi fuere, mirentur, se post tot suppurationes tonsillarum his tamen partibus adhuc *integris* gaudere.



## EXCERPTA EX NECROLOGIIS.

## NOSOCOMII AD S. S. TRINITATEM.

Cum Medici ordinarii in Nosocomio S. S. Trinitatis provinciam subiveram, id inter alia operam dedi, ut, quæ de statu Nosocomii præterito me edocerent, evolverem.

Hæc inter necrologia reperi paucis abhinc annis conscribi cœpta.

In Necrologiis his summa susceptorum singulo mense, mortuorumque reperitur; inde majorem, minoremque morborum quovis Anni tempore copiam collegi, etsi probe sciam, hac methodo morborum numerum quovis mense grassantium non exacte stabiliri, manente enim eodem lectorum numero, si qua tempestate & plures simul, & diuturniores grassentur morbi, pauci dato tempore ægri numerabuntur, cum ob morbos diuturniores, qui suscepti sunt, diutius retineantur, aliosque interim ab hoc beneficio excludant.

Id præterea scire convenit, ægros non paucos rebus jam conclamatis huc deportari, quosdam, ut primum suscepti fuerint, expirare. Ea apud nos lex obtinet, ut miserrimum quemque præ omnibus aliis dignum existimemus, qui in Nosocomium suscipiatur.

Alia est apud alios *malignitatis* notio. Inde non idem apud omnes eorum numerus erit, quos maligna detinuisse febris dicetur, aut enecuisse. Malignitatem *factitiam* novi. Verum opinari haud decet, virum hujus per tot annos Nosocomii medicum, erro-

rem tam turpem erravisse, ut eas febres in classem malignarum rejecerit, quas communior praxis a malignitate absolvit.

Sed quid utilitatis habebunt tam incompletæ sectorum cadaverum descriptiones quas hæc necrologia referunt? mallem sane accuratas; hæ cum deficient, incompletis contentemur, modo de earum veritate constet, quamadmodum certo constat. Nil parvum, nil contemnendum in morborum historia, dummodo id, utut exiguum, nostraque attentione minus dignum videatur, ipsius naturæ semper veridicæ opus esse demonstretur.

Sagax medicus, & observationum amans, quibus suam & originem, & incrementa omnis genuina medicina debet, probe sciet, nullam observatiunculam, utut aut prætervisam, aut nullius habitam momenti ita vanam esse, ut suam symbolam ad ampliandos artis limites non conferat. Sciet is minutissima quæque, de quibus ipsum naturæ vox edocuerit, suos in usus convertere, optime gnarus, ea non fortuito, cœcove casu, sed æque ex immutabili, æternaque lege, qua totum hoc universum gubernatur, proficisci, quam grandia illa naturæ molimina, quæ indoctorum etiam oculos feriunt.

Non possum hoc loco, etsi minus fortasse ad propositum faciat, quid de non paucis observationum collectoribus sentiam, reticere: esse videlicet, qui tantummodo insolita, mirabilia, & rara colligant, quive ea, quæ singulo fors sæculo bis eveniunt, atque merito monstra audiunt, omni sollicitudine venentur, dum interim mala illa quotidiana, quibus miseri affligimur, tanquam attentione curatori indigna, sicco, ut ajunt, pede pertranseunt. Hos, dum insuetis inhiant, & procul positos, obviorum contemptores, medicinam fere semper inutilem, & haud raro periculosam in morbis vulgatissimis factitare necessum est.

Que-

Quemadmodum igitur hæcce rariora negligere haud convenit, ita omnis danda opera est, ut morborum vulgarium genius, & quæ illorum ad se invicem ratio, quisque ad diversa, quibus oriuntur, vigent, emoriuntur, tempora respectus sit, quis unius in alterum transitus, complicatio &c. exacte pernoscat.

Collectio omnium constitutionum epidemicarum hucusque descriptarum, & emolumentum afferret arti, quo insignius haud datur, & collectoris nomen faceret immortale. Sed, unde digressi sumus, redeamus.

Necrologium Anni 1761 (antiquiora enim non reperi) exhibet ægros per anni decursum susceptos 1056

Quos inter viri fuere . . . . . 547

Fœminæ . . . . . 509

Mortui inde sunt . . . . . 120

Hoc Anno Ver maxime letale fuit; longe minus Æstas, & Autumnus, quamvis æstate plures numero vigerent morbi. Autumnus morbos non solummodo minus letales, sed & pauciores numeravit. Hyems morborum paucorum, sed æque propemodum, ac Ver letalium ferax.

Proportio mortuorum ad susceptos proxime est, ut 1. 8 $\frac{3}{4}$ .

Ad diem quintam Februarii sequentia notantur: *Mortuus est in tympanitide, cujus abdomen, immensam in molem extensum, in sectione monstrabat feri vix libram, intestina vero præter omnem modum expansa, ac simul quoad structuram ad digitum usque crassa, inflammata, & sphacelata.*

*Die 3tia Martii mortuus est ex luxatione vertebrarum lumborum, & paralyti inferioris partis corporis, quod exenteratio etiam monstrabat, cum sphacelo viscerum abdominis, præsertim vesicæ.*

*Die 5ta Septembris fœmina ex febre semi-tertiana,*

¶ *tandem suppurato mesenterio periit.* Febres semitertianæ ex putridarum, malignarum, familia, a coluvie prava primarum viarum oriundæ, tandem viscerum abdominalium abscessus, gangrænam, sphacelum inducunt.

*Die 14ta Octobris periit ex metastasi ad pectus, postquam febrim mali moris remittentem superavit.*

Observationes meæ complures docent, in febribus biliosis, malignis, exanthematicis, continuis remittentibus, morbo neglecto, perversè tractato, multum provecto, emesi aut neglecta, aut, ubi necesse fuerat, non repetita, materiam morbi ex systemate gastrico ad vias secundas traductam ad pectus decumbere, tussim continuam, & sibilosam, difficilem, strepentemque respirationem facere; ubi in moventibus, incidentibus, sibilio, kermete, vesicantibus, radice arnicæ spes tota salutis repouenda.

Anno 1762. suscepti sunt . . . . . 1030

Mortui . . . . . 87

Proportio mortuorum ad susceptos ferme  
ut . . . . . 1. 11  $\frac{2}{10}$

Quæ ægrorum quovis mense copia fuerit, quæve morborum letalitas, ex Necrologio hujus Anni non constat. Menses tamen Aprilis, Majus, & Junius præ reliquis perniciem attulere.

Mense Januario hujus anni periit quidam ex febre maligna, retrogressa parotide. Mense ejusdem Anni Martio duo ex maligna febre, exstante parotide occubuerunt. Ad diem quintam Augusti: *periit in scirrho hepatis admirando cum ingenti tumore cystico, instar steatomatis pleno pinguedine capillis copiosis intertexta, ubi simul omnes partes abdominis scirrhosæ erant.*

Mense Decembri plures ex maligna febre periire, ac aliis mensibus.

Anno



Anno 1763. summa susceptorum non reperitur;  
mortui sunt . . . . . 95

Inter susceptos ex febre maligna decu-  
buere . . . . . 193

Inde mortui . . . . . 28

Inter mortuos periere ex dysenteria men-  
sibus Augusto, Septembri, & Octobri gras-  
sante . . . . . 9

Proportio ex febre maligna mortuorum  
ad eos, qui eadem laboraverunt fere ut . . . 1. 6 $\frac{2}{3}$

Mortui dysenterici ad summam omnium  
mortuorum ut . . . . . 1. 10 $\frac{5}{9}$

Proportio mortuorum ex febre maligna ad  
omnes mortuos fere ut . . . . . 1. 3

Plura funera per hyemem notantur, quam cæ-  
teris Anni partibus, eaque potissimum fuere homi-  
num ex malis chronicis pereuntium.

Ad diem 21am Aprilis legitur periisse quidam,  
vel quædam ex febre rheumatica maligna, in qua ad  
membra diversa tumores phlogistici statim sphacelati con-  
tingebant.

Ad diem 31am Septembris periit in ictero nigro chro-  
nico cum hydrope. Exenteratus monstrabat hepar ulce-  
rosum, & corruptum, nec non mesenterium totum quoad  
glandulas scirrhusum.

Anno 1764. summa susceptorum fuit . . . 857

Mortuorum . . . . . 63

Proportio defunctorum ad susceptos pro-  
xime ut. . . . . 1. 13 $\frac{2}{3}$

Inter hos fuere febre maligna affecti. . . . 181

De quibus mortui . . . . . 24

Proportio febre maligna defunctorum ad  
omnes ex eadem decumbentes proxime ut . . 1. 7 $\frac{1}{2}$

Proportio maligna laborantium ad omnes  
ægros proxime ut . . . . . 1. 4 $\frac{4}{5}$

Proportio ex febre maligna mortuorum ad omnes mortuos ut . . . . . I. 2 $\frac{1}{2}$

Numerus ægrotantium multo minor ac prioribus tribus Annis. Autumno morbi paucissimi, & minime lethales. Ver paucioribus morbis, quam Æstas, pluribus quam Autumnus, sed utraque tempestate lethalioribus insigniebatur: hyems a vere haud multum abludebat. Omnium mortuorum dimidia fere pars ex febre maligna periit.

Die 6ta Aprilis æger, vel ægra periisse notatur ex apoplexia post lethargum; in exenteratione se monstrabat abscessus in cerebello; & alter circa os petrosus, & tertius circa sinus laterales ita, ut os occipitis plenum fuerit purulenta extravasata materie, descendente per foramen occipitale ad medullam oblongatam.

Ad diem secundam Novembris hæc reperiuntur: periit in hemicrania chronica ex tumore cystico ovum columbinum æquante supra sellam turcicam, & nervum opticum sito, in exenteratione reperto.

Anno 1765. summa susceptorum . . . . . 903

Mortuorum . . . . . 87

Inter hos fuere febris maligna affecti . . . . . 162

Inde mortui . . . . . 33

Proportio omnium mortuorum ad susceptos proxime ut . . . . . I. 10 $\frac{2}{3}$

Proportio mortuorum ex febre maligna ad eos, qui ex eadem decubuerunt proxime ut . . . . . I. 5

Proportio maligna laborantium ad omnes ægros proxime ut . . . . . I. 5 $\frac{1}{2}$

Proportio mortuorum ex febre maligna ad omnes mortuos ut . . . . . I. 2 $\frac{7}{11}$

Vere funera plura, quam Æstate, at morbi multo pauciores. Autumno morbi æque multi, ac Æstate, sed mortes plures. Hyeme ægrorum copia eadem ac vere, sed paulo minor mortuorum.

Ad diem octavam Januarii leguntur sequentia :  
allata statim mortua est , & in exenteratione reperta  
est magna quantitas feri purulenti in abdomine ex ab-  
scessu rupto intra membranas ventriculi sito , & perfo-  
ratione totius structuræ ejusdem.

Ad diem decimam ejusdem mensis : periit in ictero  
nigro cum vomitu perpetuo : in exenteratione repertus  
pylorus cum parte duodeni scirrhusus , & cancrusus.  
Cystis fellea semi-cartilaginea loco bilis continens serum  
album.

Ad 20am Martii : periit in asthma ex dilatatione  
immensa cordis , & polypo in dextro ejusdem ventri-  
culo magno , cum extravasatione feri in dextra cavitate  
pectoris librarum quatuor.

Ad diem 7mam Julii , periit post hæmitritæam facta  
suppuratione mesenterii , & colliquatione.

Ad diem 18vam Septembris : in febre mali moris  
remittente cum supervenientibus parotidibus.

A diem 4tam Novembris : periit in febre lenta ex  
scirrhuso tumore cystico , magnitudine capitis humani in  
dextra parte abdominis se adnectente ad ovarium , &  
musculum psoam , continente materiam purulentam caseo-  
sam hinc inde pilos habentem.

Tum in hoc , cum & in aliis Necrologiis non  
infrequens mentio fit mortuorum in febre maligna  
superveniente apoplexia.

Anno 1766. summa susceptorum fuit . . .	1057
Mortuorum . . . . .	69
Inter hos fuere febre maligna affecti . . .	117
Horum quatuor habuere petechias, quin- que vero miliaria alba. Febri maligna periire . .	14
Proportio mortuorum ad susceptos pro- xime ut . . . . .	I. 15 $\frac{2}{3}$

Proportio eorum , qui febre maligna la- borabant, ad omnes ægros proxime ut . . .	I. 9
--	------

Proportio mortuorum ex febre maligna  
ad omnes maligna laborantes ut . . . . I.  $8\frac{2}{4}$

Proportio mortuorum ex febre maligna  
ad omnes mortuos proxime ut . . . . I. 5

Vere morbi pauciores, quam aliis Anni partibus,  
at funera multa: paucissimas mortes numeravit Æstas,  
etsi morbis quam plurimis infestaretur. Hyems  
maxime lethalis fuit, etsi morbos haud multo plures,  
ac Ver habuerit. Autumno pauciores, quam Æsta-  
te morbi, plures vero, quam Hyeme, & vere reperi-  
untur, non multum lethales.

Ad diem 20am Jan. habentur sequentia: *periit in fractura cranii, nimirum in osse bregmatis sinistro usque ad suturam coronariam, & dextro ad orbitam oculi, usque cum extravasatione sanguinis in fundo cerebri ad uncias tres ex lapsu accepta.*

Ad diem 2dam Julii: *periit in hydrophobia hora post susceptionem in Nosocomium vigesima quarta, morsus die 15ta mensis præteriti.*

Ad diem 12mam Augusti: *periit in febre rheumatica, facta depositione vehementi ad fauces & linguam intra paucas horas suffocante.*

Anno 1767. suscepti . . . . . 1017

Mortui. . . . . 78

Inter hos fuere febre maligna affecti

Sine exanthematibus . . . . . 93

Cum miliaribus albis . . . . . 12

Cum petechiis . . . . . 5

---

Summa 110

Ex his mortui . . . . . 16

Proportio mortuorum omnium ad suscep-  
tos ut . . . . . I.  $13\frac{1}{6}$

Proportio maligne decumbentium ad om-  
nes ægros fere ut . . . . . I.  $9\frac{3}{11}$

Pro-



Proportio ex febre maligna mortuorum  
ad omnes ex eadem decumbentes ut . . . 1. 6 $\frac{2}{3}$

Æstate morbi plurimi, sed parum lethales: paulo  
pauciores Autumno, sed maxime funesti: Hyeme ad-  
huc pauciores, quam Autumno, uti & vere proxi-  
mo; sed eadem mortuorum ad ægros proportio re-  
peritur, quæ per Autumnum obtinuit.

Ad diem 25tam leguntur sequentia: *periit in ictero  
nigro ex scirrbo sphincteris vesiculæ felleæ cum sphace-  
latione hepatis, & ex lusu inordinato naturæ; visce-  
ra enim tam pectoris quam abdominis in situ mutata  
erant, ut hepar in sinistra parte reperiretur, & re-  
liqua &c.*

Ad diem 26tam: *periit in febre lenta ex obstru-  
ctione lienis, & omnium glandularum abdominis, si-  
mul multis hydatidibus. & hydrope pericardii: exente-  
ratione quoque manifestabatur peritonæum scirrhosum  
ad digiti majoris crassitiem.*

Ad 12 Augusti: *senicula periit in ictero chronico:  
in exenteratione inveniebatur hepar ulcerosam, calculi  
in vesicula fellea, mesenterium scirrhosum, vesicula fel-  
lea simul scirrhosa, callosa, & cartilaginosa.*

Ad 3tiam Novembris *apoplexia ex casu: post  
mortem inventa fractura a sutura lambdoidea usque ad  
foramen occipitale: extravasatio sanguinis in cerebello,  
& ruptura duræ matris antè ad os frontale, ut ce-  
rebrum transiret: totum cerebrum simul impletum san-  
guine extravasato.*

Anno 1768. suscepti . . . . . 1066

Mortui. . . . . 83

Ex febre maligna decubuere.

Sine exanthematibus. . . . . 115

Cum petechiis . . . . . 1

Cum miliaribus albis. . . . . 4

182 M. STOLL RATIO MEDENDI.

Summa omnium maligne ægrotantium fuit . . .	120
Inde mortui . . . . .	17
Proportio mortuorum omnium ad susceptos proxime ut . . . . .	I. 12 $\frac{8}{9}$
Ratio maligne ægrotantium ad omnes æ- gros ferme ut . . . . .	I. 8 $\frac{1}{6}$
Ratio omnium ex febre maligna mortuo- rum ad omnes universim mortuos ut . . . .	I. 4 $\frac{13}{17}$
Sive proxime ut . . . . .	I. 5
Ratio mortuorum ex febre maligna ad om- nes ex eadem decumbentes proxime ut . . .	I. 7.

Vere, & Autumno inter ægros non plurimos pluri-  
ma funera; mensibus Julio & Junio inter plurimos  
ægros pauci periere, pauci itidem per Hyemem mor-  
tui, paucique ægrotarunt.

Ad diem 17mam Junii hæc notantur: *periit in  
littero chronico nigro: in exenteratione inveni hepar, col-  
lum vesiculæ felleæ, mesenterium, & receptaculum chyli  
scirrhusum, & corpus integre emaciatum; atque bilis  
loco in vesicula fuit sanguis nigerrimus.*

In lectione cadaverum una alterave vice reperi  
bilem profunde flavam, amurcosam, quæ primo  
aspectu, antequam paucillum bilis charta bibula ex-  
ciperem, sanguinem nigerrimum mentiebatur, etsi  
fors sanguinem nigerrimum reapse viderit, qui ca-  
caver secuit.

Ad diem 20mam: *periit in vomita chronico ex magno  
scirrho pancreatis, & ejusdem concretionem cum ventricu-  
lo, atque hepate obstructo, & copiosis abscessibus obfesso.*

Anno 1769. suscepti . . . . .	1133
Mortui . . . . .	75
Febri maligna laborarunt sine efflorescentiis. . .	58
Cum petechiis. . . . .	6
Cum miliaribus albis . . . . .	3
Cum variolis confluentibus. . . . .	1

Sum-

Summa maligne ægrotantium. . . . .	68
Inde mortui . . . . .	21
Ratio mortuorum ad susceptos fere ut . . . . .	1. 15 $\frac{1}{3}$
Ratio maligne ægrotantium ad omnes ægros fere ut . . . . .	1. 16 $\frac{1}{7}$

Ratio mortuorum ex febre maligna ad omnes, qui ex eadem decubuere ut . . . . . 1. 3 $\frac{2}{3}$

Ratio mortuorum ex febre maligna ad omnes universim mortuos ut . . . . . 1. 3 $\frac{4}{5}$

Morbi plurimi per Æstatem: mense Junio vergente febres malignæ ingrediebantur, quæ mense Augusto ad ~~anxum~~ pervenerunt: pleraque illius mensis funera ex ea febre contigere. Morbi vere, & Autumno ferme æquales numero, & morbis æstivis pauciores: vere plura funera, quam quocunque alio Anni tempore, eaque potissimum ex infirmitatibus chronicis, phthisi, hydropse &c. &c. dein Autumno. Hyems salubrior ac aliæ Anni partes.

Ad Diem 12mam habetur: *periit in cachexia iſterica. Exenteratio mōſtrabat hepar valde magnum, durum, flavo rubrum in substantia, cum extravasatione feri flavi in pectore, & abdomine.*

Anno 1770. suscepti fuere . . . . .	1233
Mortui . . . . .	73
Febri acuta laborarunt . . . . .	92
Cum petechiis . . . . .	9
Cum miliaribus albis. . . . .	7
Cum scarlatina . . . . .	2

Summa omnium maligne laborantium . . . . .	104
Inde mortui . . . . .	24

Ratio mortuorum omnium ad omnes susceptos fere ut . . . . . 1. 16 $\frac{2}{5}$

Ra

Ratio maligne laborantium ad omnes æ-  
gros, fere ut . . . . . I. 111  $\frac{9}{10}$

Ratio mortuorum ex febre maligna ad om-  
nes, qui ex eadem decubuere ut . . . . . I. 4  $\frac{1}{2}$

Ratio mortuorum ex febre maligna ad om-  
nes mortuos ut . . . . . I. 3  $\frac{1}{4}$

Plurimi morbi per Æstatem, & in principio Au-  
tumni, sed omnium minime lethales. Mense Novem-  
bri, & Decembri pauciores, sed magis lethales: ve-  
re pauciores quam Æstate, & Autumno, sed plura  
funera, eaque tam ex morbis chronicis, quam ex fe-  
bre maligna.

Ad diem octavam Januarii leguntur sequentia:  
*periit in ascite: in extenteratione inventum est hepar  
scirrhosum, vix non cartilaginosum, & ultra 40 men-  
suræ aquarum in abdomine.*

Ad diem decimam septimam Februarii: *periit in  
ictero ex inflammatione hepatis: in exenteratione inven-  
tum hepar scirrhosum, & steatomatosum magnitudinis  
ultra 20 libras pendens.*

Ad diem 20am Martii: *periit in asthmate sicco:  
in exenteratione reperti sunt pulmones pleuræ adhæren-  
tes, & ex integro scirrholi cum corde præter naturam  
magno.*

Ad diem 28vam: *periit in asthmate sicco: reperta  
pulmonum tuberculis plenorum cohæsió, cum empyemato  
magno (abiceffu) rupto ad cavitatem thoracis.*

Ad diem 12mam Maji, *periit ex casu ex alto, pa-  
ralysis corporis inferioris ex fractura, & luxatione ver-  
tebræ ultimæ thoracis.*

Ad diem 2dam Junii: *periit in ictero nigro ex scirrbo  
hepatis, & calculis vesicæ felleæ: in exenteratione in-  
ventum hepar jam putridum & gangrænosum, & cal-  
culi in intestina duodeno.*

Anno 1771. fuere suscepti. . . . . 1216  
Mort



Mortui . . . . .	100
Maligne laborarunt absque efflorescentiis . . . . .	305
Cum petechiis . . . . .	35
Cum miliaribus albis . . . . .	6
Cum scarlatina . . . . .	2

Summa 348

Inde mortui . . . . . 45

Ratio mortuorum omnium ad omnes susceptos fere ut . . . . . 1. 12 $\frac{1}{3}$ Ratio maligne laborantium ad omnes ægros fere ut . . . . . 1. 3 $\frac{1}{2}$ Ratio mortuorum ex febre maligna ad omnes ex eadem decumbentes ut . . . . . 1. 7 $\frac{1}{3}$ Ratio mortuorum ex febre maligna ad omnes mortuos ut . . . . . 1. 2 $\frac{2}{9}$ 

Ab Aprilis initio ad principium Novembris morbi plurimi tuere, vere maxime lethales, minime Æstate. Hyems minus lethalis, quam Ver, & magis, quam Æstas. Majus omnium plurima funera numeravit.

Ad diem 27mam Januarii habentur sequentia: suscepta est cum pernionibus parum sphacelatis: mox a susceptione spasmo cynico, & motibus convulsivis correpta periit.

Ad diem 2dam Aprilis: periit in fractura, & luxatione vertebrarum lumborum: paralytis inferiorum partium corporis ex casu ab alto.

Ad diem 14tam Aprilis: periit ex febre maligna, & ingentibus parotidibus suffocatus.

Ad diem 24tam Julii: periit ex sphacelo faciei ex diathesi scorbutica.

Ad diem 30mam: periit ex spasmo cynico & convulsionibus: in exenteratione reperta est extravasatio sanguinis ad unciam in basi cravii.

# 186 M. STOLL RATIO MEDENDI.

Ad 16tam Septembris: periit convulsus in tetano  
ex concussione spinæ dorsæ.

Ad 29nam: post febrim malignam facta remittens  
perniciosa: in paroxysmo convulsionibus stipato pe-  
riit.

Ad diem 10tam Novembris: periit in asthmate ex  
aneurismatica dilatatione cordis cum polyposis cartilagi-  
neis concretionibus.

Ad 29nam Decembris: periit in asthmate sicco,  
convulsivo: in exenteratione pulmones reperti scir-  
rhosi.

Anno 1772. suscepti	1305
Mortui	79
Febri maligna sine efflorescentiis laborarunt	352
Cum petechiis	27
Cum miliaribus albis	8

Summa 387

Inde mortui 33

Ratio mortuorum omnium ad susceptos  
fere ut . . . . . I. 16 $\frac{1}{2}$

Ratio maligne laborantium ad omnes æ-  
gros fere ut . . . . . I. 3 $\frac{1}{2}$

Ratio mortuorum ex febre maligna ad  
omnes, qui ex eadem decubuere ut . . . I. 11 $\frac{8}{11}$

Ratio mortuorum ex febre maligna ad  
omnes universum mortuos fere ut . . . I. 2 $\frac{4}{11}$

A principio Anni ad finem usque omnia propemo-  
dum funera febris maligna dedit. Morbi plurimi  
ab initio Maji ad finem Octobris, paucissimi mensi-  
bus Novembri, & Decembri. Hyems adulta, to-  
tumque Ver maxime lethale, minus Æstas, minime  
Autumnus.

Anno 1773. suscepti	1176
Mortui	63
Cum	

Febri maligna sine efflorescentis laborarunt 109

Cum petechiis . . . . . 5

Cum miliaribus albis . . . . . 1

Summa 115

Inde mortui . . . . . 13

Ratio mortuorum omnium ad omnes suscep-  
tos ut . . . . . I. 18 $\frac{2}{3}$ Ratio maligne laborantium ad omnes uni-  
versim ægros ferme ut . . . . . I. 10 $\frac{1}{3}$ Ratio mortuorum ex febre maligna ad  
omnes, qui eadem laborarunt ut . . . . . I. 8 $\frac{1}{3}$ 

Copia morborum Vere, & Æstate par, at dispar  
lethalitas: maxime enim lethale Ver fuit, ubi pleræ-  
que mortes ex febribus acutis contingere: dein Au-  
tumnus: demum Æstas: Hyeme magna salubritas.

Ad diem 9nam Septembris habentur sequentia; post-  
quam acutam, & dein remittentem bis superavit, re-  
pente moritur. In exenteratione summa flacciditas præ-  
sertim cordis, & parva sphacelatio veniculo reperta est.

Ad diem 10nam Octobris: periit in marasmo, &  
ictero nigro, in exenteratione repertum est mesenterium  
& glandulæ ejusdem vix non cartilagineæ, atque vesti-  
cula fellea calculis plena.

Anno 1774. suscepti fuere . . . . . 992

Mortui . . . . . 58

Febri maligna sine efflorescentiis labo-  
rarunt . . . . . 65

Cum petechiis . . . . . 8

Cum miliaribus albis . . . . . 3

Summa 76

Inde mortui . . . . . 11

Ratio mortuorum omnium ad suscep-  
tos ut . . . . . I. 17 $\frac{3}{4}$ 

Ra-

Ratio maligne laborantium ad omnes  
 ægros ut . . . . . I.  $13\frac{1}{10}$

Ratio mortuorum ex febre maligna ad om-  
 nes qui ex eadem decubuere, ut . . . . . I.  $6\frac{19}{11}$

Ratio mortuorum ex febre maligna ad om-  
 nes mortuos ut . . . . . I.  $5\frac{4}{11}$

Vere plures morbi, & magis lethales: paucissimi  
 per Æstatem, sed lethalitate haud inferiores; plures  
 Autumno quam Ætate, attamen rarius perniciosi:  
 Hyems salubris.

Ad diem 21mam Februarii habentur sequentia: *pe-  
 riit in asthma convulsivo post colicam pictonum.*

Anno 1775. suscepti fuere . . . . . 1206

Mortui . . . . . 63

Ratio mortuorum omnium ad susceptos ut I.  $19\frac{2}{5}$

Quot ægri febre maligna laboraverint, atque ex  
 ea mortui hoc anno sint, in catalogo non reperitur.

Ab initio Maji ad finem Septembris morbi multi,  
 non tamen multum perniciosi: adulto Autumno,  
 Hyeme, & Veris initio minor morborum copia, sed  
 inde frequentior perniciēs.

Quod si numerus omnium per 14 annos in No-  
 socomio mortuorum compareretur cum nu-  
 mero omnium per eosdem Annos suscepto-  
 rum, erit ratio media mortuorum ad suscep-  
 tos proxime ut . . . . . I.  $14\frac{3}{7}$

Ratio media mortuorum ex febre mali-  
 gna spatio 12 annorum ad omnes per toti-  
 dem annos maligne laborantes proxime ut I.  $7\frac{1}{10}$

Ratio media mortuorum per 12 annos  
 ex febre maligna ad omnes universim per  
 idem tempus in Nosocomio mortuos pro-  
 xime ut . . . . . I.  $2\frac{19}{20}$

Inter 270 ægros ex febre maligna mortuos qua-  
 tuordecim fuere, quibus parotides exstabant, &  
 quina-



quinque, quibus orta parotis ante mortem retrocessit.

Inter 298 fuere viginti & unus, qui *in febre maligna ex decubitu sphacelato* periisse leguntur.

Frequens mentio fit asthmatis lethalis ex hydrope thoracis, & pericardii.

Gibbosos quam plurimos phthisi, peripneumonia, asthmate, hydrothorace periisse in Necrologiis sedulo adnotatum reperitur.

Phthisicos quam plurimos, item hydropicos pleurosque, eos præcipue, qui aquis intra thoracem collectis laborabant, mensibus Vernis periisse potius, quam alio Anni tempore eadem Necrologia constanter docent.

Modum insuper additum persæpe reperi, quo febres malignæ ægros jugulaverint: periire *convulsi, phrenitici, superveniente apoplexia, congestione facta ad caput hemiplegiam producente, cum parotide exstante, ingentibus parotidibus suffocati, parotide retrogressa, parotidibus interne gangrænosæ, metastasi facta ad pulmones, facta depositione ad abdomen, decubitu sphacelato, locis vesicantium sphacelatis.*

Observatio constans, & Necrologia docent, quasdam Anni partes præ aliis perniciosas esse. Sic Ver pluribus funestari mortibus solet, ac quæcunque alia Anni pars. Intervallo non longo Hyems sequitur: utrumque hoc Anni tempus longa infirmitate detentis phthisicis, hydropicis &c. &c. lethum affert. Ver autem morbos quoque acutos adsciscit, ut & ex longis morbis, & ex acutis per idem tempus exortis multi pereant: hinc alia Veris ratio apud nos est, quam quæ apud Hippocratem descripta invenitur, qui L. 3. Aphor. 6. *Ver omnium Anni temporum saluberrimum, & minime lethale* affert.

Observationes hæ aliorum quoque Süßmilchii præprimis observationibus respondent. Verum alius  
tem-

temporum ordo stabilitur, si non lethalitatem, sed numerum morborum diversis Anni partibus regnantium contemplemur. *Æstas* morborum feracissima, sed minime plerumque lethalium tunc primas tenet: hanc *Autumnus* excipit. Ver pauciores plerumque morbos numerat, paucissimos *Hyems*.

Sed hic de eo sermo sit, quod ut plurimum obtinet; abnormes enim, hybridæque temporum constitutiones subinde dari monumenta medica abunde testantur.

















